

D X
M 2165

35320


**REPRODUCED FROM THE ORIGINAL
IN THE HENRY E. HUNTINGTON
LIBRARY AND ART GALLERY.
FOR REFERENCE ONLY.
PERMISSION NECESSARY FOR
REPRODUCTION.**

D X
M 2165

35320

**REPRODUCED FROM THE ORIGINAL
IN THE HENRY E. HUNTINGTON
LIBRARY AND ART GALLERY.
FOR REFERENCE ONLY.
PERMISSION NECESSARY FOR
REPRODUCTION.**

IOANNIS MILTONI
Angli
PRO POPVLO ANGLICANO
DEFENSIO,
Contra
CLAVDII ANONYMI, aliàs SALMASII,
DEFENSIONEM
REGIAM



LONDINI,
Typis DV GARDIANIS,
Anno Domini 1650.

THE NEW YORK PUBLIC LIBRARY

ASTOR LENOX AND TILDEN FOUNDATIONS

1215 1/2 ST. 4th FL.



P R Æ F A T I O.



TAmetsi vereor, si in defendendo Populo Anglicano tam simpliciter profusus verborum, vacuus rerum, quàm est plerisque visus in defensione regiâ Salmasius, ne verbosissimi simul & ineptissimi defensoris nomen peritus esse videar, tamen cum in mediccri quavis materia tractandâ nemo sibi adeò properandum esse existimet, quin exordio saltem aliquo pro dignitate suscepti à se operis uti soleat, id ego in re omnium ferè maxima dicenda si non omittam, neque nimis astringam, spero quas equidem, duas propemodùm res, magnopere vellem, assecuturum me esse; alteram, ut causa huic nobilissima, & seculorum omnium memoria dignissima nulla ex parte, quantum in me est, desim; alteram, ut reprehensam in adversario futilitatem & redundantiam, devitasse tamen ipse nihilo minus judicer. Dicam enim res neque parvas neque vulgares, regem potentissimum, oppressis legibus, religione afflictâ, pro libidine regnantem, tandem à suo populo, qui servitutem longam servierat, bello victum; inde in custodiam traditum; & cum nullam omnino melius de se sperandi materiam vel dictis vel factis praberet, à

P R A E F A T I O .

summo demum regni Concilio capite damnatum;
 & pro ipsis Regia foribus securi percussam. Dicam
 etiam, quod ad levandos magna superstitione ho-
 minum animos multum contulerit, quo jure, praefer-
 tim apud nos, judicatum hoc atque peractum sit,
 meosque cives fortissimos & integerrimos, deque u-
 niversis orbis terrarum civibus ac populis egregia
 meritos ab improbissimis maledicorum, siue nostratium,
 siue exterorum calumniis, tum impiis ab
 hujus inanissimi Sophista maledictis, qui pro duce
 & coryphaeo ceterorum se gerit, facile defendam.
 Quae enim ullius regis alto solio sedentis majestas
 unquam tanta eluxit, quanta tum Populi Angli-
 cani effulgebat, cum excussa illa veteri superstitione,
 quae diu invaluerat, ipsum regem, seu potius de
 rege hostem, qui solus mortalium impunitatem sibi
 divino jure vendicabat, suis legibus irretitum ju-
 dicio perfundere, & quo is quemcunque alium sup-
 plicio affecisset, eodem fontem ipsum afficere non ve-
 reretur. At quid ego haec tanquam populi facta pra-
 dicor, quae ipsa per se pendere vocem edunt, & prae-
 sentem ubique testantur Deum. Qui, quoties sua sa-
 pientissima menti complacitum est, superbos & ef-
 franatos reges, supra humanum modum sese attol-
 lentes, soles deturbare, & tota saepe cum domo fun-
 ditus evertit. Illius nos manifesto numine ad salu-
 tem & libertatem propè amissam subito erecti, il-
 lum ducem secuti, & impressi passim divina vesti-
 gia venerantes, viam haud obscuram, sed illustrem,
 illum auspiciis commostrarum & patefactam in-
 grossam

P R Æ F A T I O.

gressi sumus. Hac ego omnia digne satis explicare,
 & quod omnes fortasse gentes legant atque atres,
 monumentis tradere, si dilgentia solum mea, cuius-
 modicunque est, meis tantum viribus sperem me
 posse, frustra sim. Quæ enim oratio tam augusta at-
 que magnifica, quod tam excellens ingenium huic
 oneri subeundo par esse queat, ut cum illustrium vi-
 rorum aut civitatum res gestas vix reperiatur tot
 seculis qui luculenter possit scribere, opinetur quis-
 quam hac, non hominum, sed omnipotentis planè
 Dei gloriose & mirabiliter facta ullis se verbis aut
 stylo assequi posse? Quod quidem munus ut suscipe-
 rem, tamen si summi in republica nostrâ viri suâ
 autoritate perfecerunt, mihi que hoc negotium
 datum esse voluerunt, ut quæ illi, Deo ductore, ma-
 gnâ cum gloria gessere, ea, quod cerè proximum
 est, contra invidiam & obreclationem, quas in res
 ferrum & apparatus belli nihil potest, alio genere
 armorum defenderem, quorum ego quidem judi-
 cium magno mihi ornamento esse existimo, me sci-
 licet eorum suffragis eam esse præ cæteris, qui hanc
 patria meæ fortissimis liberatoribus haud pœni-
 tendam operam navarem, quin & ipse ab ineun-
 te adolescentiâ iis eram studiis incensus, quæ me ad
 optima quæque si m'nis faciendâ, ac cerè laudan-
 dâ incitatum ferebant, his tamen diffinis admini-
 culis ad divinam opem recurro. Deinde, opt. max.
 donorum omnium largitorem invoco, ut quàm
 prosperè quàm que ple nostrî illi ad libertatem cla-
 rissimi duces regio fastus, & dominatum impoten-

P R Æ F A T I O.

tem acie fregerunt, dein memorabili tandem supplicio extinxerunt; quàmque facili negotio nuper unus de multis ipsum regem veluti ab inferis resurgentem, inque illo l. bro post mortem edito novis argutiis, & verborum lenociniis populo se venditantem redarguit atque summovit, tam ego feliciter tamque verè declamatoris hujus exoticici petulantiam & mendacia refellam atque discutiam. Qui alienigena cum sit, & quamvis id millies neget, Grammaticus, non eâ stipe contentus quam hoc nomine meretur, magnus ardelio esse maluit; non reipub. solum immiscere si ausus, sed aliena: cum neque modestiam, neque iudicium, neque aliud quicquam afferat, quod oporteret sanè tantum arbitrum, præter arrogantiam & Grammaticam. Et sanè hæc quæ jam Latine utcumque scripsit, si inter Anglos, & nostro sermone protulisset, vix esset, credo, qui de responsolaborandum esse iudicaret; sed partim trita, & refutationibus jam crebris explosa negligeret, partim tyrannica & fœda, vilissimo quovis mancipio vix ferenda, quamvis alioqui regias secutus ipse partes, aversaretur. Nunc cum inter exteros, &strarum rerum penitus ignaros grandi paginâ turgescat, sunt illi quidem qui res nostras perperam intelligunt, edocendi; hic suo more (quandoquidem tanta maledicendi aliis libidine fertur) suo inquam more ac modo erit tractandus. Quod si quis miretur fortè, cur ergò tam diu intactum & odiantem, nostròque omnium silentio inflatum volitare passi simus, de aliis sanè nescio, de me

P R A E F A T I O.

me audacter possum dicere, non mihi verba aut argumenta, quibus causam tuerer tam bonam, diu querenda aut investiganda fuisse, si otium & valetudinem (qua quidem scribendi laborem ferre possit) nactus essem. Quâ cum adhuc etiam tenui admodum utar, carptim hac cogor, & intercisus penè singulis horis vix attingere, qua continenti stylo atque studio persequi debuisssem. Vnde hoc si minus dabitur, ciues meos praestantissimos, patria conservatores digno laudum praconio celebrare, quorum immortalia facinora jam toto orbe claruerunt, defendere tamen, & ab huius importuni litteratoris insolentiâ, & professoria lingua intemperiiis vindicare haud mihi difficile futurum spero. Pessimè enim vel naturâ vel legibus comparatum foret, si arguta servitus, libertas muta esset; & haberent tyranni qui pro se dicerent, non haberent qui tyrannos debellare possunt: miserum esset, si hac ipsa ratio, quo utimur dei munere, non multo plura ad homines conservandos, liberandos, & quantum natura fert, inter se aquandos, quàm ad opprimendos & sub unius imperio malè perdendos argumenta suppeditaret. Causam itaque pulcherrimam hac certâ fiducia lati aggrediamur; illinc fraudem, fallaciam, ignorantiam, atque barbariem; hinc lucem, veritatem, rationem, & seculorum omnium optimorum studia, atque doctrinam nobiscum stare.

Agè nunc jam, satis praefati, quoniam cum criticis res est, tam culti voluminis titulum imprimis videamus quid aît, Defensio regia pro Carolo I.

P R A E F A T I O.

ad Car. II. Magnum sanè præstas, O quisquis es !
 patrem defendis ad filium mirum ni causam obti-
 neas. Verùm ego te falso aliàs sub nomine, nunc sub
 nullo latitantem, Salmassi, ad alia voco subsellia, ad
 alios iudices, ubi tu illud euge & sophos, quod in
 palastra tuâ literaria captare miserè soles, fortasse
 non audies. Sed cur ad regem filium defensio hac
 regia? non opus est tortore, consistentem habemus
 reum, Sumptibus inquit Regiis; O te venalem o-
 ratorem & sumptuosum ! Siccinè defensionem pro
 Carolo patre, tuâ sententiâ, rege optimo, ad Carolum
 filium regem pauperrimum noluisti nisi sumptibus
 regis? Sed veterator etiam haud irridiculus esse
 voluisti, qui regiam defensionem dixeris; non e-
 nim amplius tua quam vendidisti, sed legitime
 jam regia defensio est; centenis nimirum Iacobais
 emta, ingenti pretio ab egentissimo Rege: non enim
 ignota loquimur; novimus qui illos aureos domum
 attulit tuam, qui crumenam illam tessellis vitreis
 variatam, novimus qui te avaras manus porri-
 gentem vidit, in speciem quidem ut Sacellatum Re-
 gis missum cum munere, re verâ ut ipsum manus
 amplecterere; & unâ tantum mercede acceptâ to-
 tum penè regis ararium exinanires. Sed ecce ip-
 sum, crepant fores, prodit histrio in proscenium.

Date operam & cum silentio animadvertite,
 Ut pernoscat is quid sibi Eunuchus velit.

Nam quicquid est, præter solitum cothurnæus in-
 cedit. Horribilis nuper nuntius aures nostras a-
 troci vulnere, sed magis mentes perculit, de
 parricidio apud Anglos in personâ regis sacrile-
 gorum

P R E F A T I O.

gorum hominum nefariâ conspiratione admissa. Profecto nuntius isle horribilis aut gladium multo longiorem eo quem strinxit Petrus habuerit oportet, aut aures ista auritissima fuerint, quas tam longinquo vulnere perculerit: nam aures non stolidas ne offendisse quidem potuit. Ecqua enim vobis sit injuria, ecquis vestrum leditur, si nos hostes & perduelles nostros, siue plebeios, siue nobiles, siue reges morte mulctamus? At ista mitte, Salmasti, quæ ad te nihil attinent: ego enim de te etiam horribilem habeo quem apportem nuntium; qui quæ omnium Grammaticorum & Criticorum aures, modò teretes habent & doctas, atrociori vulnere si non perculerit, mirabor; de parricidio apud Hollandos in persona Aristarchi, nefariâ Salmasti audaciâ admissa: te magnum scilicet Criticum sumptibus regis conductum, ut defensionem regiam scriberes, non solum putidissimo exordio, præficarum funebribus nugis & nervis simillimo nullus; non fatui, mentem miseratione permovisse, sed primâ statim clausulâ risum penè legentibus multiplici barbarismo concitasse. Quid enim, quaso, est parricidium in persona regis admittere, quid in persona regis? quæ unquam latinitas sic locuta est! nisi aliquem nobis forte Pseudophilippum narras, qui personam regis indutus, nescio quid parricidii apud Anglos patraverit; quod verbum verius opinione tua ex ore tui excidisse puto. Tyrannus enim, quasi histrionalis quidam rex, larva tantum & persona regis, non verus rex est. Caterum ob hujusmodi noxas

P R A E F A T I O.

Gallico latinas, quibus passim scates, non tam mihi, neque enim est orium, quàm ipsis tuis Grammatistis pœnas dabis; quibus ego te deridendum & vapulandum propino. Hoc multo atrocius; quod à summis magistratibus nostris de rege statutum est, id sacrilegorum hominum nefariâ conspiratione admissum ais. Tunc furcifer potentissimi nuper regni, nunc reipub. eo potentioris acta & consulta sic nominas? quorum de factis ne Rex quidem ullas ut quicquam gravius pronuntiaret, aut scriptum ederet, adduci adhuc potuit. Meritò itaque amplissimi Ordines Hollandia, liberatorum olim patria vera progenies, defensionem hanc tyrannicam, populorum omnium libertati pestilentissimam edicto suo tenebris damnârunt; cujus & ipsum auctorem omnis libera Civitas suis prohibere finibus, aut ejicere deberet: eâque præcipuè qua tam ingratum tamq; tetrum reipub. hostem suo stipendio alit; cujus ille reipub. haud secus atque nostra, fundamenta ipsa atque causas oppugnat; necnon utramq; unâ & eâdem operâ labefactare & subruere conatur: præstantissimòsque illic Libertatis Vindices nostrorum sub nomine maledictis proscindit. Reputate jam vobiscum Illustrissimi Fœderatorum Ordines, & cum animis vestris cogitate, quis hunc regia potestatis assertorem ad scribendum impulerit, quis nuper apud vos regè se gerere incœperit, qua consilia, qui conatus, qua turba denique per Hollandiam secuta sint, qua nunc essent, quàm vobis parata servitum, novusque dominus erat, atque illa vestra tot

annorum

P R A E F A T I O.

annorum armis atque laboribus vindicata libertas, quàm propè extincta apud vos nunc foret, nisi opportunissimâ nuper temerarii juvenis morte respicisset. Sed pergit iste noster ampullari, & mirabiles tragœdias fingere, Quosunque infandus hic parricidialis nimirum barbarismi Salmasiani rumor attingit, haud secûs ac si fulmine afflati essent, derepente his arrectæque horrore comæ & vox faucibus hæsit. Quod nunc primitus auditum discant Physici, comas fulmine arrectas. Verùm quis hoc nescit, viles & imbelles animos, magni cuiuspiam facinoris vel rumore obstupescere; quòdque priùs fuerunt, tum se maximè stipites indicare. Alii lacrymas non tenuerunt, muliercula credo aulicæ, aut siqui his molliores; inter quos & ipse Salmasius novâ quâdam metamorphosi Salmacis factus est; & fronte hoc suo lacrymarum fictitio, & nocte parato viriles animos emolliore conatur. Moveo itaque & cavere jubeo

— infamis ne quem malè fortibus undis Salmacis enervet. — ne vir cū venerit, exeat indè Semivir, & tactis subitò mollescat in undis,

Fortiùs verò inquit animati (nam fortes puto & animosos ne nominare quidem nisi putide potest) tantâ indignationis flammâ exarserunt, ut vix se caperent. Furiosos illos non flocci facimus; vera fortitudine sui que compote istos minaces pellerè, & in fugam vertere consuevimus. Nemo certè non diras imprecatus est tanti sceleris authoribus. Vox tamen, ut tu modo aiebas, faucibus hæsit; at-

P R A E F A T I O.

quæ hæssisset utinam in hunc usque diem, si de nostris duntaxat perfugis hoc vis intelligi, quod nos etiam pro comperto habemus, nihil illis frequentius in ore esse, quam diras & imprecationes omnibus bonis abominandas quidem, non tamen metuendas. De aliis credibile vix est, cum supplicii de rege summi fama illuc pervenisset, repertum in libero præsertim populo fuisse ullum, tam ad servitutem natum, qui nos dicto laderet, aut factum nostrum crimini daret; immo potius omnes bonos omnia bona dixisse, quin etiam Deo gratias egisse, qui exemplum justitiæ tam illustre & excelsum ediderit, quodque ceteris regibus tam salutari documento esse possit. Istos itaque feros ac ferreos cædem nescio cujus miserabilem, ac mirabilem plorantes, cum suo tinnulo oratore, post regium in orbe nomen natum notumque, frigidissimo, etiam atque etiam plorare jubemus. At quis interim è ludo ferè puer, aut è cœnobio quovis fraterculus casum hunc regis non multo disertius, immo Latinius hoc oratore regio declamitasset? Verùm ego inoptior sim, si infantiam hujus & deliramenta hunc in modum toto volumine accuratè persequar; quod tamen libens facerem, (quoniam superbiam & fastidium, ut ferunt, supra modum turget) ni mole tantum libri inconcinna atque incondita se protegeret, & veluti miles ille Terentianus post principia lateret: callido sanè consilio, ut defessus singula notando etiam acerrimus quisque, radio prius conficeretur, quàm omnia redargueret. Nunc ejus
quod-

P R E F A T I O.

quoddam specimen dare hac veluti prolusione dumtaxat volui. & cordatis lectoribus à principio statim degustandum hominem præbere, ut in hac pagina unius promulsæ experiamur quàm laudè nos & luculenter cæteris ferculis excepturus sit; quantas ineptias atque infantias toto opere congefferit, qui tam densas, ubi minimè decuit, in ipsa fronte collocavit. Exinde multa garrientem, & scombris concionantem facile prætereo; ad nostras autè res quod attinet, haud dubitamus quin ea, quæ authoritate Parlamenti scripta publicè & declarata sunt, apud omnes bonos & prudentes externos plus ponderis habitura sint, quàm unius impudentissimi homuncionis calumniæ, & mendaciæ, qui ab exulibus nostris, patria hostibus, pretio conductus, quolibet eorum dictante quibus operam suam locaverat, aut rumusculum spargente, falsissima quæque corradere, & in chartam conjicere non dubitavit. Vtq; planè intelligant omnes quàm non illi religio sit, quidlibet scribere, verum an falsum, pium an impium, haud aliis mihi testis adhibendus erit, quàm ipse Salmasius. Scribit is in Apparatu contra primatum Papæ, maximas esse causas cur Ecclesia redire ab episcopatu debeat ad Apostolicam presbyterorum institutionem; longè majus ex episcopatu introductum in ecclesiam esse malum, quàm illa schismata quæ prius metuebantur: Pestem illam quæ ex eo ecclesias invasit, totum ecclesiæ corpus miserabili tyrannide pessundisse; immo ipsos reges ac principes sub jugum misisse;

P R A E P A T I O.

misisse ; Majorem in ecclesiam utilitatem
 redundaturam Hierarchiâ totâ extinctâ ,
 quam solo capite Papâ. pag. 160. Posse
 episcopatum cum Papatu tolli cum summo
 bono ecclesiæ; sublato episcopatu ruere ipsum
 Papatum, super illo utpote fundatum, p. 171.
 Cur removeri debeat in illis regnis quæ jam
 Papatui renunciârunt proprias habere causas.
 Cur ibi episcopatus retineatur se non videre ;
 non integram videri reformationem quæ hac
 in parte imperfecta sit; nihil afferri posse ratio-
 nis aut causæ probabillis cur sublato Papatu re-
 tineri debeat aut possit episcopatus. p. 197. *Hac*
et multò plura cum ante annos quatuor scripserit,
tantâ nunc vanitate et impudentiâ est, ut Parla-
mentum Angliæ graviter incusare hoc loco audeat,
quòd episcopatum non solum senatu ejiciendum,
sed etiam penitus abjiciendum censuerint.
Quid ? quòd ipsum etiam episcopatum suadet at-
que defendit, iisdem usus argumentis et rationi-
bus, quas libro illo priore magno impetu confuta-
verat; necessarios nempe fuisse episcopos, & o-
mnino retinendos, ne mille pestiferæ sectæ &
hæreses in Angliâ pullularent. O vasa frum et ver-
spellem ! ad eone te etiam in sacris non puduit de-
sultorem agere, propè dixeram, ecclesiam proderet;
tuius tu ideo sanctissima instituta tanto strepitu
asseruisse videris, ut quoties tibi commodum esset,
eo majore cum infamia ea ipsa ludificari atque sub-
vertere posses. Neminem hoc lateat, cum regni Or-
dines,

P R Æ F A T I O.

dines, Ecclesia nostra, ad exemplum caterarum, reformanda studio flagrantibus, episcopatum funditus tollere statuissent, primò regem intercessisse, dein bellum nobis eâ potissimùm causâ intulisse; quòd ipsi tandem in perniciem vertit. I nunc & te defensorem regium esse gloriare, qui ut regem graviter defendas, susceptam à temetipso ecclesia causam nunc palàm prodis atque oppugnas: cuius gravissima quidem censurâ esses notandus. De forma autem reipub. nostra, quoniam tu Professor triobolaris & extraneus remotis capsulis atque seriniis tuis nugarum refertissimis, quas melius in ordinem redigere poteras, in aliena reipub. satagere & odiosus esse mavis, sic breviter tibi, vel cuivis potius te prudentiori respondeo; eam formam esse quam nostra tempora atque dissidia ferunt; non qualis optanda esset, sed qualem obstinata improborum civium discordia esse patitur. Quæ autem Respub. factionibus laborat, atque armis se tuetur, si sana & integra tantum partis rationem habet, ceteros sive plebeios sive optimates præterit aut excludit, satis profectò aqua est; quamvis regem & procures, suis ipsa malis edocta, amplius nolit. Consilium autem illud supremum quòd insectaris, atque etiam Concilii Præsidentem, ne tu ridiculus es; Concilium enim illud, quod somnias, non est supremum, sed Parlamenti autoritate ad certum duntaxat tempus constitutum, quadraginta virorum ex suo ferè numero, quorum quilibet caterorum suffragiis præses esse potest. Semper autem
ho-

P R E F A T I O.

hoc usitatissimum fuit, ut Parlamentum, qui noster Senatus est, delectos ex suorum numero pauciores, quoties visum erat, constitueret: iis unum in locum ubi vis conveniendi, & veluti minoris cujusdam habendi Senatûs potestas delata est. Iisdem res saepe gravissima, quo celerius & majori cum silentio transigerentur, commissa atque credita; Classis, exercitus, ararii cura aut procuratio, quarvis denique pacis aut belli munia. Hoc sive concilium nominetur, sive quid aliud, verbo fortè novum, re antiquum est; & sine quo nulla omnino Respub. rectè administrari potest. De regis autem supplicio, & rerum apud nos conversione mitte vociferari, mitte virus illud tuum acerbatis evomere; donec ista quâ lege, quo jure, quo judicio facta sint, te licet repugnante, singulis capitibus ostendam, & pedem conferam. Si tamen instas quo jure, quâ lege, eâ, inquam, lege quam Deus ipse & natura sanxit, ut omnia quæ Reipub. salutaria essent, legitima & justa haberentur. Sic olim sapientes tui similibus responderunt. Leges per tot annos ratas refixisse nos criminari, bonasne an malas non dicis, nec si diceres audiendus esses, nam nostræ leges Ole quid ad te? Utinam plures refixissent tum leges tum leguleios; rectius sanè & rei Christiana & populo consulissent. Friends quod hæc Manii, terræ filii, vix domi nobiles, vix suis noti licere sibi crediderint. Meminisses quæ te non solum libri sacri sed etiam Lyricus doceat.

— Valet

P R A E F A T I O.

— Valet ima summis
Mutare, & insignem attenuat Deus
Obscura promens —

*Sic etiam habeto; eorum quos tu vix nobiles esse
ais, alios nulli vestrarum partium vel generis no-
bilitate cedere; alios ex se natos per industriam
atque virtutem ad veram nobilitatem iter affe-
ctare, & cum nobilissimis quibusque posse conferri;
se autem malle filios terræ dici, modo suæ, &
domi strenuè facere, quam sine terrâ & lare su-
mos vendendo, quod tu facis, homo nihili & stra-
mineus eques, in aliena terra dominorum nutu &
stipendio famem tolerare: ab ista, mihi crede, pe-
regrinatione ad agnatos potius & gentiles dedu-
cendus, nisi hoc unum sciperes, quod frivolæ quas-
dam praelectiones & nugamenta scis tantâ merce-
de apud exteros effutire. Reprehendis quod magi-
stratus nostri colluviem omnium Sectarum re-
cipiant; quid ni recipiant? quos ecclesiæ est è cœtu
fidelium ejicere, non magistratuum è civitate pel-
lere; siquidem in leges civiles non peccant. Pri-
mò homines ut tuto ac liberè sine vi atque inju-
riis vitam agerent, convenere in civitatem; ut
sanctè & religiosè, in Ecclesiâ; illa leges, hac di-
sciplinam habet suam, planè diversam: Hinc toto
orbe Christiano per tot annos bellum & bello feri-
tur, quod Magistratus & Ecclesiâ inter se officia
confundunt. Quapropter & Papist. cam minime
toleramus; neque enim eam tam esse religionem
intelligimus, quàm obtentu religionis tyranni-
dem*

P R A E F A T I O .

dem pontificiam civilis potentia spoliis ornatam,
qua contra ipsum Christi institutum ad se rapuit.
Independentes, quales à te solo finguntur, nulli a-
pud nos unquam visi: prater eos duntaxat qui cum
classes & synodos supra Ecclesiam quamque singu-
larem esse non agnoscant, eas omnes velut Hierar-
chia particulas quasdam, aut certè truncum ip-
sum, eradicandas esse tecum sentiunt. Hinc nomen
Independentium apud Vulgus obtinuit. Quod restat
video te id agere, ut regum omnium & Monarcha-
rum non invidiam solùm, sed etiam bellum atro-
cissimum in nos concites. Olim Rex Mithridates,
quamvis causâ dissimili, omnes reges in Romanos
concitabat, eadem propè calumniatus; Romanis
consilium esse, omnia regna subvertere, iis nulla
humana neque divina obstare, à principio nihil nisi
partum armû habuisse, latrones, regnorum maxi-
mè hostes: Hac Mithridates regi Arsaci: te verò in
illa tua exedra infantissimè rhetoricantem qua si-
ducia provexit, ut ad bellum hortando, & licet no-
lis videri, classicum canendo, ullum vel inter pue-
ros regem commovere te posse animum induceres,
isto praesertim ore tam exili & rancidulo, ut ne
mures quidem Homericos, te buccinatore, bellum
unquam rannunculis illaturos fuisse credam. Tan-
tum abest ut metuum quid tu belli nobis aut pericu-
li homo ignavissime, apud exteros reges istâ tua ra-
bidâ, & insulsâ simul facundia constare possis: qui
ad illos, ac si regum capita quasi pilas habeamus,
de coronis quasi trocho ludamus, sceptrâ im-
perialia

P R Æ E A T I O.

perialia non pluris faciamus quàm bacula morionum capitata, *luforiè sanè nos defers. At tu interea, stultissimum caput, morionis ipse baculo dignissimus es, qui reges ac principes tam puerilibus argumentis ad bellum suaderi putes. Omnes deinde populos inclamas, dicto audientes tuo, sat scio, minimè futuros. Hibernorum etiam consceleratam illam ac barbaram colluviem regiis partibus in auxilium vocas. Quod unicum indicio esse potest quàm scelestus sis & vacors, quàm omnes penè mortales impietate, audaciâ, & furore superes, qui devota gentis fidem atque opem implorare non dubitas, cujus ab impiâ societate tot civium innocentissimorum sanguine perfusâ etiam rex ipse aut abhorruit semper, aut abhorrere se simulavit. Et quam ille perfidiam, quam ille crudelitatem occultare, quantum potuit, atque ab se longè amovere summo studio contendit, eam tu, bipedum nequissime, quo minùs ultrò atque palàm suscipias, neque Deum neque homines vereris. Agedum; Hibernis igitur fautoribus ac sociis ad defensionem regis jam te accinge. Caves imprimis quod cauto mehercule opus erat, nequis te Tullio fortasse aut Demostheni omnem eloquentia laudem praeceptum ire suspicaretur; & pradicis, oratorio more non tibi agendum videri. Na tu haut stultè sapiis; id quod non potes, non videtur tibi esse agendum; oratoriè autem ut tu ageres quis, qui te satis novit, unquam expectavit? qui nihil elaborate, nihil distinctè, nihil quod sapiat, in lucem emittere aut soles aut potes;*

P R A E F A T I O.

tes; sed veluti Crispinus alter, aut Tzetzes ille graculus, modo ut multum scribas, quàm recte non laboras; neque si labores, valeas. Agetur, inquis, hæc causa toto orbo audiente, & quasi ad judicandum sedente. Id adeò nobis pergratum est, ut adversarium non cerebrosum & imperitum, qualis tu es, sed cordatum & intelligentem dari jam nobis optemus. Perorans planè tragicus es, immò Ajax ipse Lorarius. Horum ego injustitiam, impietatem, perfidiam, crudelitatem proclamabo cælo & terra, ipsosque authores convictos posteris tradam, reosque peragam. O Flosculos! Tunc igitur sine sale, sine genio proclamator & rabula, bonis authoribus direxandis tantum aut transcribendis natus, quicquam de tuo quod vivat producere te putas posset quem unà cum scriptis tuis futilissimis abreptum atas, mihi crede, proxima oblivioni mandabit. Nisi si defensio hac regia suo fortasse responso aliquid debitura est, si neglecta jam pridem & consopita, in manus iterum sumatur. Idque ego ab Illustrissimis Hollandia Ordinibus peterem, ut eam è fisco protinus dimissam, neque enim Thesaurus est, pervagari, quò velit, sinant. Si enim quàm vanitate, inscitia, falsitate referta sit, planum omnibus fecero, quò latius excurrit, eò arctius, meâ quidem sententiâ, supprimitur. Iam nos quemadmodum reos peragat, videamus.

P R O
POPULO ANGLICANO
D E F E N S I O.

C A P U T I.



Uoniam tibi vano homini & ventoso multum hinc forsitam superbix, Salmasi, multum spiritus accessit, magnæ scilicet Britannix regem fidei defensorum esse, te verò regis, ego quidem Scillum regi titulum, & hunc tibi jure pari ac merito concedam: cum sanè rex fidem, tu regem sic defenderis, ut causam uterque suam evertisse potius videatur, Quod cum passim infra, tum hoc primo capite ostendam. Dixeras tu quidem præfationis paginà duodecimà *Ornari pigmentis rhetoricis tam bonam & justam causam non debere: nam simpliciter rem, ut gesta est, narrare, regem defendere est.* Quando igitur toto hoc capite in quo narrationem illam simplicem futuram pollicitus eras, neq; rem simpliciter, ut gesta est, narras, neq; non pigmentis, quantum in eo genere consequi potes rhetoricis ornas, profectò vel tuo judicio si standum esset, causa regia neque bona neque justa erit. Quanquam hoc cave tibi sumas. quod dar nemo, posse te quicquam rhetoricè narrare; qui neque oratoris, neque historici, immò ne causidici quidem partes narrando sustinere poterat;

res; sed quasi circulator quispiam, arte circumforaneâ, magnam de te in procemio, velut in posterum diem, expectationem concitabas, non tam ut rem promissam tum demùm narrares, quàm ut pigmenta illa misera, & ampullas fuco refertas lectoribus quàm plurimis divenderes. Nam *de facto dicturus tot novitatum monstris te circumdari ac terreri sentis, ut quid primum exequaris, quid deinde, quid postremò, nescias*. Hoccine est simpliciter narrare? Dicam quod res est, tot tuorum ipse mendaciorum monstris, primùm terreri te sentis, deinde tot nugis, tot ineptiis levissimum illud caput non *circundari* solum, sed circumagi, *ut quid primum, quid deinde, quid postremò* dicendum ullo tempore sit, non modò nunc *nescias*, sed nunquam antea non nesciveris. *Inter difficultates qua occurrunt ad exprimendam tam incredibilis flagitii immanitatem hoc unum facile dictu suppetit, quod iterum iterumque repeti debet, nempe solem ipsum atrocius factum nunquam adspexisse alterum*. Multa sol aspexit, bone magister, quæ Bernardus non vidit. Solem autem iterum atque iterum reperas licebit, id tu quidem prudenter feceris, quod non nostra flagitia, sed defensionis tuæ frigus vehementissimè postulabit. *Regum, inquis, origo cum sole novo cæpit*. Dii te, Damasippe, deæque solstitio donent, quo te calfacias, qui ne pedem sine sole; nequis fortasse te umbraticum doctorem esse dicat.

At

At hercle etiam in tenebris es, qui jus patrium à regio non distinguis: & cum reges Patriæ Patres nominaveris, eâ statim metaphorâ persuasisse credis, ut quicquid de patre non negaverim, id continuò de rege verum esse concedam. Pater & rex diversissima sunt. Pater nos genuit; at non rex nos, sed nos regem creavimus. Patrem natura dedit populo, regem ipse populus dedit sibi; non ergò propter regem populus, sed propter populum rex est; ferimus patrem, morosum etiam & durum, ferimus & regem; sed ne patrem quidem ferimus tyrannum. Pater si filium interficit, capite pœnas dabit: cur non item rex eadem justissimâ lege tenebitur, si populum, id est filios suos, perdiderit, præsertim cum pater, ut ne pater sit, efficere non possit, rex facillè possit, ut neq; pater sit neque rex. Quod si *de facti qualitate*, quod ais, inde estimandum est, tibi dico, peregrine, & rebus nostris alienissime, testis oculatus & indigena tibi dico, nos regem neq; *bonum*, neque *justum*, neque *clementem*, neque *religiosum*, neque *pium*, neq; *pacificum*; sed hostem prope decennalem, nec parentem patriæ, sed vastatorem *de medio sustulisse*. Solet hoc fieri, fateris, inficias enim ire non audes, *sed non à reformatis, regi reformato*. Si quidem reformatus is dici potest, qui scriptis ad Papam literis, Sanctissimum appellaverat Patrem, qui Papistis æquior semper quàm Orthodoxis fuit. Talis cum fuerit, ne suæ quidem
familiaë

4 PRO POPULO ANGLIE.

fam. primus a reformatis est *demedio* sublatus.
 Quid? ejus avia Maria nonne à reformatis exuta regno solum vertere coacta est, supplicio demum capitis affecta, ne Scotis quidem reformatis ægrè ferentibus? immo si operam contulisse dicam, haud mentiar. In tantà autem regum *reformatorum* Paucitate, nihil hujusmodi accidisse, ut eorum aliquis morte plecteretur, non est quod miremur. Licere autem regem nequam, sive tyrannum regno pellere, vel supplicio quovis, prout meritis erit, punire (etiam summorum sententià Theologorum, qui ipsi reformandæ ecclesiæ authores fuere) aude tu modò negare. Concedis quàm plurimos reges non sicca morte perisse, hunc *gladio*, illum *veneno*, alium squalore *carceris*, aut *laqueo*. Omnium tamen hoc tibi miserrimum videtur, & monstri quiddam simile, regem in judicium adduci, *causam capitis dicere coactum, condemnatum, securi percussum*. Dic mihi, homo insipientissime, an non humanius, an non æquius, an non ad leges omnium civitatum accomodatius est, cujuscunque criminis reum in judicio sistere, sui defendendi copiam facere, lege condemnatum ad mortem haud immeritam ducere, ità ut damnato vel poenitendi, vel se colligendi spatium detur, quàm statim ut prehensus est, indicta causa pecudis in modum mactare? Quotusquisque est reorum qui si optio detur, non illo potius quàm hoc modo puniri se mauerit?

luerit. Quæ ratio igitur animadvertendi in civem moderatior est habita, cur non eadem in regem quoq; moderatior, & vel ipsi regi acceptior fuisse existimanda est. Tu secretò, & sine arbitris extinctum regem malebas, vel ut exempli tam boni salubritate omnis memoria caret, vel ut facti tam præclari conscientia defuisse lucem, aut leges atq; ipsam justitiam minimè sibi amicam habuisse videretur. Exaggeras deinde rem, quòd neque per tumultum aut factionem optimatum, aut rebellium furorem, sive militum sive populi; non odio, non metu, non studio dominandi, non cæco animi Imperu, sed consilio & ratione meditarum diu facinus peregerint. O meritò quidem te ex jurisconsulto Grammaticum! qui ab accidentibus causæ, ut loquuntur, quæ per se nihil valent, vituperationes instituis, cum nondum docueris illud facinus in vitio an in laude ponendum sit? Jam vide quàm in te facilè incurram. Si pulchrum & decorum fuit, eò magis laudandi quod nullis affectibus occupati, solius honestatis causâ fecerint; si arduum & grave, quòd non cæco Imperu, sed consilio & ratione. Quanquam ego hæc divino potiùs instinctu gesta esse crediderim; quoties memoriâ repeto; quàm inopinato animorum ardore, quanto consensu totus exercitus, cui magna pars populi se adjunxerat, ab omnibus penè regni provinciis unâ voce regem ipsum suorum omnium malorum authorem ad supplicium deposcebat. Quicquid erat, sive ma-

6 PRO POPULO ANGLIC.

gistratum sive populum spectes, nulli unquam excelsiore animo, & quod etiam adversarii fatentur, sedatiore, tam egregium facinus & vel heroicis ætatibus dignum aggressi sunt: quo non leges tantum & judicia, dehinc mortalibus ex æquo restituta, sed ipsam justitiam nobilitarunt, seque ipsa illustriorem dehinc, seque ipsa majorem post hoc insigne judicium reddidere. Jam tertiam prope hujus capitis paginam exantlavimus, nec tamen illa simplex narratio, quam promisit, usquam apparet. Queritur nos docere, *quoties rex moleste & odiosè regnat, impune posse regno exui: ab hac*, inquit, *doctrina inducti, si mille rebus meliorem regem habuissent, non ei vitam conservassent.* Spectate hominis acumen; nam istuc aveo ex te scire, quo pacto hoc sequitur, nisi tu nobis concesseris, nostro rege mille rebus meliorem moleste & odiosè regnare; unde in eum deductus es locum, ut hunc quem defendis, iis regibus qui moleste & odiosè regnant mille rebus deteriorem facias; id est tyrannorum omnium fortasse immanissimum. Maesti estote reges tam strenuo defensore. Nunc narrare incipit. *Torserunt eum variis crucibus. Dic quibus. De carcere in carcerem traduxerunt.* Nec injuria, quippe ex tyranno hostem bello captum. *Custoditis sapè mutatis*: ne ipsæ mutarent fidem. *Libertatis interdum spe ostensâ, interdum & restitutionis per pactionem.* Vide quàm non antea meditatam nobis fuerit, quàm non

non *tempora & modos* diu captavimus regis abdicandi. Quas res ab eo tum propemodum victore multo antè postulavimus, quæ nisi concederentur, nulla libertas, nulla salus populo speranda erat, easdem à captivo suppliciter, haud semel, immò ter & amplius petivimus; toties repulsam accepimus. Cum nulla de rege spes reliqua esset, fit Parlamenti consultum illud nobile, nequa deinceps ad regem postulata mitterentur; non ex quo is tyrannus esse, sed ex quo insanabilis esse cœpit. Postea tamen quidam ex Senatorum numero nova sibi consilia capientes, & idoneum tempus nacti, conditiones iterum regi ferendas decernunt; pari sanè scelere atque dementiâ ac Romanus olim Senatus, reclamante Marco Tullio & cum eo bonis omnibus, legatos decrevit ad Antonium: pari etiam eventu, nisi Deo immortalis visum aliter fuisset, illos in servitutem tradere, nos in libertatem vindicare. Nam cum rex nihilo plus quam antea concessisset, quod ad firmam pacem & compositionem revera spectaret, illi tamen satisfactum sibi à Rege esse statuunt. Pars itaque sanior, cum se remque Publicam prodideret, fidem fortissimi, & semper reipub. fidelissimi exercitus implorat. In quo mihi quidem hoc solum occurrit quod nolim dicere, nostras legiones rectiora sensisse quam patres conscripros: & salutem reipub. armis attulisse, quam illi suis suffragiis propè damnaverant.

8 PRO POPULO ANGLIC.

ta deinde flebiliter narrat, verùm tam inscitè, ut luctum emendicare, non commovere videatur. Dolet, quòd eo modo, quo nullus unquam, rex supplicium capitis passus sit: cùm sæpiùs affirmaverit, nullum unquam regem supplicium capitis omnino esse passum. Tùne, fatue, modum cum modo conferre soles, ubi factum cum facto quod conferas non habes? *Supplicium*, inquit, *capitis passus est, ut latro, ut sicarius, ut parricida, ut proditor, ut tyrannus.* Hoccine est regem defendere, an sententiam de rege ferre, eà sanè quæ à nobis lata est, multò severiorem? quis te tam subitò pellexit ut nobiscum pronuntiares? Queritur *personatos carnifices regi caput amputasse.* Quid hoc homine facias? questus est suprà *de parricidio in persona regis admissò*, nunc in persona carnificis admissum queritur. Quid reliqua percurram, partim falsissima, partim frivola *de pugnis & calcibus militum gregariorum, & licentiâ spectandi cadaveris quatuor solidis taxatâ*, quæ frigidissimi literatoris inscitiam & pusillitatem animi clamitant; legentem certè neminem pilo tristiores reddere possunt: satius mehercule fuisset Carolo filio, quemvis ex eo balatronum grege conduxisse, qui ad coronam in triviis elegidia cantant, quàm oratorem hunc, luctificabilem dicam, an perridiculum deplorando patris infortunio adhibuisse; tam insipidum & insulsum, ut ne ex lacrymis quidem ejus mica salis exiguißima possit exprimi.

mi. Narrare jam desuit; & quid deinde agat, dictu sanè difficile est; adeò lutulentus & enormis fluit; nunc fremit, nunc oscitat, nullum quidlibet garriendi modum sibi statuit, vel decies eadem repetendi, quæ ne semel quidem dicta non fordescerent. Et certè nescio, an blateronis cuiuspiam extemporales quælibet nugæ, quas ille uno pede stans versiculis fortè effuderit, non digniores multo sint quæ chartâ illinantur; adeò indignissimas esse reor quibus seriò respondeatur. Prætereo quòd regem *religionis protectorem* laudat, qui ecclesiæ bellum intulit, ut episcopos religionis hostes & tyrannos in ecclesia retineret. *Puritatem autem religionis* qui potuit is còservare, ab impurissimis episcoporum traditionibus & cæremoniis ipse sub jugū missus? *Sectarum* verò, quibus tu *sacrilegos suos cœtus tenendi licentiam* ais dari, quam ipsa Hollandia nō dat, errores velim enumeres: interim nemo te magis sacrilegus, qui perpetuò maledicēdi pessimam omniū licentiam tibi sumis, *Non poterant gravius rē imp. ledere quàm ejus dominum tollendo.* Disce verna, disce mastigia, nisi dominum tollis, tollis rempublicam: privata res est, non publica quæ dominum habet. *At pastores facinus eorum abominantes cum summa injustitia persequuntur.* Pastores illos nequis fortè nesciat quales sint, breviter dicam; idem sunt qui regi resistendum armis esse, & verbo & scriptis docuerunt; qui omnes tanquam Merozum indefinenter execrari

non destiterunt, quotquot huic bello aut arma, aut pecuniam, aut vires non suppeditassent; quod illi non contra regem, sed contra tyrannum Saule quovis aut Achabo, immo Nerone ipso Neroniorem susceptum esse in concionibus sacris vaticinabantur. Sublatis episcopis & sacerdotibus quos Pluralistarum & non residentium nomine infectari vehementissimè solebant, in eorum amplissima sacerdotia, hic bina, ille trina, quàm ocysimè irruebant: unde suos greges quàm turpiter negligant pastores isti meritò egregii nemo non videt: nullus pudor, nulla numinis reverentia dementes cupiditate & furiosos cohibere potuit, donec pessimo ecclesiæ publico eadem ipsi infamiâ flagrarent, quam paulò antè sacerdotibus inusserant. Nunc quòd avaritia eorum nondum satiata est, quòd, inquires ambitione animus turbas concire, pacem odisse consuevit, in Magistratus qui nunc sunt, id quod priùs in regem fecerant, seditiosè concionari non desinunt; regem scilicet pium crudeliter sublatum; quem modò ipsi diris omnibus devotum, omni autoritate regiâ spoliandum, & bello sacro persequendum, in manus Parlamento, quasi divinitus, tradiderant; sectas scilicet non extirpari, quod certè à magistratibus postulare perabsurdum est, qui avaritiam & ambitionem, quæ duæ in ecclesia hæretes perniciosissimæ sunt, ex ipsorum ordine pastorum ac tribu, nullo adhuc modo aut ratione
extirpare

extirpare valuerunt. Quas illi sectas apud nos infectantur, obscuras esse scio, quas ipsi sequuntur, famosas, & ecclesiæ Dei longè periculosiores; quarum principes Simon ille Magus & Diotrephes fuere. Hos tamen, nequissimi cum sint, adeò non persequimur, ut factiosus, & res novas quotidie molientibus nimium indulgeamus. Offendit jam te Gallum & errabundum, quod Angli suis *molossis*, quæ tua canina facundia est, *ferociores*, nullam *legitimi successoris & heredis* regni, nullam *natu minimi*, nullam *regina Bohemia* rationem habuerint. Tute respondebis tibi, non ego. *Vbi reipub. forma mutatur ex monarchia in aliam, non datur successio inter differentis regiminis curatores.* Apparat de primatu. *Minima*, inquis, *regni unius pars* hæc omnia *per tria regna* effecit: & digni quidem, si hoc verum esset, quibus in cæteros imperium sit, viris in fœminas. *Isti sunt qui regimen regni antiquum in alium qui à pluribus tyrannis teneatur, mutare præsumpserunt*; rectè quidem illi & feliciter, quos tu reprehendere non potes, quin simul fœdissimè barbarus & solæcus sis, non moribus solum, sed syntaxi etiam, grammaticorum opprobrium. *Angli maculam hanc nunquam deleverint.* Immò tu, licet omnium literatorum litura ipse sis, & verè macula, Anglorum tamen famam & sempiternam gloriam nunquam valueris commaculare. Qui tantà animi magnitudine, quantà omni memoriâ vix audita est, non

12 PRO POPULO ANGLIC.

hostes tantum armatos, sed hostiles intus, id est
superstitiosas vulgi opiniones eluctati atq; su-
pergressi, Liberatorum cognomen posthac per
omnes gentes in commune sibi pepererunt: po-
pulariter id ausi, quod apud alias nationes he-
roice tantum virtutis esse existimatur. *Reforma-
ti & antiqui Christiani* quid hac in parte fece-
rint, aut facturi essent, tum respondebimus, cum
de jure tecum suo loco agetur; ne tuo vitio la-
boremus, qui garrones omnes & Bartos loqua-
citate vincis. Quæris quid sis in nostra causâ *Ie-
suitis* responsurus. Tuas res age transfuga, pude-
at te facinorum tuorum, quando ecclesiam tuâ
puder; qui primatum Papæ, & episcopos tam
jactanter modò & ferociter adortus, nunc epis-
coporum assecla factus es. Fateris aliquos *reforma-
torum*, quos non nominas (ego tamen nomi-
nabo quoniam tu eos *Iesuitis* longè peiores esse ais,
Lutherum nempe, Zuinglium, Calvinum, Bu-
cerum, Paræum cum aliis multis) docuisse, *amo-
vendum esse tyrannum: quis autem sit tyrannus
ad judicium sapientium & doctorum se retulisse.*
*Isti vero qui? an sapientes, an docti, an virtute nobi-
les an nobilitate illustres.* Liceat, quæso, populo,
qui servitutis jugum in cervicibus grave sentit,
tam sapienti esse, tam docto, tamque nobili, ut
sciat quid tyranno suo faciendum sit, etiamsi
neque exteros, neque grammaticos sciscitatum
mittat. Tyrannum autem fuisse hunc non An-
glia solum & Scotia Parlamenta cum verbis tui
factis

factis disertissimis declaraverunt, sed totus fere utriusq; regni populus assentitus est; donec episcoporum technis & fraudibus in duas postea factiones discessit. Quid si Deus, quemadmodum eos qui lucis euangelicæ participes fiant, ita eos qui decreta ejus in reges hujus mundi potentissimos exequantur, non multos sapientes aut doctos, non multos potentes, non multos nobiles esse voluit? ut per eos qui non sunt aboleret eos qui sunt, ut ne gloriatur caro coram eo. Tu quis es qui oblatras? an doctus? qui spicilegia, qui lexica & glossaria ad senectutem usq; trivisse potiùs videris, quàm authores bonos cum judicio aut fructu perlegisse? unde nil præter codices, & varias lectiones, & luxatum & mendosum, crepas; doctrinæ solidioris ne guttulam quidem hausisse te ostendis. An tu sapiens? qui de minutiis minutissimis rixari & mendicorum bella gerere soles, qui nunc astronomis, nunc medicis in sua arte credendis imperitus ipse & rudis convitia dicis; qui, si quis vocolæ unius aut literulæ in exemplari quovis abs te restitutæ gloriolam præripere conaretur, igni & aquâ, si posses, illi interdiceres? Et tamen stomacharis, & tamen ringeris, quòd omnes te Grammaticum appellant. Hamon dum nuper regis hujus Sacellanum imprimis dilectissimum in libro quodam nugatorio nebulonem palàm appellas, quod is te grammaticum appellavisset: idem, credo, esses ipsi regi convitium facturus, & defensionem hanc to-

14 PRO POPULO ANGLIC.

tam retractaturus, si Sacellani sui de te iudicium approbâsse audivisses. Jam vide quàm te Anglorum unus, quos tu *fanaticos, indoctos, obscuros, improbos* vocitare audes, contemnam & ludibrio habeam (nam nationem ipsam Anglicanam de te quicquam publicè cogitare curculiunculo, indignissimum esset) qui fursùm, deorsùm, quoquoversùm versatus & volutatus, nihil nisi grammaticus es: immo ac si Deo cuilibet votum ipso Mida stultius nuncupâsses, quicquid attrectas, nisi cùm solœcismos facis, Grammatica est. Quisquis igitur *de face illa plebis*, quam tu exagitas, (illos enim verè optimates nostros, quorum sapientiam, virtutem, & nobilitatem facta inclyta satis testantur, non sic dehonestabo, ut te illis, aut tibi illos componere velim) quisquis, inquam, de face illâ plebis hoc tantummodò sibi persuaserit, non esse se regibus natum, sed Deo & patriæ, multò sanè te doctior, multò sapientior, multo probior, & ad omnem vitam utilior existimandus erit. Nam doctus ille sine literis, tu literatus sine doctrina; qui tot linguas calles, tot volumina percurris, tot scribis, & tamen pecuses.

CAP. II.



Quod argumentum pro se *indubitatum* esse, superiore capite perorans dixerat Salmasius, *rem ita se habere ut creditur, cum omnes unanimiter idem de ea sentiant*; quod tamen is de facto falsissimè affirmabat, id ego nunc, de jure regio disceptaturus, potero in ipsum verissimè affirmare. Cum enim regem definiat, *cujus suprema est in regno potestas, nulli alii nisi Deo obnoxia, cui quodlibet licet, qui legibus solutus est*, quidem id definiri dicendum est, quod infinitum in terris ponitur, evincam ego contrà, non meis tantùm, sed vel ipsius testimonijs, & rationibus, nullam gentem aut populum, qui quidem ullo numero sit, nam omnem penetrare barbariem necesse non est; nullam, inquam, gentem istiusmodi auctoritatem aut potestatem regi concessisse, *ut legibus solutus esset, ut quodlibet liceret, ut omnes judicatus, à nemine judicaretur*; nec verò ullum cujusvis gentis tam servili ingenio existisse puto, præter unum Salmasium, qui tyrannorum immania quæque flagitia regum jura esse asseveravit. Eorum plerique apud nos, qui regi maximè favebant, ab hac tam turpi sententiâ semper abhorruere, quin etiam ipse, nondum pretio corruptus, his de rebus longè aliter sensitse alijs

pridem scriptis facilè deprehenditur. Adeò ut hæc non ab homine libero in libera civitate, nedum in Repub. nobilissimâ, & Batavorum Academia celeberrimâ, sed in ergastulo quovis aut catastrâ, tam servili vernilitate scripta esse videantur. Etenim, si quicquid regi liber, id jure regio licitum erit, quod teterrimus ille Antoninus Caracalla ab Juliâ novercâ per incestum edoctus non statim ausus est credere, nemo profectò est aut unquam fuit, qui tyrannus dici debeat. Cùm enim divina omnia atque humana jura violavit, nihilo tamen minùs rex, jure regio insons erit. Quid enim peccavit homo æquissimus? jure suo usus est in suos. Nihil rex tam horrendum, tam crudele, tamque furiosum committere in suos potest, quod præter jus regium fieri quispiam possit queri aut expostulare. Hoc tu *jus regium à jure gentium, vel potius naturali originem habere* statuis bellua? Quid enim hominem te dicam, qui in omne hominum genus, adeò iniquus & inhumanus es; quique omnem gentem humanam Deo simillimam sic deprimerè atque projicere conaris, ut quos nunc superstitio, nunc scelus aut ignavia quorundam, aut denique perfidia tam feros atq; immites dominos gentibus imposuit, eos à natura matre mitissimâ comparatos atque impositos esse doceas. Quâ tu nefariâ doctrinâ multo jam ferociores factos, non solum ad proterendos omnes mortales, & post-
hac

hac miseriorem in modum conculcandos immittis, sed jure naturali, jure regio, ipsis etiam populi legibus in populum armare, quo nihil simul stultius & sceleratius esse potest, contendis. Dignus profectò, qui contra atq; olim Dionysius ex grammatico tyrannus ipse sis; nò quo tibi in aliumquævis detur illa regia licentia malè faciendi, sed illa altera malè pereundi: quâ solâ, ut inclusus ille Capreis Tiberius, à temetipso perditus quotidie te sentias perire. Verùm jus illud regium paulò accuratiùs quale sit consideremus. *Sic Oriens totus*, inquis, *judicavit, sic Occidens*. Non reponam tibi quod Aristoteles & Marcus Cicero, authores, si qui alii, cordatissimi, ille in Politicis, hic in oratione de Provinciis scripsit, Gentes Asiaticas facilè servitutem pati, Judæos autem & Syros servituti natos fuisse: fateor paucos ferè libertatem velle, aut eâ posse uti, solos nempe sapientes, & magnanimos; pars longè maxima justos dominos mavult, sed tamen justos; injustos & intolerabiles ferendi neque Deus unquam universo generi humano tam infensus fuit, neq; ullus unquam populus tam ab omni spe & consilio derelictus ut necessitatem hanc atque legem omnium durissimam in se atque in suos liberos ultro statueret. Profers imprimis *Verba Regis in Ecclesiaste sapientiâ clari*. Nos itaque ad legem Dei provocamus, de rege posteriùs videbimus; cujus exinde sententiam rectiùs intelligemus. Audiatur ipse Deus, Deut. 17. *Cùm ingre-*

ſus fueris in terram, quam Iehova Deus dat tibi, & dices ſtatuam ſuper me Regem ſicut omnes gentes quæ ſunt circa me: Quod ego omnes velim etiam atque etiam animadvertant, teſte hîc ipſo Deo, penes populos omnes ac nationes arbitrium ſemper fuiſſe, vel eâ, quæ placeret, formâ reipub. utendi, vel hanc in aliam mutandi: de Hebræis diſertè hoc dicit Deus, de reliquis haud abnuir; deinde formam reipub. monarchiâ perfectiorem, ut ſunt res humanæ, ſuique populi magis ex uſu deo viſam eſſe: cùm hanc ipſe formam inſtituerit; monarchiam non niſi ſerò petentibus, idque ægrè concederet, Sin regem planè vellent, ut oſtenderet Deus id ſe liberum Populo reliquiſſe, ab uno an à pluribus reſpub. adminiſtraretur, modò juſtè, regi etiam futuro leges conſtituit, quibus cautum erat, ut ne multiplicet ſibi equos, ne uxores, ne divitias; ut intelligeret nihil ſibi in alios licere, qui nihil de ſe ſtatueret extra legem potuit. Juſſus itaque eſt omnia legis illius præcepta, etiam ſuâ manu perſcribere; perſcripta obſervare, ne efferatur animus ejus præ fratribus ſuis. Ex quo perſpicuum eſt, regem æquè ac populum iſtis legibus aſtriçtum fuiſſe. In hanc ſerme ſententiâ ſcripſit Joſephus, legum ſuæ gentis interpres idoneus, in ſuâ reipub. verſatiſſimus, mille aliis tenebrionibus Rabbiniſ anteponendus. Antiquitat. lib. 4. Αεὶς τοῦ βασιλέως μὴ ἐν τοῦ βασιλέως &c. Optimum eſt, inquit, optimatum regimen;

regimen; nec vos alium reipub. statum requiratis; satis enim est Deum habere praesidem. Attamen si tanta vos regis cupido ceperit, plus legibus & Deo tribuat is, quàm sua sapientia; prohibeatur autem, si potentior fieri studet, quàm rebus vestris expedit. Hæc & plura Josephus in istum Deuteronomii locum. Alter Philo Judæus, gravis author, Josephi coætaneus, legis Mosaicæ studiosissimus, in quam universam diffusâ commentatione scripsit, cum in libro de creatione Principis hoc caput legis interpretatur, non alio pacto regem legibus solvit, atque hostis quilibet solutus legibus dici possit, τὰς ἐνὶ λύμῃ καὶ ζημίᾳ τῶ ἐπὶ τοῦ ἐχθροῦ &c. qui, inquit, ad perniciem & detrimentum populi magnam sibi acquirunt potentiam, non reges sed hostes appellandi sunt; ea facientes, quæ hostes nullâ pace reconciliandi faciunt; nam qui per speciem gubernandi faciunt injuriam, apertis hostibus peiores sunt; hos enim facile est propulsare, illorum autem malitia haud facile detegitur. Detecit igitur quid obstat quo minùs hostium loco habendi sint? Sic libro secundo Allegoriarum Legis, rex & tyrannus contraria sunt; & deinde, rex non imperat tantùm, sed paret. Verà sunt ista, dicet aliquis; regem oportet quidem leges, ut qui maximè observare; verùm si secùs fecerit, quâ lege puniendus? eadem, inquam, lege quâ cæteri; exceptiones enim nullas reperio. Sed nec de Sacerdotibus, sed nec de infimis quidem

dem magistratibus puniendis lex ulla scribitur; qui omnes, cum de iis puniendis nulla lex scripta sit, pari certè jure & ratione possent impunitatem scelerum omnium sibi vindicare; quam tamen neque eorum quisquam vendicavit, neque ullum iis arbitror idcirco esse daturum. Hactenus ex ipsa Dei lege didicimus regem legibus obtemperare debuisse; nec se præ cæteris efferre, qui etiam fratres ejus sunt. Nunc an quid aliud Ecclesiastes moneat videamus. Cap. 8. ver. 1. &c. *Mandatum regis observa; vel propter juramentum Dei, ne perturbatè à facie ejus abito, ne persistito in re malâ, nam quicquid volet faciet. Vbi verbum regis, ibi dominatio, & quis dicat ei quid facis?* Satis constat Ecclesiastem hoc in loco non synedrio magno, non senatui, sed privato cuique præcepta dare. Juber mandata sua observare, vel propter juramentum Dei; at quis jurat regi, nisi rex vicissim in leges divinas atque patrias juratus sit? Sic Reubenitæ & Gaditæ obedientiam suam Jehosux pollicentur, Jos. 1. *Vt dicto audientes Mose fuimus, ita erimus tibi, modò ut Deus tecum sit, quemadmodum fuit cum Mose.* Conditionem vides expressam: Alioquin ipsum audi Ecclesiastem, cap. 9. *Verba sapientum submissa potius audienda esse, quam clamorem dominantis inter stolidos.* Quid porro monet? *Ne persistito in re malâ, nam quicquid volet faciet,* in malos nimirum faciet autoritate legum armatus, nam

nam leniter, aut severè agere, prout volet, potest. Nihil hinc tyrannicum sonat, nihil quod vir bonus extimescat. *Vbi verbum regis ibi dominatio, & quis dicat ei quid facis?* Et tamen legimus qui regi dixerit non solùm quid fecisti, sed etiam stultè fecisti. Sam. 13. At Samuel extraordinarius. Tuum tibi regero, licet infrà dictum pag. 49. *quid, inquis, extraordinarium in Saule & Davide?* itidem ego, quid, inquam, in Samuele? Propheta fuit: sunt & illi hodie, qui ejus exemplo faciunt; ex voluntate enim Dei vel *expressâ* vel *tacitâ* agunt: quod etiam ipse infrà concedis, pag. 50. Prudenter igitur Ecclesiastes hoc in loco monet privatos, ne cum rege contendant: nam etiam cum divite, cum potenti quovis, ut plurimùm, damnosa contentio est: Quid ergò? an optimates, an omnes reliqui magistratus, an populus universus quoties delirare libet regi, ne hiscere quidem audebunt? an stolido, impio, furenti, bonis omnibus perniciem machinanti non obstabunt, non obviam ibunt, ne divina omnia atque humana pervertere occupet, ne rapinis, ne incendiis, ne cædibus per omnes regni fines grassetur ira *legibus solutus, ut quodlibet liceat?* O de Cappadocis eques catastis! quem omnis libera natio (si unquam post hoc in natione libere pedem ponere audebīs) aut in ultimas terras veluti portentum exportandum ejicere, aut servitutis candidatū dedere in pistrinum debebit, eâ lege atq; omine, ut si te inde exemerit, ipsa sub

quo tyranno, eoque stultissimo, pro te molat. Quid enim poterit dici, aut ab aliis dictum peti tam truculentum, aut ridiculum, quod in te non cadat? Perge modò: *Israëlita regem à Deo petentes eodem jure se ab eo gubernari velle dixerunt, quo omnes alia nationes, qua hoc regimine uterentur. At Orientis reges summo jure, & potestate non circumscriptâ regnabant: Teste Virgilio.*

— *Regem non sic Ægyptus & ingens*

Lydia, nec populi Parthorum, & Medus Hydaspes

Observant. — — —

Primum quid nostrâ refert qualem sibi regem Israëlitæ voluerint, præfertim Deo irato, non solum quodd regem vellent ad exemplum gentium, & non suæ legis, sed planè quodd vellent regem? Deinde regem injustum, aut legibus solutum petivisse credibile non est, qui Samuëlis filios legibus obstrictos ferre non potuerunt, & ab eorum tantum avaritiâ ad regem confugerunt. Postremò quod ex Virgilio recitas, non probat reges Orientis *absolutâ potestate* regnasse; Apes enim illæ Virgilianæ, quæ vel Ægyptiis & Medis observantiores regum sint, teste tamen eodem Poëta — *Magnis agitant sub legibus ævum.* — Non ergò sub legibus omni lege solutis. At vide quàm tibi minimè velim malè; cum plerique te nebulonem esse judicent, ostendam te personam tantum nebulonis mutuam sumpsisse. In Apparatu ad

tu ad primatum Papæ doctores quosdam Tridentinos exemplo Apium usos ais, ut monarchiam Papæ probarent: ab his tu pari malitiâ hoc mutuum cepisti. Quod illis itaque respondisti cum probus esses, jam tactus nebulo tute respondebis tibi, tuâque tibi manu personam nebulonis detrahes. *Apium respub. est; atque ita Physici appellant: Regem habent, sed innocuum: ductor est potius quam tyrannus, non verberat, non vellicat, non necat apes subditas:* Minimè igitur mirum, si ita observant. Istas mehercule apes malâ ave tibi tactio erat; Tridentinæ enim licet sint, fucum te esse indicant. Aristoteles autem, rerum politicarum scriptor diligentissimus, monarchiæ genus Asiaticæ, quod & barbaricum vocat, *κτ νόμον*, id est, secundum legem fuisse affirmat. Pol. 3, immo cum monarchiæ quinque species enumeret, quatuor secundum legem, & suffragante populo fuisse scribit, tyrannicas autem, quod iis tanta potestas, volente licet populo, data erat; regnum verò Laconicum maximè regnum videri, quod non omnia penes regem erant. Quinta, quam is *παμβασιλείαν* vocat, & ad quam solam id refert, quod tu regum omnium jus esse scribis, ut ad libitum regnent, ubinam gentium, aut quo tempore unquam obtinuerit non dicit: nec aliam ob causam fecisse mentionem ejus videtur, quàm ut absurdam, injustam, & maximè tyrannicam esse demonstraret, Samuelem ais, cum

cùm eos ab eligendo rege deterreret, *jus illis regium* exposuisse. Unde haustum, à lege Dei? at illa lex *jus regium*, ut vidimus, longè aliud exhibuit: an ab ipso Deo per Samuëlem loquente? at improbavit, vituperavit, vitio dedit: non igitur *jus regium* divinitus datum, sed morem regnandi pravissimum, superbiâ regum & dominandi libidine arreptum exposuit propheta; nec quid debebant reges, sed quid volebant facere; rationem enim regis populo indicavit, sicut antea rationem sacerdotum Eliadarum eodem verbo (quod tu p. 33. Hebraïco etiam solœcismo מִשְׁפַּחָה vocas) suprâ indicaverat. C. 2. *ratio sacerdotum istorum cum populo hac erat*, v. 13. impia videlicet, odiosa, & tyrannica: ratio itaque illa nequaquam *jus* erat sed injuria. Sic etiam patres antiqui hunc locum exposuerunt; unus mihi erit multorum, instar, Sulpitius Severus, Hieronymi æqualis, eique charus, & Augustini judicio vir doctriâ & sapientiâ pollens. Is in historia sacra Samuelem ait dominationem regiam, & superba imperia populo exponere. Sanè *jus regium* non est dominatio & superbia; sed *jus* atque imperium, teste Sallustio, conservandæ libertatis atque augendæ reipub. causâ datum, in superbiam dominationemque se convertit. Idem Theologi omnes Orthodoxi, idem Jurisconsulti, idem rabbini plerique, ut ex Sichardo didicisse potuisti, de explicatione hujus loci sentiunt; ne Rabbiorum enim quisquam

quam jus regis absolutum isto loco tractari dixit. Ipse infra cap. 5. pag. 106. *non Alexandrium Clementem solum, sed omnes hic quereris errare*, te unum ex omnibus rem acu tetigisse: Jam verò cujus vel impudentiæ est vel fociordix, contra omnes, præsertim orthodoxos, mores regum ab ipso Deo damnatissimos in jus regium convertere, & honestâ juris præscriptione defendere: cum jus tamen illud in rapinis, injuriis, violentiis, contumeliis sæpius confitere fatearis. An quisquam sic *sui juris* unquam fuit, ut rapere, agere, prosternere, permiscere omnia sibi liceret? an Larini, quod affirmas, hæc *suo jure ab aliquo fieri unquam dixerunt*? Dixerat apud Sallustium C. Memmius tribunus Plebis, in superbiam & impunita flagitia nobilitatis invecus, *impune qualibet facere, id est, regem esse*; Arrisit hoc tibi, & statim in lucro ponis, ne quicquam sanè, si paulum evigilaveris. An jus hic regium asseruit? annon plebis ignaviam potius increpuit, quæ nobiles impunè dominari fineret, eosque mores regios jam rursus pateretur, quos jure suo majores illorum cum rege ipso finibus expulerant. Marcum Tullium saltem consulisses; is te & Sallustium, & Samuelem etiam rectius interpretari docuisset. Qui pro C. Rabirio *nemo*, inquit, *nostrum ignorat consuetudinem regiam; regum sunt hæc imperia, animadvertite & dicto pare*; aliâq; hujusmodi ex poetis ibidem recitat, quæ non jus, sed *consuetudinem*

suetudinem regiam vocat, eaque legere & spectare nos ait debere, non *delectemur solum, sed ut cavere etiam effugere discamus*. Vides quam te malè mulctaverit Sallustius, quem tyrannis inimicissimum, juris tyrannici patronum attulisse te putabas. Nutare, mihi crede, & suum sibi occasum accelerare jus regium videtur, dum ruentis in modum tenuissima quæque sic arripit, seque sustinere iis testibus atque exemplis conatur, quæ tardiùs fortasse alioqui ruiturum vehementiùs proturbant. *Summum*, inquis, *jus, summa injuria est, id in regibus maximè locum habet; qui cùm summo jure utuntur, ea faciunt in quibus Samuel dicit jus regis esse positum*. Miserum jus; quod tu jam ad extrema perductus, nisi per summam injuriam defendere ulteriùs non potes! *Summum jus* id dicitur, cùm quis formulas legum sectatur, singulis penè literis immoratur, æquitatem non servat; aut scriptum jus calidè nimis & malitiosè interpretatur, ex quo illud proverbium Cicero ortum esse ait. Cùm autem jus omne de fonte justitiæ manare certum sit, impius sis necesse est, qui *regem injustum esse, iniquum, violentum, raptorem esse, & quales esse solebant qui pessimi erant, jus regis esse dicis, idque prophetam populo insinuasse*. Quod enim jus summum aut remissum, scriptum aut non scriptum ad maleficia perpetranda esse potest? Id ne tibi de aliis concedere, de rege pernegare in mentem veniat, habeo quem

quem tibi opponam, & puto regem, qui istiusmodi jus regum & sibi & Deo invisum esse profiteretur: Psal. 94. *an consociaretur tibi solium ærumnarum, formantis molestiam per statutum.* Noli igitur Deo hanc atrocissimam injuriam facere, quasi is regum pravitates & nefaria facinora jus esse regum doceret, qui etiam hoc nomine societatem cum improbis regibus se detestari docet, quod molestiam & ærumnas omnes populo juris regii titulo creare soleant. Noli Prophetam Dei falsò insimulare; quem, tu dum juris regii isto loco doctorem habere putas, non verum nobis affers Samuelem; sed, ut venefica illa, inanem umbram evocas; quamvis & illum ab inferis Samuelem non adeò mendacem fuisse credam, quin illud quod tu jus regium vocas, impotentiam potius tyrannicam dicturus fuisset. Jus datum sceleri legimus, tuncque *licentia jure concessa reges minus bonos uti consueveresse* ais. At jus hoc ad perniciem humani generis abs te introductum non esse, à Deo datum probavimus; restat, ut sit à diabolo; quod infra clariùs liquebit, *Hac*, inquis, *licentia dat posse, si velis*; & authorem hujus juris habere Ciceronem præ te fers. Nunquam ægrè facio ut testimonia tua recitem, tuis enim ipse testibus conficere te soles. Audi igitur verba Ciceronis in 4ta. Philip, *Qua causa justior est belli gerendi, quàm servitutis depulsio? in qua etiamsi non sit molestus dominus, tamen est miserrimum posse*

6

si velit. posse vi scilicet; nam de jure si loqueretur, repugnantia diceret, & ex justa belli causa injustam faceret. Non est igitur jus regium quod tu describis, sed injuria, sed vis, & violentia regum. Transis ab regia licentiâ ad privatam: *licet privato mentiri, licet ingrato esse.* Licet & regibus; quid inde efficis? licebit ergo regibus impunè rapere, occidere, stuprare? Quid interest ad injuriæ gravitatem rex an latro, an aliunde hostis populum occidat, diripiat, in servitutem agat, eodem certè jure, & hunc & illum humanæ societatis inimicum, & pestem propulsare, atquè ulcisci debemus; immo regem eò justius quòd is tot beneficiis & honoribus nostris auctus commissam sibi sub juramento publicam salutem prodat. Concedis postremò *leges dari à Mose secundum quas rex ille quandoque eligendus imperare debebat, quamvis diversas ab illo jure quod Samuel proposuit.* Quod cum assertione tua dupliciter pugnat; cum enim regem legibus omnino solutum posueris, nunc obstrictum dicis: dein jus juri contrarium ponis Moïsi & Samuëlis, quod est absurdum. At *servi*, inquit Propheta, *vos eritis regi.* Ut servos fuisse non abnuerim, non jure tamen regio servi fuerunt, sed regum fortasse plurimorum usurpatione & injustitiâ. Illam enim petitionem obstinatam non jure regio, sed suo merito in pœnam illis cessuram propheta præmonuit. At verò si regi legibus soluto quicquid liber,

bet licuerit, profectò rex longè plus quàm dominus erit, populus infra omnium servorum infimos plus quàm infimus. Servus enim vel alienigena legem Dei vindicem injuriosum in dominum habebat; populus universus, libera nimirum gens, vindicem in terris neminem, nullam legem habebit, quò læsus, afflictus & spoliatus confugiat; a servitute regum Ægyptiorum ideo liberatus, ut uni ex fratribus suis durior si libeat servitute opprimendus traderetur. Quod cum neque divinæ legi nec rationi consentaneum sit, dubium nemini esse potest, quin propheta mores enarraverit, nos jus regum, neque mores prorsus regum omnium, sed plurimorum. Descendis ad rabbinos, duosq; adducis eàdam, quàm priùs, infelicitate: nam caput illud de rege in quo R. Josès jus regium aiebat contineri, Deuteronomii esse, non Samuëlis manifestum est. Samuëlis enim ad terrorem duntaxat populo injiciendum pertinere rectissime quidem & contra te dixit R. Judas. Perniciosum enim est id jus nominari atque doceri quod injustitia planè est, nisi abusive forsitan jus nominetur. Quo etiam pertinet versus 18. *Et exclamabitis die illa propter regem vestrum sed non exaudiet vos Iehovah*; obstinatos nimirum ista pœnamanebat, qui regem nolente Deo dari sibi voluerunt. Quanquam ista verba non prohibent, quo minus & vota & quidvis aliud tentare potuerint. Si enim clamare ad Deum contra regem populo licebat, licebat procul

C

dubio

dubio omnem etiam aliam inire rationem honestam sese à tyrannide expediendi. Quis enim quovis malo cum premitur, sic ad deum clamat ut cætera omnia quæ officii sunt sui negligat, ad otiosas tantùm preces devolutus? Verum utcunque sit, quid hoc ad jus regium, quid ad jus nostrum? qui regem nec invito Deo unquam petivimus, nec ipso dante accepimus, sed jure gentium usi, nec jubente Deo nec verante, nostris legibus constituimus. Quæ cum ità se habeant, non video quamobrem nobis laudi atque virtutitribuendum non sit, regem abjecisse; quandoquidem Israëlitis crimini est datum regem petisse. Quod etiam res ipsa comprobavit; nos enim qui regem, cum haberemus, deprecari sumus, tandem exauditos Deus liberavit; illos, qui cum non haberent, à Deo efflagitabant, servire jussit; donec Babylo-
ne redeuntes ad pristinum reipub. statum reversi sunt. Ludum Talmudicum deinde aperis; quin & hoc sinistro augurio tentatum. Dum enim regem non judicari cupis ostendere, ostendis ex Codice Sanhedrim *regem nec judicari nec judicare*; quod cum petitione istius populi pugnat, qui ideo regem petebant, ut judicaret: id frustrà refarcire studes; intelligi nempe id de regibus Post-babylonicis debere. At ecce tibi Malmonides, qui *hanc inter reges Israëlitas & Iudaos differentiam ponit: Davidis enim posteros judicare & judicari*; Israëlitis neutrum concedit.

cedit. Occurris tibi, tecum enim litigas, aut cum Rabbiniſ tuiſ; meam rem agiſ. Hoc *primis in regibus locum non habuiſſe*, quia dictum eſt v. 17. *vos eritiſ ei ſervi*: conſuetudine ſcilicet, non jure; aut ſi jure pœnas petendi regis, quamvis non ſub hoc fortè vel ſub illo, at ſub pleriſque luebant, quod nos non attingit. Tibi verò adverſario opus non eſt, adeò ſemper tibi adverſariſ. Narras enim pro me, ut primò Ariſtobulus, poſt Jannæus cognomento Alexander, juſ illud regium, non à ſynedrio juris cuſtode, & interprete acceperint, ſed paulariſ ſibi aſſumpſerint, & ſenatu renitente uſurpaverint: quorum in gratiam bella illa fabula de primoribuſ ſynedrii à *Gabriele exanimatiſ* adinventata eſt, juſque hoc magnificum, quo niti maximè videriſ, *regem ſcilicet non judicari*, ex illa fabula pluſquā anili, ut pote rabbinicā, conflatum eſſe fateriſ. Reges autem Hebræorum *judicari poſſe*, atque etiam ad verbera damnari fuſè docet Sichardus ex libriſ Rabbiniſ, cui tu hæc omnia debes, & tamen obſtrepere non erubeſciſ. Quin immo legimus ipſum Saulem cum filio Jonathanis ſortis judicium atq; etiam capitale ſubiſſe, ſuóque ipſum edicto peruiſſe. Uzziaſ quoque à ſacerdotibuſ templo deturbatuſ, lepræ judicio, tanquam unuſ è populo, ſe ſubmiſit, réxq; eſſe deſiit. Quid ſi templo excedere, quid ſi magiſtratu abire, & ſeoriſ ſim habitare noluiſſet juſ illud regium legibuſ ſolutuſ ſibi aſſeruiſſet,

set, an passuros fuisse censet Judæos, & sacerdotes templum contaminari, leges violari, populum universum contagione periclitari? In leprosum ergò regem vigeant leges, in tyrannum nihil poterunt? Ecquis tam demens, aut stultus est, ut existimet, cùm rex morbosus nè populum contagione lædat, cautum atque provisum legibus sit, si rex impius, iniquus, crudelis populum diripiat, excruciet, occidat, rempub. funditùs evertat, nullum his malis longè gravioribus remedium legibus repertum esse? Verùm *exemplum ullius regis afferri non potest, qui judicium capitis subierit in jus vocatus.* Ad illud Sichardus haud absurdè responder, perinde esse, ac si quis ad hunc modum disserter. Cæsar nunquam citatus est coram Electorè; ergò si Palatinus diem Cæsari dixerit, non teneatur Cæsar in judicio respondere. Cùm tamen doceat Bulla aurea Carolum 4^{um} se & successores suos huic cognitioni subjecisse. Quid in corrupto populi statu regibus adeò indultum fuisse miramur, ubi tot privati aut opibus suis aut gratiâ impunitatem vel gravissimorum scelerum assequuntur. Illud autem ἀνὸν & θυοῦ id est à nemine pendere, nulli mortalium rationem reddere, quod tu regiæ Majestatis maximè proprium esse ais, Aristoteles Polit. 4. c. 10. maximè tyrannicum, & in libera natione miminè ferendum esse affirmat. Tu vero Antonium tyrannum immanissimum, Romanæ reipub. everso-

rem.

rem, idoneum sanè authorem producis, non esse justum repositi a Rege factorum suorum rationem: & tamen Herodem cædis reum ad causam dicendam in Parthos proficiscens accersivit ad se Antonius: & animadversurus etiam in regem fuisse creditur, nisi rex eum auro corrupisset. Ita ab eodem fonte profluxit regis potestatis Antoniana assertio, & tua *regis defensio*. At non sine ratione, inquis, *nam reges ab alio non habent quod regnant, sed soli Deo acceptum referunt*. Dic sodes quinam? nam istiusmodi reges existisse unquam, nego. Primus enim Saul, nisi populus refragante etiam Deo regem voluisset, nunquam rex fuisset; & quamvis rex renuntiatus esset Mispæ, vixit tamen penè privatus, armentum patris secutus, donec Gilgale rex a populo secundùm creatus est. Quid David? quamvis unctus a Deo, nonne iterum unctus est ab Judæis Chebrone, deinde ab omnibus Hebræis, pacto tamen prius fœdere? 2. Sam. 5. 1. Chron. 11. fœdus autem obligat reges, & intra certos fines continet. Sedit Salomon, inquis, *super solium Domini & cunctis placuit*, 1. Paralip. 29. ergo & placuisse populo aliquid erat. Constituit Jehoiadas regem Joasum, fœdus tamen eodem tempore pepigit inter regem & populum. 2. Reg. 11. Hos reges, necnon & reliquos Davidis posteros & a Deo & a populo constitutos fateor; cæteros omnes, ubicunque gentium, a populo tantùm

constitutos esse affirmo ; tu ostende constitutos esse a Deo ; nisi eâ solum ratione quâ omnia cùm maxima tùm minima a Deo fieri & constitui dicuntur. Solium itaque Davidis peculiari quodam jure solium Jehovæ dicitur ; solium aliorum regum non alio , atque cætera omnia, Jehovæ sunt. Quod tu ex eodem capite didicisse potuisti v. 11. 12. *tua sunt omnia in cælo & in terra , tuum est, lehova, regnum , Divitia & gloria a facie tua sunt , vis & potentia , &c.* Diciturque hoc toties, non ut intumescant reges , sed ut moneantur , quamvis Deos se esse putent, Deum tamen supra se esse , cui debent omnia. Unde illa Essenorum & Poëtarum doctrina , *reges non sine Deo , & ab Iove esse* facile intelligitur ; omnes enim homines à Deo itidem sumus, Deique genus. Jus igitur hoc universum Dei, non tollit jus populi ; quo minùs omnes cæteri reges , non a Deo nominati , regnum suum soli populo acceptum referant ; cui propterea rationem reddere tenentur. Quod, quanquam Vulgus assentari regibus solet , ipsi tamen reges sive boni , ut Homericus ille Sarpedon, sive mali , ut illi apud Lyricum tyranni, agnoscunt.

Γλαῦκε τίη δὴ νῶϊ τιμήμεθα μάλιστα,
&c.

Glauce cur nos maximo honore afficimur

In Lycia , omnes autem nos tanquam Deos intuentur.

Ipsè

Ipse sibi respondet; quia virtute ceteris præ-
lucemus: quare fortiter pugnemus, inquit, ne
Lycii nobis ignaviam objiciant: quâ voce &
honores regios à populo acceptos, & bellicæ
administrationis rationem populo reddendam
esse innuit. Mali autem reges, ut metum po-
pulo incutiant, Deum imperii regii authorem
palàm prædicant: tacitis autem votis nullum
numen præter Fortunam venerantur. Juxta
illud Horatii.

*Te Dacus asper, te profugi Scytha,
Regumque matres barbarorum, &
Purpurei metuunt tyranni,
Injurioso ne pede prorsus
Stantem columnam, neu populus frequens
Ad arma cessantes, ad arma
Contitet, imperiumque frangat.*

Si ergò reges hodie per Deum regnant, etiam
populi per Deum in libertatem se vindicant,
quandoquidem omnia à Deo & per Deum fiunt.
Utrumque etiam æque testatur Scriptura, &
reges per eum regnare, & per eum solio dejici;
cùm tamen id utrumque longè sæpius à popu-
lo fieri perspiciamus, quam à Deo. Jus itaque
populi pariter ac regis, quicquid est, à Deo est.
Populus ubicunque sine Deo manifesto regem
creavit, potest eodem jure suo regem rejicere.
Tyrannum sanè tollere quàm constituere divi-
nius est; plùsque Dei cernitur in populo quo-
ties injustum abdicat regem, quàm in rege

36 PRO POPULO ANGLIC.

qui innocentem opprimit populum. Immo reges noxios Deo auctore judicat populus: hoc enim ipso honore dilectos suos decoravit Deus, Psal. 149. ut Christum regem suum laudibus celebrantes, gentium reges, quales sub evangelio sunt omnes tyranni, *vinculis coercerent, inque eos jus scriptum exercerent*, qui jure omni scripto atque legibus solutos se esse gloriantur. Ne quis tam stolidè, ne quis tam impiè credat tanti esse apud Deum reges, ferè mortalium ignavissimos, ut eorum nutu orbis terrarum totus pendeat & gubernetur; eorum ut gratia, praeque illis, divinum, ut ita dicam, hominum genus eodem quo bruta & vilissima quæque animalia loco atque numero habendum sit. Agè nunc, ne nihil enim agas, M. Aurelium, quasi tyrannis faventem, in medium profers; at satius tibi fuit Marcum Aurelium non attrigisse. Ille an Deum de principibus solum judicare dixerit nescio. Xiphilinus certè quem citas de *αὐταρχία* loquitur; *ἢ αὐταρχίας ὁ θεὸς μόνον* & *κεῖναι δύναται αὐταρχίαν* autem monarchiæ synonymum illic esse non assentior; eoque minùs quo sapius præcedentia lego; nam qui cohæreat, aut quid sibi velit aliena illa sententia subito insititia, qui legerit miretur; præsertim cùm Marcus Aurelius Imperatorum optimus, non aliter cum populo egerit, ut Capitolinus tradit, quàm est actum sub civitate liberâ; jus autem populi quin supremum tunc fuerit

fuerit nemo dubitat. Idem Thraseam, Helvidiū, Catonem, Dionem, Brutum tyrannicidas omnes, aut istam gloriam æmulantes coluisse, sibi-que reipub. formam proposuisse in qua æquis legibus, parique jure omnia administrarentur, in primo libro de vita sua proficitur: in quarto, non se ad legem, dominum esse. Agnovit etiam omnia Senatūs populique esse: nos, inquit, adeo nihil proprium habemus, ut in vestris ædibus habitemus. Hæc Xiphilinus. Tantum absuit ut quicquam jure regio sibi arrogaret. Moriens, filium suum regnaturum eā lege Romanis commendavit, si dignus esset: jus itaque illud regnandi absolutum atque fictitium, tanquam à Deo per manus traditum, illam denique; αὐτὰρ χίαν præse non tulit. *Plena* tamen *omnia* Græcorum & Latinorum monumenta esse ais: at nusquam visa: *plena* Iudeorum, & tamen addis Iudeos in plerisque regiæ potestati minùs æquos fuisse: immò Græcos & Latinos multo minùs Tyrannis æquos & reperisti & reperies; multo minus Iudeos, si liber ille Sam. in quo is, 1 Sam. 10. jus regni descripserat, existeret; quem librum Doctores Hebræorum à regibus discerptum aut cōbustum esse tradiderunt, quò impuniùs tyrannidem in suos exercerent. Circumspice jam, numquid captare possis: occurrit tibi rex David postremò torquendis, Ps. 17. *à facie tuā iudicium meum prodeat*: ergo, inquit Barnachmoni, *nullus iudic ut regem nisi Deus*. Et tamen similis veri videtur, Davidem hæc

C 5 scrip-

scripsisse, cùm à Saule vexatus, ne Jonathanis quidem iudicium, quamvis jam tum unctus à Deo, detrectabat; *si est in me iniquitas, tu me affice morte*, inquit, 1. Sam. 20. deinde ut quivis alius ab hominibus falsò accusatus, ad iudicium Dei provocat; id sequentia declarant, *tui oculi vident quæ recta sunt, cùm exploraveris cor meum*, &c. quid hoc ad iudicium regium, aut forense? Sanè jus regium illi maximè labefactant atque destruunt, qui fundamentis tam fallacibus niti, atque exædificari produnt. En tritum illud tandem, & aulicorum nostratium argumentum palmiarium. *Tibi soli peccavi*, Psal. 51. 6. quasi verò rex David in mœrore & lacrymis poenitentiam agens, sordidatus & squalidus in terra jacens, misericordiam à Deo suppliciter petens, quicquam de jure regio cogitaverit hæc loquutus; cùm se vix jure mancipii dignum esse arbitraretur. An omnem Dei populum, fratres suos usque adeò præ se contempsit, ut cædibus, adulteriis, rapinis peccare in eos non se posse censeret? absit à rege tam sancto tanta superbia, tamque sœda ignoratio vel sui vel proximi. *Tibi solum soli peccavi*, procul dubio intelligendum est, tibi præcipuè. Utcunque sit profectò verba psallentis, & sententiæ affectibus plenæ haudquaquam sunt ad jus explicandum accommodatæ, aut eò trahendæ. At *non est in jus vocatus, nec coram synedrio causam capitis dixit*. Esto; qui enim potuit id resciri, quod adeò si-

ne

ne arbitris, & secretò peractum fuit, ut per aliquot fortasse annos (cujusmodi aulæ arcana sunt) vix unus aut alter conscius fuisse videatur. 2. Sam. 12. *Tu hoc clàm fecisti.* Deinde quid si in privatis etiam puniendis cessaret synedrion? an quis inde puniendos non esse argumentabitur? Sed ratio obscura non est; ipse se condemnaverat. v. 5. *reus capitis vir ille qui fecit hoc;* cui statim subjecit propheta, *tu vir ille es;* propheta etiam judicio capitis reus. Verruntamen Deus pro suo jure atque in Davidem eximiâ clementiâ, & peccato absolvit regem, & ipsâ mortis sententiâ, quam is in semetipsum pronuntiaverat. v. 13. *non es moriturus.* Nunc in advocatum nescio quem sanguinarium debaccharis, & in eo totus es ut perorationem ejus refellas, de qua ipse viderit; ego quod propositum mihi est, id ago ut quàm paucissimis absolvam. Quædam tamen præterire non possum; primùm, insignes repugnantias tuas: qui p. 30. hæc habes. *Israëlitæ non deprecantur injustum regem, violentum, raptorem, & quales esse solerent qui pessimi.* At p. 42. Advocatum vellicas quòd Israëlitas tyrannum petisse arguerat. *An de fumo inquit in flammam ire precipites maluerunt, id est savitiam pessimorum Tyrannorum experiri potius quàm judices malos pati quibus jam assueverant.* Illic Hebræos maluisse aïs tyrannos quàm judices, hic judices maluisse quàm tyrannos; & nihil m' nunc quàm

quàm tyrannum voluisse. De tuo igitur respondit tibi Advocatus, juxta enim te omnis rex jure regio tyrannus est. Quod sequitur bene habet, *authoritatem in populo maximum tunc fuisse, quòd judices repudiârunt, regem optârunt.* Memineris, cùm hoc ego à te reposcam. Negas Deum iratum Israëlitis regem tanquam tyrannum aut pœnam attribuisse, sed ut rem salutarem & bonam. Quod tamē facile refellitur. Cur enim exclamarent propter regem illum quem elegerant, nisi quòd res mala erat imperium regium; non quidem per se, sed quòd plerunq; sicut Propheta hic monet, in superbiam & dominationem se convertit. Si adhuc non satisfacio, agnosce jam tua, syngrapham agnosce tuam & erubescce. Apparat ad primatum, *Iratus Deus regem illis dedit offensus eorum peccatis: quòd Deum habere regem renuissent.* Ita Ecclesia quasi in pœnam ejus delicti, quòd à puro Dei cultu desciverat, in unius mortalis monarchie plusquam regium dominatum data est. Tuâ igitur similitudo si sibi constat, aut dedit Deus regem Israëlitis in pœnam, & tanquam rem malam, aut dedit Papam ecclesiæ in bonum, & tanquam rem bonam. Quid hoc homine levius, quid infanius? Quis huic in re minimâ fidem habeat, qui tantis in rebus quid asserat, & mox neget, nihil pensi habet. Affirmas p. 29. *regem legibus solutum esse apud omnes Gentes, sic Oriens judicavit, sic Occidens.* At p. 43. *omnes reges Orientis* Ἰν νόμον & legi.

& legitimos fuisse; immò Egypti reges in maximis minimisque rebus legibus obstrictos, cùm initio capitis hoc te probaturum pollicitus sis, omnes reges solutos legibus esse, leges dare, non accipere. Equidem non irascor tibi; aut enim infans, aut stas à nobis. Hoc certè oppugnare est, non defendere, hoc regem est ludos facere. Sin minùs, Catullianum profectò illud in te aptissimè quadrat, sed inversum; nam quantò quis unquam optimus poëta fuit, tantò tu pessimus omniū patronus. Certè nisi stupor ille quo Advocatum esse demersum aïs, te potiùs obcecavit, jam tute obbrutus te senties. Nunc omnibus quoque gentium regibus leges datas fuisse fateris; non tamen ut iis tenerentur, judiciorum metu & pœna capitis. Quod nequedum ex scripturâ neq; ex ullo authore fide digno ostendisti. Tuigitur paucis accipe: leges civiles iis dare qui legibus non tenentur, stultum & ridiculum est, omnes alios punire, uni duntaxat omnium scelerum impunitatem dare, cùm lex neminem excipiat, iniquissimum est. Quæ duo in sapientes legumlatores minimè cadunt, multò minùs in Deum. Ut omnes autem videant te nullo modo ex Hebræorum scriptis id probare, quod probandum hoc capite susceperas, esse ex magistris tuâ sponte confiteris, qui negant alium suis majoribus regem agnoscendum fuisse præter deum, datum autem in pœnam fuisse. Quorum ego in sententiam pedibuseo. Non decet enim, neq; dignum

dignum est regem esse, nisi qui cæteris omnibus longè antecellit; ubi multi sunt æquales, ut sunt in omni civitate plurimi, imperium ex æquo atque per vices dandum esse arbitror: æquali, aut plerunque deteriori, ac sæpissime stulto servire omnes, quis non indignissimum putet? Nec ad commendationem regalis imperii plus facit, quòd Christus à regibus originem duxit, quàm facit ad pessimorum regum commendationem, Christum eos habuisse nepotem. *Rex est Messias*: agnoscimus, gaudemus, & quàm citissimè veniat oramus; dignus enim est, nec ei quisquam similis aut secundus; interim regia gubernatio commissæ indignis & immerentibus, ut plerumque fieri solet, plus mali quàm boni attulisse humano generi rectè existimatur. Nec continuò sequitur omnes reges tyrannos esse. Verùm ita esto: do tibi hoc, nè me nimis tenacem putes; utere tu jam dato. *Hæc duo sequuntur*, inquis, *Deus ipse rex fuerit tyrannorum dicendus, & quidem tyrannus ipse maximus*. Horum alterum si non sequitur, sequitur profectò illud quod toto libro tuo semper ferè sequitur, te non scripturæ solùm, sed tibimet perpetuò contradicere, ut qui proxima periodo suprà dixeras, *unum Deum regem esse omnium rerum, quas & ipse creavit*. Creavit autem & tyrannos & Dæmonas; eorum itaque rex, vel tuâ ipsius sententiâ. In alterum despuimus, & blasphemum illud tibi os obturatum

ratum volumus, qui Deum affirmes tyrannum esse maximum, si tyrannorum, quod ipse sæpius dicis, rex & dominus dicatur. Sed nec rem regiam multò plus adjuvas, dum ostendis, Moſen etiam cum *ſumma poteſtate regem fuiſſe*. Nam fuerit ſanè, vel quivis alius, dummodò is ſit qui res noſtras, quemadmodum Moſes, ad Deum referre poſſit. Exod. 18. 19. Verùm neque Moſi, quamquam is Dei quaſi ſodalis fuit, licuit in Dei populò quicquid libuit facere. Quid enim ille? *Venit ad me hic populus*, inquit, *ad conſulendum Deum*; non ergo ad mandata Moſis accipienda. Tum ſuſcipit Jethro, *eſto tu pro hoc populo erga Deum, & commoneſacias eos de legibus Dei*. Et Moſes Deut. 4. 5. *docui vos ſtatuta & judicia, quemadmodum præcepit mihi Deus*. Unde fidelis dicitur in *totâ domo Dei*. Num. 12. Rex itaque Jehova tum populi fuit; Moſes veluti interpres tantùm Jehovæ regis. Impium igitur & ſacrilegum te eſſe oportet, qui ſummam hanc poteſtatem à Deo ad hominem injuſſus auſis transferre, quam ipſe Moſes non ſummam ſed vicariam tantùm & intermediam ſub præſenti numine obtinuit. Accedit etiam cumulus ad improbitatem tuam, quòd Moſen hîc ſummâ poteſtate regem fuiſſe dicas, eum in apparatu ad primatum, p. 230. *Eum in commune cum Lxx. ſenioribus populum rexiffe, & primum populi non dominum fuiſſe* dixeris. Si igitur rex fuit,

fuit, ut erat certè, & regum oprimus, idque sicut ipse ais, cum *potestate planè summâ & regia*, nec tamen dominus, neque solus populum regebat, vel te authore, necessariò sequitur reges, quamvis summâ potestate præditos, jure tamen regio atque summo, non esse dominos, neque solos populum regere debere; quantò minùs ad libitum suum. Jam verò quâ impudentiâ Dei mandatum e-
 mentiris, *de rege statim atque ingressi essent terram sanctam sibi constituendo*. Deut. 17. sup-
 primis enim veteratoriè quod præcedit, *si dixeris, statuam super me regem*; tûque meinen-
 to quid à te jam reposcam; cùm dixeris p. 42. *liberrimâ tunc potestate populus erat præditus*.
 Nunc iterum fanaticus an profanus esse velis, ipse videris. *Deus*, inquis, *cùm tanto ante deter-
 minaverit regium regimen instituendum tan-
 quam optimum populi illius regendi statum, quo-
 modo hæc conciliabuntur? Propheta repugnavit,
 Deus sic egit cum propheta, ut quasi nollet*. Vi-
 det se illaqueatum, videt se impeditum: Jam attendite quanta cum malitiâ adversus pro-
 phetam, impietate adversùs Deum, expedi-
 re se quærat: *cogitandum in his est*, inquit, *Samuelem esse cujus filii populum tunc judicabunt,
 eos populus repudiabat ob corrupta iudicia; Sa-
 muel igitur noluit filios suos à populo rejici; Deus
 ut gratificaretur propheta suo, innuit non valde
 sibi placere quod populus desideraret*. Dic uno ver-

bo improbe, quod per ambages dicis; Samuel populo fucum fecit, Samueli Deus. Non advocatus ergò, sed tu *ceritus* ille & *lymphaticus* es, qui modò ut regem honores, nil Deum revereris. Isne tibi Samuel videtur, qui salutì aut charitati patriæ filiorum avaritiam & ambitionem præposuerit, qui populo recta & salutaria petenti, tam callido consilio, tamque vafro illuserit, falso pro veris docuerit? Isne tibi Deus, qui in re tam turpi cuivis gratificaretur, aut cum populo simulatè ageret? Aut ergò jus regium non erat quod Propheta populo exposuit, aut jus illud, teste Deo & prophetâ, malum, molestum, violentum, inutile, sumptuosum reipub. erat; aut denique, quod nefas est dicere, & Deus & Propheta populo verba dare voluerunt. Passim enim testatur Deus valdè sibi displicuisse quòd regem petissent. ver. 7. *Non te sed me spreverunt ne regnem super ipsos, secundum illi facta quibus dereliquerunt me & coluerunt Deos alienos*: ac si species quædam idololatriæ videretur regem petere, qui adorari se, & honores propè divinos tribui sibi postulat. Sanè qui supra omnes leges terrenum sibi dominum imponit, propè est ut sibi Deum statuat alienum; Deum utique haud sæpe rationabilem, sed profligatâ sapiùs ratione brutum, & belluinum. Sic 1. Sam. 10. 19. *Vos sprevestis Deum vestrum qui ipse servat vos ab omnibus malis, & angustis vestris, cum dixistis*

46 PRO POPULO ANGLIC.

*dixistis ei, regem prapones nobis. & cap. 12. 12. Vos regem petistis, cum Iehova sit rex vester. & ver. 17. Videte malum vestrum magnum esse coram Iehova petendo vobis regem. Et contemp- tim Hosea de rege, 13. 10. 11. Vbi rex tuus, ubinam est? servet te jam in civitatibus tuis. Vbi vindices tui? quoniam dixisti, da mihi regem & proceres: dedi tibi regem in ira mea. Hinc Ge- deon ille Heros rege major, Non dominabor in vos, neque filius meus in vos dominabitur, sed do- minabitur in vos Iehova; Jud. 8. planè ac si si- mul docuisset, non hominis esse dominari in homines, sed solius Dei. Hinc Hebræorum rempublicam, in qua Deus principatum solus tenuit, *θεοκρατία* vocat Josephus contra A- pionem Grammaticum Ægyptium & maledi- cum tui similem. Populus denique resipiscens apud Isaiam 26. 13. calamitosum hoc sibi fuisse queritur, quòd alios præter Deum dominos habuerat. Indicio sunt hæc omnia regem irato Deo Israëlitis fuisse datum. In historia tyranni Abimelechi quis est cui non risum moveas? de quo dicitur, cum is partim saxo à muliere, par- tim armigeri gladio interfectus fuerit, *reddidit Deus malum Abimelechi. Hac, inquis, historia potentissimè adstruit Deum solum regum iudicem esse & vindicem*: immo tyrannorum, nebulo- num, nothorum, si hoc valebit, quicumque per fas aut nefas tyrannidem occupaverit, is jus re- gium statim in populum adeptus erit, poenas effugit,*

effugit, confestim arma magistratui de manibus fluent, mussare deinceps populus non audebit. Verùm quid si magnus aliquis latro hoc modo in bello periisset, an Deus ergo solus latronum vindex? Quid si carnificis manu lege damnatus, an ideo minùs illi Deus malum reddidisset? Ne iudices quidem eorum unquam legisti lege postulos; tamen *in optimatum statu vel principem, si quid committat, posse ac debere judicari*, ultrò fateris *pag. 47.* cur non item tyrannus in regno? quia Deus reddidit malum Abimelechi. At reddidit quoque mulier illa, reddidit etiam armiger, in quos ille ambos jus regium habere præ se tulit. Quid si reddidisset magistratus, an non is idcirco Dei gladium gerit, ut malum malis reddat? Ab hoc *potentissimo* de morte Abimelechi argumento ad verborum contumelias more suo se convertit; nil nisi *cœnum & lutum* ore funditat; cum eorum quæ promisit se probaturum, nihil vel ex sacris libris, vel ex rabbinicis probaverit. Nam neque regem legibus solutum esse, nec cur puniri, si delinquat, solus mortalium non debeat, quicquam ostendit. Immo suis ipse testibus se induit, & sententiam suæ contrariam esse veriore suomet ipse opere demonstrat. Cùmque argumentis parùm proficiat, criminationibus atrocissimis omnium in nos odium excitare conatur, quasi rege optimo & innocentissimo crudeliter sublato. *An Salomon, inquit, melior*

melior Rex Carolo I. fuit? Sunt, ut verum fatear, qui patrē ejus Jacobum cum Salomone comparare non dubitārunt, & natalibus quidē anteferre, Salomon Davidis filius; is primò Saulis musicus erat; Jacobus Darlii comitis filius, qui Davidē musicum, reginæ uxoris thalamos nocte ingressum, cum ostio pessulum obdidisseprehendit, haud multò post interfecit, ut narrat Buchananus. Natalibus ergo illustrion Jacobus, & secundus Salomon sæpe dictus, quamvis Davidis musici filius an fuerit, dubium sit At Carolum conferre cum Salomone qui tibi in mentem venire potuerit non video. Quem enim tu Carolum tot laudibus tollis, ejus perviciaciam, avaritiam, crudelitatem, & sævum in omnes pios atque bonos dominatum, ejus bella, incendia, rapinas. & miserorum civium cædes innumeras, dum hæc scribo, Carolus ipse filius in illa publicæ pœnitentiæ sedeculâ apud Scotos coram populo confitetur atque deplorat: immò tuum illud regium jure ejurat. Verùm si Parallelis tantopere delectaris, Carolum cum Salomone conferamus. Salemon à meritiſſimo fratris supplicio *regnum aſſectatus est*: Carolus à patris funere; non dico à nece, quamvis indicia veneni omnia in corpore patris mortui conspecta sint; ista enim suspicio in Buchinghamino constitit; quem tamen Carolus, & regis interfectorem & sui patris, non solum in comitiis omni culpa exemit, sed ne omninò

res ea Senatus cognitioni subjiceretur, comitia dissolvit. Salomon *gravissimis tributis populum pressit*: at ille in templum Dei, & ædificia publica impendit, Carolus in luxum. Salomon à plurimis uxoribus ad Idolorum cultum pellectus est, hic ab unâ. Pellectus in fraudem Salomon, pellexisse alios non legitur, hic alios, non solum uberrimis corruptæ Ecclesiæ præmiis pellexit, sed etiam edictis & canonibus ecclesiasticis coëgit, ut invisa reformatis omnibus altaria statuerent, & pictos in pariete crucifixos altariibus imminentes adorarent. At non est ideo *Salomon à populo capitis damnatus*. Nec inde inquam, sequitur damnari à populo non debuisse; multa enim incidere potuerunt, cur id tum expedire populo non videretur. Populus certè quid sui juris esset haud multo post & verbis & factis patefecit: cùm Salomonis filium decem tribus expulerunt; & nisi maturè se in fugam coniecisset, etiam lapidibus regem tantummodò minacem obruituros fuisse credibile est.

CAP. III.



Um satis jam disputatum atque conclusum sit, reges Mo-
saicos ex præscripto Dei om-
nibus obstrictos legibus pari-
ter cum populo fuisse, nullas
legum

gum exceptiones perscriptas inveniri, ut reges
quod vellent, impunè possent aut ut à populo puni-
ri ne possint, Deum proinde vindictam de his tri-
bunali suo reservasse falsissimum esse, sine aut-
 hore, sine ratione dictum, videamus an id sua-
 deat Evangelium, quod dissuasit lex non im-
 peravit: videamus an Evangelium, divinum il-
 lud libertatis præconium, nos in servitutem
 addicat regibus & tyrannis, quorum ab impo-
 tenti imperio etiam servitutis cujusdam magi-
 stra lex vetus populum Dei liberavit. Primum
 argumentum ducis à personâ Christi, quem
 quis nescit non privati solùm, sed etiam servi
 personam ideo sumpsisse, ut nos liberi essemus.
 Neque hoc de interna tantum libertate intelli-
 gendum est, non de civili; quàm enim aliena
 sunt ista quæ Maria, mater Christi, ejus in ad-
 ventu cecinit, *superbos dissipavit cogitatione cor-*
dis ipsorum, detraxit dynastas è thronis, humiles
erexit, si adventus ejus tyrannos potius in sollo
stabileret, Christianos omnes eorum sœvissimo
Imperio subjiceret. Ipse sub tyrannis nascendo,
serviendo, patiendo omnem honestam liberta-
tem nobis acquisivit: ut posse servitutem, si ne-
cesse est, æquo animo pati, sic posse ad liberta-
tem honestè aspirare non abstulit Christus, sed
majorem in modum dedit. Hinc Paulus 1. Cor.
7. non de evangelica solùm, sed de civili liber-
tate sic statuit, Servus vocatus es? ne sis tibi cura;
si autem potes liber fieri, potius utere; pretio
empti

empti estis, ne estote servi hominum. Frustra igitur ab exemplo Christi ad servitutem nos hortaris, qui suæ servitutis prætio libertatem nobis etiam civilem confirmavit. Et formam quidem servi nostrâ vice suscepit, animum vero liberatoris nunquam non retinuit: unde jus regium quid sit, longè aliter docuisse ostendam, atque tu docēs; qui non regii, sed tyrannici juris, idque in republicâ novus professor, si qua gens tyrannum sive hæreditarium, sive adventitium, sive fortuitum sortita erit, eam non solum necessitate, sed etiam religione servam esse statuis. Tuis autem, ut soleo, in te utar testimoniis. Interrogavit Petrum Christus, cùm ab eo coactores quidam Galilæi didrachma exigebant, Mat. 17. à quibus acciperent reges terræ tributa, sive censum, à filiis suis, an ab alienis? respondet ei Petrus, ab alienis. ergo, inquit Christus, *liberi sunt filii; sed ne offendamus illos, da iis pro me & pro te.* Variè hic locus interpretes exercet, cuiusnam persolverentur hæc didrachma, alii sacerdotibus in sanctuarium, alii Cæsari: ego quidem Herodi persolura, interverso Sanctuarii reditu, sentio fuisse. Varia enim ab Herode & filiis ejus exacta tributa, ab Agrippa tandem remissa narrat Josephus. Hoc autem tributum per se exiguum, multis aliis adjunctum, grave erat: gravia autem fuerint oportet de quibus hic Christus loquitur, alloqui, in republica etiam pauperes

pauperes capite censi fuerunt. Hinc itaque Christus Herodis injustitiam arguendi, cujus sub ditione erat, occasionem cepit. Qui, cum cæteri reges terræ (siquidem patriæ parentes dici se cupiant) non filiis, id est civibus suis, sed alienis, bello nempe subactis graviora tributa imperare soleant, hic contra non alienos, sed filios opprimeret. Utcunque sit, siue filios hîc, cives regum proprios, siue filios Dei, id est fideles & in universum christianos intelligi concedas, ut intelligit Augustinus, certissimum est, si filius fuit Petrus, & proinde liber, nos etiam anthore Christo liberos esse: vel ut cives, vel ut christianos: non esse ergo juris regi à filiis & liberis tributa graviora exigere. Testatur enim Christus persolvissè se, non quod deberet, sed ne illos offendendo qui exigebant, negotium sibi privatus exhiberet; cum officium ac munus longissimè diversum in illo vitæ suæ curriculum explendum sibi esset. Dum igitur negat Christus jus regium esse, graviora vectigalia liberis imponere, certè spoliare, diripere, occidere, excruciare proprios cives, & præsertim christianos, jus esse regium multo evidentius negat. Hunc in modum de jure regio cum & aliàs disputassè videatur, venire in suspicionem quibusdam cœpit, non se tyrannorum licentiâ pro jure regio habere. Non enim de nihilo erat quòd Pharisei interrogatione hujusmodi animum ejus tentarent, quòd de jure regio per-
 conta

cunctaturi, eum neminem curare, non respicere personam hominum dixerint; neque de nihilo, quodd is proposita sibi istiusmodi quæstione irasceretur, Mat. 22. An te quispiam si insidiosè aggredi, si loquentem captare vellet, si elicere ex te quod fraudi futurum sibi sit, de jure regio sub rege interrogaret? an tu cuipiam de istoc interroganti irascerere? non opinor. Vel hinc ergo perspicias, non id eum de jure regio sensisse quod regibus gratum erat. Idem ex responso ejus apertissimè colligitur, quo ille percunctatores amandare à se potius quàm docere videtur. Poscit numisma censùs; *cujus*, inquit, *imago ista est? Caesaris. Reddite ergo Caesari quæ sunt Caesaris, quæ Dei sunt Deo.* Immo quæ populi sunt populo reddenda esse quis nescit? Reddite omnibus quod debetis, inquit Paulus, Rom. 13. non ergo Cæsari omnia. Libertas nostra non Cæsaris, verùm ab ipso Deo natale nobis donum est; eam Cæsari cuivis reddere, quam ab eo non accepimus, turpissimum esset, & humana origine indignissimum. Si enim os hominis, & vultum aspiciens interrogaret quisquam, *cujus ista imago esset*, an non facile quivis responderet Dei esse? Cum igitur Dei simus, id est verè liberi, ob eamque causam soli Deo reddendi, profectò Cæsari nos, id est homini, & præsertim injusto, improbo, tyranno in servitutem tradere, sine piaculo, & quidem maximo sacrilegio non possumus.

Interim quæ Cæsaris sint, quæ Dei, in medio relinquit. Quòd si idem erat hoc numisma quod didrachmum illud Deo pendi solitum, ut certè postea sub Vespasiano fuit, tum sanè controversiam non minuit Christus, sed implicavit: cum impossibile sit Deo & Cæsari idem simul reddere. At enim ostendit quæ Cæsaris essent; numisma nempe illud Cæsaris imagine signatum. Quid igitur inde lucraris præter denarium vel Cæsari vel tibi? Aut enim Cæsari Christus præter denarium illud nihil dedit, cætera omnia nobis asseruit, aut si quicquid pecuniæ Cæsaris nomine inscriptum esset, id Cæsari dedit, contrarius jam sibi, nostra ferè omnia Cæsari dabit, qui duo modò didrachma regibus non se ex debito persolvere, & suo & Petri nomine professus est. Ratio denique infirma est qua niteris; non enim principis effigiem habet moneta ut principis esse, sed ut probam se esse moneat; utque se principis nomine insignitam ne quis audeat adulterare. Sin autem ad jus regium inscriptio tantum valeret, reges profectò nostras omnium facultates, uti essent suæ, sola nominis inscriptione statim perficerent; aut si nostra omnia jam sua sunt, quod tuum dogma est, non idcirco Cæsari numisma illud reddendum erat, quia Cæsaris nomen aut imaginem prætulit, sed quia Cæsaris jam antea jure erat, nulla licet imagine signatum. Ex quo manifestum est, Christum hoc in loco non tam

nos officii nostri erga reges aut Cæsares ita perplexè atque ambiguè admonere voluisse, quàm Phariseos, hypocritas improbitatis & malitiæ arguere. Quid? rursus cum ei nuntiarent Pharisei, Herodem ejus vitæ insidias parare, an humile aut demissum ab eo responsum tyranno reddendum tulerunt? Immo *ite*, inquit, & *dicite vulpi illi*; innuens reges jure regio sed vulpino civibus suis insidiari. Atqui *sub tyranno supplicium mortis subire sustinuit*. Enimverò qui potuit nisi sub tyranno? *supplicium sub tyranno passus est*; ergo ad injustissima quævis juris regii testis & assertor: egregius tu quidem officiorum ratiocinator es. Verùm Christus quamvis nostri liberandi, non sub jugum mittendi causâ servum se fecerit, tamen ad hunc modum se gessit; nec juri quicquam regio præter æquum & bonum concessit. Nunc ad præcepta ejus hac de re aliquando veniamus. Zebedæi filios maximam in regno Christi, quod mox in terris futurum formniabant, dignitatem affectantes, sic Christus corripuit, ut omnes simul christianos commonefaceret quale jus magistratûs & imperii civilis apud eos constitui voluerit. *Scitis*, inquit, *principes gentium in eas dominari, & magnates auctoritatem exercere in eas, verum non ita erit inter vos. Sed quicumque volet inter vos magnus fieri, esto vester minister; & quicumque volet inter vos primus esse, esto vester*

vester servus? Hæc tu nisi mente captus recum facere credidisses? hisne te argumentis vincere, ut reges nostros rerum dominos existimemus? Tales in bello hostes nobis contingant, qui in castra hostium (quanquam & armatos vincere sat scimus) uti tu soles, cæci atque inermes tanquam in suos incidunt: ita semper quod tibi maximè adversatur, id demens veluti firmissimum causæ tuæ subsidium comparare consuevisti. Petebant Israëlita regem, *ut habebant omnes ista gentes*: dissuasit Deus multis verbis, quæ Christus hic summatim complexus est, *scitis principes gentium in eas dominari*: petentibus tamen iis dedit regem Deus, quamvis iratus: Christus, ne peteret omnino christianus populus, more gentium dominaturum, adhibitâ cautione antevertit; *inter vos non ita erit*. Quid hoc clariùs dici potuit? non erit inter vos ista regum superba dominatio, tamen si specioso titulo Euergetæ & benefici vocentur; sed qui magnus inter vos fieri vult, quis autem principe major, *esto vester minister*: & qui primus sive princeps (Luc. 22.) *esto vester servus*. Non erravit itaque Advocatus ille quem insectaris, sed authorem habuit Christum, si regem Christianum populi ministrum esse dixit, uti est certè omnis bonus magistratus. Rex autem inter christianos aut omnino non erit, aut erit servus omnium; si planè vult esse dominus, esse simul christianus non potest.

Quin

Quin & Moses, legis quodammodo servilis institutor, non populo superbè dominabatur, sed onus ipse populi ferebat; ferebat in sinu Populum, ut nutricius lactentem. Num. 11. nutritius autem servus est. Plato non dominos sed servatores & adjuutores populi appellandos esse magistratus docuit; Populum non servos, sed aliores magistratum, ut qui alimenta & stipendia magistratibus etiam regibus præbeant. Eosdem Aristoteles custodes & ministros legum vocat, Plato & ministros & servos. Ministros Dei Apostolus quidem appellat, quod tamen nequaquam obstat quò minùs sint & legum & populi; tam leges enim quàm magistratus propter populum sunt. Et tamen hanc tu *Fanaticorum Anglia Molossorum opinionem* esse clamas. Molossos esse Anglos certè non putarem, nisi quòd tu illos, hybrida, latratu tam degeneri oblatras; Lupi, si diis placet, Sancti Dominus: Lupus nimirum sanctus queritur Molossos esse fanaticos. Germanus olim, cujus ille Lupus Trecaſſinus collega fuit, incesto apud nos regi Vortigerno autoritate suà regnum abrogavit. Sanctus itaque Lupus talem te Lupi non sancti, sed famelici cujuspiam & latrunculi dominum, illo apud Martialem viperarum domino vilior, aspernatur: qui & latrantem ipse domi, ut ferunt, Lyciscam habes, quæ tibi miserè dominatur; cujus partim impulsu etiam scripsisse hæc diceris; unde

mirum, non est velle te regiâ dominationem aliis obtrudere, qui scæmineum ipse domi dominatum ferre tam serviliter assuevisti. Sis itaque Lupi Dominus, sit Lupa tuî domina, sis Lupus ipse, sis Lycanthropus, molossis meherculè Anglicanis ludibrium debes. Verùm lupos venari nunc non est otium; sylvis itaque egressi, in viam regiam redeamus. Qui contra omnem in ecclesia primatum nuper scripsisti, nunc *Petrum Apostolica corona principem appellas*. Quis tibi autoritate tam fluxâ homunculo fidem habeat? Quid Petrus? *subjecti estote omni humana ordinationi propter dominum, siue regi ut supereminenti, siue præsilibus, ut qui per eum mittantur, ad ultionem quidem facinorosorum, laudem verò beneficientium; quoniam ita est voluntas Dei*. Scripsit hæc Petrus non solùm privatis, sed etiam advenis per minorem ferè Asiam dispersis, atque dispalatis; qui in iis ubi degebant locis nullius juris præterquam hospitalis capaces erant. An tu incolas, liberos, nobiles, indigenarum conventus, comitia, parlamenta idem in sua patria, quod sparsos & peregrinos in aliena decere putas? an idem privatos decere in sua, quod senatores & magistratus, sine quibus ne reges quidem esse possunt? fac tamen indigenas fuisse, fac non privatos, sed Senatum ipsum Romanum cui hæc scripta sunt. Quid inde assequeris? cùm nullum præceptum cui ratio aliqua adjuncta est, quenquam ultra
illam

illam præcepti rationem obligare aut soleat aut possit. *Estote subjecti*, ὄντο ὑποτακτικοί, id est si vim verbi spectes, subordinati, seu legitimè subjecti, ἢ ὅτι τάξις νόμου. Inquit Aristoteles, lex est ordo. *Subjecti estote propter dominum*. Quomobrem? quia cùm rex, tum præses constituitur à Deo ad ultionem facinorosorum, laudem beneficientium. *Quoniam ita voluntas est Dei*. Videlicet ut talibus obsequamur, quales hic describuntur; de aliis nullum hic verbum. Vides quam optimè hujus præcepti constet ratio; addit. V. 16. *ut liberi*, non ergo ut mancipia. Quid si versâ vice ad crucem & perniciem bonorum, ad impunitatem & laudem & præmia facinorosorum regnent? an in perpetuum subjecti erimus non privati solùm, sed primores, sed magistratus omnes, ipse denique Senatus? Annon humana ordinatio dicitur? cur ergo potestas humana, ad constituendum quod hominibus bonum & salubre est, valebit, ad tollendum quod iisdem malum & exitiosum est, non valebit? At qui rex ille cui subjecti esse iubentur, erat Romæ eâ tempestate Nero tyrannus; ergo tyrannis etiam subjecti esse debemus. At inquam, & dubium hoc est, Nero an Claudius tunc temporis rerum potiretur, & illi qui subjecti esse iubentur, advenæ, dispersi, privati non consules, non prætores, non Senatus Romanus erant. Nunc Paulum adeamus (quoniam tu quod nobis de regibus licere non vis id

tibi de Apostolis licere autumas, ut principatum Petro modò des, modò eripias) Paulus hæc ad Romanos. c. 13. *omnis anima potestatibus supereminentibus subjecta esto, non est enim potestas nisi à Deo, quæ autem sunt potestates à Deo sunt ordinatæ*: Romanis hæc scribit, non, ut Petrus, advenis, dispersis, sed privatis tamen potissimum & plebeis; ita etiam scribit, ut totam reipub. administrandæ rationem, originem, finem luculentissimè doceat. Quo magis obedientiæ quoq; nostræ vera ac distincta ratio, ab omni servitute disjuncta eluceret. *Omnis anima*, hoc est quisque homo *subjectus esto*. Quid sibi Apostolus proponat hoc capite satis explanavit Chrysostomus, *ποiei τὰ τοῦ θεοῦ δεικνύς, &c. facit hæc*, inquit, ut ostendat Christum leges suas non ad hoc induxisse ut communem politiam everteret, sed ut in melius statueret. Non ergo ut Neronem, aut tyrannum quemvis alium supra omnem legem & pœnam constituendo, crudelissimum unius imperium in omnes mortales constabiliret. *Vtque simul docet superflua & insilia bella non esse suscipienda*, non ergo bella damnat contra tyrannum, hostem patriæ intestinum, atque adeo periculosissimum suscepta. *Pervulgatus tunc erat hominum sermo traducens apostolos tanquam seditiosos, & novatores quasi omnia ad evertendum leges communes & facerent & dicerent; his nunc ora obstruit*. Non ergo tyrannorum defensiones conscripserunt apostoli,

li, quod tu facis, sed ea fecerunt, ea docuerunt, quæ suspecta omnibus tyrannis defensione apud illos potiùs, & interpretatione quadam egebant. Propositum apostolo quid fuerit ex Chrysostomo vidimus; nunc verba scrutemur. *Omnis anima potestatibus supereminentibus subiecta esto*, quæ tamen istæ sint non statuit: non enim jura atque instituta omnium nationum abolere, unius libidini omnia permittere in animo erat. Certè optimus quisque imperator authoritatem legum & Senatûs authoritate suâ longè superiorem semper agnovit. Idem apud omnes nationes nō barbaras jus semper sanctissimum fuit. Unde Pindarus apud Herodotum νόμον πάντων βασιλέα legem omnium regem esse dixit; Orpheus in hymnis non mortalium solum, sed immortalium etiam regem appellat. Ἀθανάτων καλέω κ' ἰσχυρῶν ἀνθρώπων ἀνακτα Οὐράνιον νόμον. —

Reddit rationem. Αὐτὸς γὰρ μὲν ὁ ζώων ἑταίρα καὶ κρατύνει. *Lex enim sola viventium gubernaculum tenet.* Plato in legibus τὸ κρατῆν ἐν τῇ πόλει, id quod in civitate plurimum debet posse, legem esse ait. In epistolis eam maximè remp. laudat, ubi lex, & domina & rex hominū, non homines tyranni legum sunt. Eadem Aristotelis sententia in Politicis, eadem Ciceronis in legibus, ita leges præesse magistratibus, ut magistratus præfunt populo. Cū itaq; sapien-

62 PRO POPULO ANGLIC.

tissimorum virorum iudicio, prudentissimarum civitatum institutis lex semper potestas summa atque suprema habita sit, nec evangelii doctrina cum ratione aut cum jure gentium pugnet, is utique potestatibus supereminentibus verissimè subiectus erit, qui legibus & magistratibus juxta leges Rempub. gubernantibus ex animo paret. Non ergo solum populo subiectionem hanc, sed regibus etiam præcipit; qui supra leges nequaquam sunt. *Non est enim potestas nisi à Deo*; id est nulla reipub. forma, nulla homines regendi legitima ratio. Antiquissimæ etiam leges ad authorem Deum olim referebantur; est enim lex, ut Cicero in Philipp. 12. nihil aliud nisi recta & a numine Deorum tracta ratio, imperans honesta, prohibens contraria. A Deo igitur est magistratuum institutio, ut eorum administratione gens humana sub legibus viveret: hanc autem vel illam administrationis formam, hos vel illos magistratus eligendi optio procul dubio penes liberas hominum nationes semper fuit. Hinc Petrus & regem & præfides ἀνθρώπων κτίσιν humanam creationem vocat; & Hosea. c. 8. *constituunt reges, at non ex me; præficiunt principes quos non agnosco*. In istà enim solà Hebræorum repub. ubi Deum variis modis consulere poterant, de regis nominatione ad Deum referri ex lege oportebat: cæteræ gentes mandatum à Deo nullum istiusmodi accepimus. Aliquando

quando aut ipsa regiminis forma, si vitiosa sit, aut illi qui potestatem obtinent, & ab hominibus, & à diabolo sunt. Luc. 4. *Tibi dabo potestatem hanc omnem, nam mihi tradita est, & cui volo do illam.* Hinc princeps hujus mundi dicitur, & Apocalyp. 13. dedit Bestiæ Draco potentiam suam, & thronum suum, & potestatem magnam. Propterea necesse est hic intelligi non potestates quascunque, sed legitimas, prout etiam infra describuntur; necesse est intelligi potestates ipsas, non semper eos qui imperium obtinent. Hinc dilucidè Chrysostomus, *Quid ais? inquit, omnis ergo princeps à Deo constitutus est? non dico: non enim de quorvis principe, sed de ipsa re loquitur Apostolus; non dicit, non est princeps nisi à Deo, sed non est potestas.* Hæc Chrysostomus. *Quæ autem potestates sunt, à Deo sunt ordinatæ.* Legitimas ergo vult hic intelligi Apostolus; malum enim & vitium, cum ataxia sit, non est ut possit ordinari, & esse simul vitiosum. Hoc enim duo simul contraria ponit, taxin & ataxian. *Quæ autem sunt, ita interpretaris ac si diceretur, quæ nunc sunt;* quo facilius probare possis etiam Neroni, qui, ut opinaris, tunc *imperavit*, Romanos obtemperare debuisse; nostrâ sanè bonâ veniâ: quàm enim voles de Anglicanâ repub. malè sentias, in eâ tamen Anglos acquiescere debere, quoniam *nunc est*, & à Deo ordinatur, ut Neronis olim imperium, necesse habebis concedere.

Neque enim Nero minùs quàm Tiberius *artibus matris imperium nihil ad se pertinens* occupaverat, ne legitimè partum fuisse respondeas. Quo sceleratior & doctrinæ retractator ipse tuæ, Romanos potestati quæ tunc fuit subiectos esse vis, Anglos potestati quæ nunc est, subiectos esse non vis. Verùm nullæ in hoc orbe terrarum res duæ magis è regione adversæ sibi sunt, quàm tu nequissimus nequissimo semper ferè adversus es tibi. Quid autem facies miser? acumine hoc tuo regem adolescentem planè perdidisti; ab ipsa enim tua sententiâ extorquebo ut fatearis, hanc potestatem in Anglia, quæ nunc est, à Deo ordinatam esse; atque omnes proinde Anglos intra ejusdem reipublicæ fines eidem potestati subiectos esse debere. Attendite igitur Critici, & manus abstinere, Salmasii nova hæc emendatio est, in epistola ad Romanos; non quæ sunt potestates, *sed quia nunc existunt* reddi debere adinvenit; ut Neroni tyranno tunc scilicet imperanti subiectos esse omnes oportuisse demonstraret. At ô bone, *ληκίθιον ἀπώλεσας*: ut regem modò, ita nunc interpretamentum hoc tam bellum perdidisti. Quam tu epistolam sub Nerone scriptam esse ais, sub Claudio scripta est principe simplici, & non malo: hoc viri docti certissimis argumentis compertum habent; quinquennium etiam Neronis laudatissimum fuit, unde argumentum hoc toties inculcatum, quod

quod multis in ore est, multis imposuit, tyranno parendum esse, eo quod Paulus hortatus est Romanos ut Neroni essent subiecti, callidum indocti cuiuspiam commentum esse reperitur. *Qui obsistit potestati*, scilicet legitimæ, *Dei ordinationi obsistit*. Astringit etiam reges præceptum hoc, qui legibus & Senatui obsistunt. At verò qui potestati vitiosæ, aut potestatis non vitiosæ corruptori & everfiori obsistit, an is Dei ordinationi obsistit? sanus, credo, non dixeris. Tollit omnem dubitationem sequens versiculus, de legitima tantum potestate Apostolum hic loqui. Definiendo enim explicat, nequis errare, & opiniones hinc stolidas aucupari possit, qui sint magistratus potestatis hujus ministri, & quam ob causam subiectos esse nos hortetur; *Magistratus non sunt timori bonis operibus, sed malis; boni à potestate hac laudem adipiscuntur; Magistratus minister est Dei nostro bono datus; non frustra gladium gerit, vindex ad iram ei qui malum facit*. Quis negat, quis recusat, nisi improbus, quin huiusmodi potestati aut potestatis administro libens se subiciat? non solum ad vitandam iram & offensionem, aut poenæ metu, sed etiam *propter conscientiam*.; Si ne magistratibus enim, & civili gubernatione, nulla respublica, nulla societas humana, nulla vita esse potest. Quæ autem potestas, qui magistratus contraria his facit, neque illa neque hic à Deo propriè ordinatus est. Unde neque
tali

tali vel potestati, vel magistratui subiectio debetur aut præcipitur, neque nos prudentes obsistere prohibemur: non enim potestati, non magistratui obsistemus, qui hic optimè depingitur, sed prædoni, sed tyranno, sed hosti; qui si magistratus tamen dicendus erit, eò duntaxat quòd habet potestatem, quòd à pœnam nostram ordinari à Deo videri potest, etiam diabolus hoc modo magistratus erit. Sane unius rei una vera definitio est: si ergò Paulus hic magistratum definit, quod quidem accurate facit; eadem definitione, iisdem verbis tyrannum, rem maximè contrariam, definire non potuit. Unde quem ipse magistratum definivit atque descripsit, ei duntaxat subiectos nos esse voluisse, non ejus contrario tyranno certissimè colligitur. *Propter hoc tributa solvitis;* rationem adjungit ad præceptum; unde Chrysostomus, *Cur,* inquit, *vestigalia regi damus. Annon tanquam nobis prospicienti, cura ac tuitionis mercedem solventes? atqui nihil illi solvissimus, nisi ab initio utilem nobis talem esse præfecturam cognovissimus.* Quapropter illud repetam quod suprà dixi; quandoquidem subiectiò hæc non simpliciter, sed cum adjunctâ ratione à nobis requiritur, illa profectò ratio quæ adjungitur, subjectionis nostræ vera norma erit: Cum ista ratione non subiecti, rebelles; sine ista ratione subiecti, servi erimus & socordes. *At Angli,* inquis, *nihil minus quàm liberi,*

liberi, quia mali, quia flagitiosi. Nolo ego Gallorum vitia commemorare, quamvis sub regibus sint; neque Anglorum nimis excusare; dico tamen illa esse flagitia, quæ sub regibus tanquam in Ægypto didicerunt; neque dum in deserto; licet Dei sub imperio, dediscere statim potuerunt. Spes est tamen de plerisque bona; ut ne sanctissimos hic optimosque viros & veritatis studiosissimos collaudare incipiam; quorum apud nos non minorem credo esse numerum, quàm ubi tu maximum esse existimas. At *jugum Anglis durum imponitur.* Quid si illis, qui jugum cæteris civibus imponere studebant? Quid si suo deinde merito subactis? nam cæteri puto non molestè ferunt, exhausto civilibus bellis ærario, sumptibus propriis suam se tolerare libertatem. Relabitur jam ad Rabbinos nugivendos. Regem legibus astrictum esse negat, ex iis tamen probat *læsæ majestatis reum esse posse, si jus suum patiatur imminui*: astrictus itaque & non astrictus, reus & non reus rex erit; adedò frequenter enim solet repugnare sibi, ut ipsa Repugnantia huic homini germana atque gemella esse videatur. Atqui Deus, inquis, multa regna Nubuchadnezzari in servitutem dedit. Fateor ad certum tempus dedisse, Jer. 27. 7. Anglos in servitutem Carolo Stuardo ad semi horulam dedisse ostende; permisisse non negaverim, dedisse nunquam audiui. Aut si Deus in servitutem

tutem dat populum, quoties tyrannus plus populo potest, cur non idem liberare dicendus erit, quoties plus potest populus tyranno? an is Deo tyrannidem suam, nos Deo libertatem nostram acceptam non feremus? Non est malum in civitate quod Deus non immitat, *Amos* 3. famem, pestilentiam, seditionem, hostem; ecquod nam horum civitas ab se non rotis viribus amolietur? faciet profectò, si possit, quamvis ab ipso Deo immissa hæc esse sciat; nisi è cælo ipse secus jusserit. Cur non tyrannos pariter amovebit, si plus polleat? an ejus unius impotentiam ad commune malum esse magis à Deo credemus, quàm potentiam totius civitatis ad commune bonum? Absit a civitatibus, absit ab omni cœtu hominum ingenuorum doctrinæ tam stupidæ, tamque pestiferæ labes, quæ vitam omnem civilem funditus delet, gentem humanam universam propter unum atque alterum tyrannum, ad quadrupedum propè conditionem detrudit: cum illi supra omnem legem excelsi par in utrunque genus & pecudum & hominum jus atque imperium obtinebunt. Mitto jam stulta illa dilemmata, in quibus ut te jactes, nescio quem fingis, *potestatem illam supereminentem de populo velle intelligere*; tamen si affirmare non dubito omnem magistratus auctoritatem à populo proficisci. Hinc Cicero pro Flacco, *Illi nostri sapientissimi, & sanctissimi majores, quæ sciscerer plebs, quæ populus juberet,*

beret, juberi vetarique voluerunt. Hinc Lucius Crassus Orator eximius, & Senatûs eo tempore princeps, cujus tum causam agebat ad populum. Nolite, inquit, sinere nos cuiquam servire nisi vobis universis, quibus & possumus & debemus. Quamvis enim Senatus Populum regeret, populus tamen illam moderandi & regendi sui potestatem senatui tradiderat. Unde maiestatem, populo Romano frequentius quam regibus olim attributam legimus. Idem Marcus Tullius pro Plancio, *Est enim conditio liberorum populorum, præcipuèque huius principis populi & omnium gentium domini, posse suffragia vel dare vel detrabere quod velit cuique; nostrum est ferre modicè populi voluntates: honores si magni non putemus, non servire populo; sin eos expectamus, non defatigari supplicando.* Egône ut regem populi servum dicere metuam, cum Senatus Romanus tot regum dominus servum se populi professus sit? Vera sunt hæc, inquires, in populari statu; nondum enim lex regia potestatem populi in Augustum, & successores ejus transtulerat. Hem tibi ergò Tiberium illum quem tu *tyrannum plus vice simplici* fuisse ais, ut revera fuit, is tamen dominus, etiam post legem illam regiam, appellatus à quodam, ut tradit Suetonius, denunciavit ne se amplius contumeliæ causâ nominaret. Audisne? tyrannus iste dominus dici contumeliæ sibi duxit. Idem in Senatu, *Dixi & nunc, & sæpe alias, patres*
 Con-

Conscripti, bonum & salutarem principem, quem vos tanta & tam libera potestate instruxistis, Senatui servire debere, & universis civibus sape, & plerunque etiam singulis; neque id dixisse me poenitet; & bonos & aquos & faventes vos habui Dominos, & adhuc habeo. Nec simulata hæc ab eo si dixeris, ut erat simulandi callidissimus, quicquam proficies; quis enim id videri se cupit, quod esse non debet. Hinc ille mos non Neroni solum, quod scribit Tacitus, sed cæteris etiam imperatoribus fuit, populum in Circo adorandi. De quo Claudianus. VI. Conf. Honorii.

*O quantum populo secreti numinis addit
Imperii præsens species, quantamque rependis
Majestas alterna vicem, cum regia Circi
Connexum gradibus veneratur purpura vulgus,
Consensuque cava sublatu in æthera vallis
Plebis adorata reboat fragor.*

Qua adoratione quid aliud Imperatores Romani, nisi universam plebem, etiam post legem regiam, suos esse dominos fatebantur? Atque illud est quod initio statim suspicatus sum, te glossariis pervolutandis, & tricis quibusdam laboriosis magnificè divulgandis operam potius dedisse, quam bonis authoribus attentè & studiosè perlegendis; qui veterum scriptorum sapientia ne leviter quidem imbutus, rem præstantissimorum opinionibus Philosophorum, & prudentissimorum in republica principum

cipum dictis celebratissimam, novam esse
 prorsus & *Enthusiastarum* tantummodò deli-
 riis somniatam censes. I nunc, Martinum illum
 sutorem, & Guilielmum Pellionem quos adeò
 despicias, ignorantia collegas & mystagogos
 tibi sume: quanquam erudire te poterunt illi,
 & illos tibi gryphos dissolvere stolidissimos,
An in Democratia serviat Populus, cum serviat
rex in Monarchia; utrum totus an pars ejus. Ita
 illi, cum tibi Oedipi vice fuerint, tu illis Sphinx
 in malam rem præceps abeas licebit; alioqui fa-
 tuitatum tuarum & ænigmatum finem nullum
 fore video. Rogas, *Cum reges Apostolus nominat,*
an de populo eos intelligemus. Pro regibus quidem
 orandum esse Paulus docet, 1 *Tim.* 2. 2. at prius
 pro populo orandum esse docuerat, v. 1. Sunt
 tamen & de regibus, & de populo nonnulli pro
 quibus orare etiam vetamur. Pro quo non orē,
 eūne ex lege non puniam? quid vetat? Atqui
cum hac scriberet Paulus, imperabant vel pessimi;
 hoc etiam falsum est, scriptam enim sub Clau-
 dio & hanc Epistolam fuisse certissimis argu-
 mentis evincit Ludovicus Capellus. De Nerone
 cum mentionem facit Paulus non regem, sed
Leonem, id est belluam immanem vocat, cujus
 ex ore ereptum se gaudet, 2 *Tim.* 4. Pro regibus
 itaque, non pro belluis, *orandum ut vitam tran-*
quillam & quietam transigamus, cum pietate ta-
men omni & honestate. Vides non tam regum
 hic quàm tranquillitatis, pietatis, honestatis
 etiam

etiam rationem esse habendam. Quis autem populus non se suosque liberos tuendo (contra tyrannum an contra hostem nihil interest) vitam *solicitam, inquietam, bellicosam, honestam* agere, quàm sub hoste vel tyranno, non solum æquè *solicitam & inquietam*, sed turpem etiam, servilem & inhonestam. Te ipsum testem adhibebo, non quo tanti sis, sed ut perspiciant omnes quàm sis duplex, & fraudulentus, & mancipium regis mercenarium. *Quis, inquis, non perferre mallet in repub. Aristocratica ex optimatum amulatione dissensiones oriri solitas, quàm ex uno monarcha, tyrannico morè imperare consueto, certam miseriam ac perniciem? Populus Romanus prætulit statum illum Reipub. quantumlibet discordiis agitata iugo Caesarum intolerabili. Populus qui vitanda seditionis causa monarchicum statum praoptavit, ubi expertus est levius esse malum quod vitare voluit, ad priora saepe redire expetit.* Hæc & plura tua verba sunt in illa de episcopis dissertatione, sub Walonis Messalini adscititio nomine edita, pag. 412. contra Petavium Loiolitam, cum ipse magis Loiolita sis, & eo de grege pessimus. Quid hac de re Scriptura sacra statuerit, & vidimus & omni diligentia investigasse non poenitet: unde quid senserint Patres antiqui per tot ingentia volumina exquirere pretium fortasse operæ non erit. Si quid enim afferunt, quod scriptura non exhibuit, eorum auctoritatem, quan-

quantacunque sit, meritò repudiamus. Quod autem ex Irenæo profers, *reges Dei jussu constitui aptos his qui in illo tempore ab eis reguntur*, cum scripturâ pugnat evidentissimè. Cum enim judices ad regendum populum suum aptiores regibus esse palàm significâsset Deus, id tamen totum voluntati atque arbitrio populi permisit, ut aptiorem sibi sub optimatibus formam reipub. deteriore sub regibus, si velent, permutarent. Legimus etiam sæpe regem malum bono populo datum, & contra, regem bonum populo malo. Virorum itaque sapientissimorum est perspicere quid populo aptissimum & utilissimum sit: constat enim neque omni populo, neque idem semper eundem reipub. statum convenire, sed vel hunc vel illum, prout civium virtus & industria nunc augefcit, nunc minuitur. Qui tamen potestatem adimit populo eligendi sibi quam velit reipub. formam, adimit profectò id in quo civilis libertas tota fere consistit. Citas deinde Justinum Martyrem Antoninis imperatorum optimis obsequium deferentem; quis non iis tam egregiis & moderatis non detulisset? *At quantò, inquis, nos hodie peiores Christiani? tulerunt illi principem diversa religionis. Privati scilicet, & viribus longè inferiores. Nunc sanè pontificii regem non ferrent reformatum, nec reformati Pontificium.* Facis tu quidem prudenter, ut ostendas te nec pontificium esse,
nec

nec reformatum ; facis etiam liberaliter, ultrò enim largiris quod nunc non petivimus, omnes hodie Christianos in hoc planè consentire, quod tu solus insigni audaciâ atque scelere oppugnas, Patrum etiam quos laudas dissimillimus; illi enim pro Christianis, ad profanos reges, defensiones conscribebant, tu pro rege pontificio atque deterrimo contra Christianos & Reformatos. Multa deinde ex Athenagora, multa ex Tertulliano futiliter depromis, quæ ab ipsis Apostolis multò clariùs & explanatiùs dicta jam sunt. Tertullianus autem longissimè à te dissentit, qui regem vis esse dominum: quod tu aut nescivisti, aut nequiter dissimulasti. Is enim Christianus ad Imperatorem Ethnicum in Apologetico ausus est scribere, non oportere imperatorem appellari Dominum *Augustus*, inquit, *imperii formator ne dominum quidem dici se volebat, hoc enim Dei est Cognomen. dicam planè imperatorem dominum, sed quando non cogor ut dominum Dei vice dicam: Caterùm liber sum illi, Dominus meus Deus unus est, &c.* & ibidem qui pater patria est, quomodo dominus est? Gratulare nunc tibi de Tertulliano, quem sanè præstabat missum fecisse. *At parricidas appellas qui Domitianum interfecerunt.* Rectè appellat; uxoris enim & famulorum insidiis, à Parthenio, & Stephano interceptarum pecuniarum reo est interfectus. Quod si Senatus Populùsque Romanus hostem judicatum, ut Neronem priùs

priùs judicabant, & ad supplicium quærebant, more majorum punivissent, eos parricidas appellaturum fuisse censes? immo si appellâisset, dignus ipse supplicio fuisset; uti tu furcâ jam dignus es. Origeni responsum idem quadrabit quod Irenæo. Athanasius reges terræ ad humana tribunalia vocare nefarium esse dicit. Quis hoc dixit Athanasio? verbum enim Dei nullum hic audio. Credam itaque ego imperatoribus potiùs & regibus de se falsum hoc esse fatentibus, quàm Athanasio. Adfers deinde Ambrosium ex proconsule & catechumeno episcopum, verba illa Davidis, *tibi soli peccavi*, imperitè, ne dicam assentatoriè interpretantem. Volebat is omnes alios imperatori subiectos esse, ut imperatorem ipse subjiceret sibi. Quàm enim superbè, & fastu plùs quàm pontificio Theodosium imperatorem Mediolanti tractaverit, cædis Thessalonicensis reum ipse judicaverit, ingressu ecclesiæ prohibuerit, quàm se deinde novitium & rudem euangelicæ doctrinæ ostenderit, omnibus notum est. Imperatorem ad pedes ejus provolutum excedere salutatorio jussit; sacris tandem restitutum, & postquam obtulisset, altari adstantem his vocibus extra cancellos exegit. *O imperator interiora loca tantùm sacerdotibus sunt attributa, quæ cæteris contingere non licet.* Doctôrne hic Evangelii, an Judaicorum pontifex rituum fuit? Hic tamen (quæ omnium ferè ecclesiasticorum

corum artes sunt) imperatorem cæteris dominum imposuit, ut imperatoris ipse dominus esset. His itaque verbis Theodosium tanquam sibi subjectum repulit; *Coequalium hominum es imperator & conservorum; unus enim omnium dominus rex & Creator.* Bellè profectò; quam veritatem calliditas & assentatio episcoporum obscuravit, eam iracundia unius, & ut mollius dicam, zelus ineruditus protulit in lucem. Ambrosii imperitiæ tuam subjungis ignorantiam aut hæresin, qui disertè negas *sub veteri fœdere remissionem peccatorum per sanguinem Christi locum tunc habuisse, cum David Deo confitebatur ei soli se peccavisse.* p. 68. Orthodoxi, non nisi per sanguinem agni mactati ab initio mundi, peccata unquam remissa fuisse credunt; te novum hæreticum cujusnam discipulus sis nescio; certè summi Theologi discipulus ille quem exagitas, à vero non aberravit, cum dixit potuisse quemvis è populo pari jure cum Davide Deum his verbis inclamasse, *tibi soli peccavi.* Augustinum deinde ostentas, Clericos Hipponenses nescio quos producis; nam Augustini quæ sunt abs te allata nobis non obfunt. Quidni enim fateamur cum propheta Daniële, Deum tempora mutare, regna dare, & regna auferre, per homines tamen. Si regnum Deus solus Carolo dedit, idem Carolo abstulit, optimatibus & Populo dedit. Si eà de causâ præstandum Carolo obedientiam fuisse dicis,

dicis, eandem nunc magistratibus nostris præstandam esse dicas necesse est. Nam Deum & nostris etiam magistratibus eandem dedisse potestatem quam dat malis regibus *ad castiganda populi peccata* ipse concedis; nostros itaque à Deo pariter constitutos remove à magistratu nemo vel tuo iudicio nisi Deus potest. Atque ita, uti soles, tuum tibi ipse mucronem in temet vertis, tuus tibi ipse sicarius es; neque injuriâ, cum eò improbitatis & imprudentiæ processeris, eò stuporis & insanix, ut quos digito violandos non esse tot argumentis probas, eosdem omnium suorum bello persequendos esse idem affirmes. Ismaëlem Godoliæ Præfecti interfectorem ab Hieronymo parricidam esse nominatum ais, & meritò; præsidem enim Judææ, virum bonum, sine ulla causa interemit. Idem Hieronymus in Ecclesiasten, præceptum illud Salomonis, *Os regis observa*, cum præcepto Pauli concordare dixit; & laudandus quidem, quod locum istum cæteris sui temporis moderatiùs exposuit. *Ad inferiora tempora post Augustinum non descendes, ut doctorum sententiam exquiras.* Ut omnes tamen intelligant faciliùs mentiri te posse quàm tacere, si quos adhuc haberes tuæ sententiæ fautores, post unam statim periodum non temperas tibi quò minus ad Hispalensem Isidorum, Gregorium Turonensem, Ottonem Frisingensem etiam in mediam barbariem descendas. Quorum au-

thori-

thoritas quàm nullius apud nos pretii sit si mo-
 dò scivisses, non huc eorum obscurum testi-
 monium per mendacium adduxisses. Vultis
 scire cur ad hæc tempora descendere non au-
 det, cur abdit se, cur subitò evanescit? dicam:
 quot sunt Ecclesiæ reformatæ præstantissimi
 doctores, tot videt acerrimos sibi adversarios
 fore. Faciat modò periculum, sentiet quàm
 facilè reluctantem, omnes in unum vires con-
 ferentem, Lutheris, Zuingliis, Calvinis, Bu-
 ceris, Martyribus, Paræis in aciem educitis fun-
 dam atque obruam. Leydenes etiam tuos tibi
 opponam, quorum Academia, quorum res-
 pub. florentissima, libertatis olim domici-
 lium, isti denique literarum humaniorum fon-
 tes atque rivi, servilem illam æruginem
 tuam & innatam barbariem eluere non potue-
 runt. Qui cum Theologum orthodoxum ha-
 beas neminem tibi faventem, quem tuo com-
 modo nominare possis, omnium præsidio re-
 formatorum nudatus confugere ad Sorbonam
 non erubescis: quod tu Collegium doctrinæ
 pontificiæ addiētissimum nullius apud ortho-
 doxos autoritatis esse non ignoras. Sorbonæ
 igitur absorbendum tam sceleratum tyrannidis
 propugnatorem tradimus; tam vile manci-
 pium, nostrum esse nolumus; qui *populum uni-*
versum regi ignavissimo parem esse negat, Frustra
 id in papam deonerare atque transferre con-
 tendis, quod omnes liberæ nationes, omnis re-
 ligio

ligio, omnes Orthodoxi sibi sumunt, in se suscipiunt. Papa quidem cum episcopis suis, dum tenuis, & nullarum virium erat tuæ hujus fœdissimæ doctrinæ author primus extitit: iis demùm artibus magnas opes, magnamque potentiam paulatim adeprus, tyrannorum ipse maximus evasit. Quos tamen omnes sibi firmissimè devinxit, cùm populis, quorum animos jamdiu superstitione oppressos tenuerat, suaderet, non posse regibus quamlibet pessimis, nisi se fidelitatis sacramentum solvente, imperium abrogari. Verùm tu scriptores Orthodoxos devitas, & quæ communis & notissima ipsorum sententia est, eam à Papa introductam esse causatus, veritatē in invidiam rapere conaris. Quod nisi astutè faceres, appareret te neq; Papanum esse neque reformatum, sed nescio quem semibarbarum Edomæum Hei odianū, qui tyrannum quemque immanissimum tanquam Messiam cœlo demissum colas atque adores. *Demonstrasse te hoc dicis ex doctrina patrum, primorum quatuor seculorum, qua sola evangelica & Christiana censeri debet.* Perit huic homini pudor; quàm multa sunt ab illis dicta atque scripta, quæ Christus & Apostoli neque docuerunt neque approbârunt? quàm multa in quibus reformati omnes à patribus dissentiunt? Quid autem ex patribus demonstravisti? *reges etiam malos à Deo constitui.* Fac esse constitutos, ut omnia etiam mala quodammodo à Deo const

80 PRO POPULO ANGLIC.

tuuntur: eos proinde Deum solum habere judicem, supra leges esse, nullâ lege scriptâ, non scriptâ, naturali, neque divinâ posse reos fieri à subditis, neque apud subditos suos. Quare? certè nulla lex vetat, nulla reges excipit: ratio, & jus, & fas omne animadverti in omnes qui peccant indiscriminatim juber. Neque tu legem ullam scriptam, non scriptam, naturalem aut divinam protulisti quæ vetaret. Cur ergò non in reges quoque animadvertendum? quia sunt etiam mali à Deo constituti. Nebulonem te magis an bardum & caudicem esse dicam? nequissimus sis oportet qui doctrinam perniciosissimam in vulgus disseminare audeas, stupidissimus qui ratione tam stolidâ maximè nitaris. Dixit Deus Isaia 54. *Ego creavi interfectorèm ad perendum; ergo interfector supra leges est; excute hæc, & pervolve quantum voles, parem utrobique consequentiam invenies. Nam & Papa etiam eodem modo quo tyrannus à Deo est constitutus, & ecclesiæ in pœnam datus, quod supra ex scriptis etiam, tuis ostendimus; tamen quia in fastigium potestatis non ferendum tyrannidi non absimilis primatum suum evexit, cum eum, tum episcopos meliori jure tollendos esse affirmas quàm fuere constituti.* Wal. Mes. p. 4: 2. Papam & episcopos quamvis ab irato Deo constitutos ex ecclesiâ tollendos esse ais, quia sunt tyranni; tyrannos ex repub. tollendos esse negas quia sunt ab irato Deo constituti. Ineptè prorsus

prorsus & absurdé, cum enim Papa ipsam conscientiam, quæ sola regnum ejus est, invito quocumque lædere non possit, eum qui revera tyrannus esse non potest, quasi tyrannum gravissimum tollendum esse clamas, tyrannum autem verum qui vitam & facultates nostras omnes in potestate sua habet, & sine quo papa in ecclesiâ tyrannus esse nequit, eum in repub. omnino ferendum esse contendis. Hæc tua sibi invicem collata tam imperitum te tamque puerilem sive falsi sive veri argutatorem produunt, ut levitas tua, inscitia, temeritas, incogitantia neminem posthac latere queat. At ratio subest altera, *rerum vices inversæ viderentur*, quippe in melius; actum enim esset de rebus humanis, si quæ res pessimo loco sunt, in eodem semper starent: in melius inquam; auctoritas enim regia ad populum rediret, ab cujus voluntate atque suffragiis profecta primò, atque in unum ex suo numero derivata erat: potestas ab eo qui injuriam intulit, ad eum qui injuriam est passus æquissimâ lege transiret; cum tertius nemo inter homines idoneus esse possit, alienigenam enim judicare quis ferret? omnes æquè homines legibus tenerentur, quo nihil justius esse potest: Deus mortalis nemoq; esset. Quem qui inter homines constituit, non minùs in repub. scelestus est, quàm in Ecclesiâ. Tuis iterum in te armis utar. *Maximam hæresin esse ais, quâ creditur*

unum hominem in loco Christi sedere : dua ha no-
 sa Antichristum signant, infallibilitas in spiritua-
 libus, & omnipotentia in temporalibus. Apparat
 ad Primat. pag. 171. An Reges infallibiles ?
 Cur ergo omnipotentes ? aut si hoc sunt, cur
 minùs exitiales rebus civilibus quàm Papa spi-
 ritualibus ? An verò Deus res civiles prorsus
 non curat ? si non curat, certè nos curare non
 prohibet ; si curat, eandem in republicâ refor-
 mationem atque in Ecclesia vult fieri ; præfer-
 tim si infallibilitatem & omnipotentiam attri-
 butam homini easdem malorum omnium u-
 trinque causas esse exploratum sit. Non enim
 in negotiis civilibus eam patientiam præcepit,
 ut sævissimum quemlibet tyrannum respubli-
 ca ferret, Ecclesia non ferret ; immò contra-
 rium potius præcepit : & Ecclesiæ quidem
 nulla arma præter patientiam, innocentiam,
 preces, & disciplinam evangelicam reliquit ;
 reipublicæ & magistratibus simul omnibus
 non patientiam, sed leges & gladium, injuria-
 rum & violentiæ vindicem, in manus tradidit.
 Unde hujus hominis perversum & præposte-
 rum Ingenium aut mirari subit aut ridere ; qui
 in Ecclesiâ, Helvidius est & Thraseas & planè
 tyrannicida ; in republicâ, commune omnium
 tyrannorum mancipium & satelles. Cujus sen-
 tentia si locum habeat, non nos solùm rebella-
 vimus, qui regem, sed reformati etiam omnes
 qui Papam dominum invitis regibus rejec-
 runt.

runt. Jam diu autem est quòd suis ipse telis concisus jacer. Sic enim homo est, modò manus adversarii ne desit, ipse in se tela abundè suppeditat: nec quisquam ad refutandum se, aut irridendum commodiores ansas ministrat. Defessus etiam cædendo citiùs quis abscedat, quàm hic terga præbendo.

CAP. IV.



Agnam à regibus iniisse te gratiam, omnes principes & terrarum dominos demeruisse defensione hac regià te fortè putas, Salmasi, cùm illi, si bona sua, rémque suam ex veritate potiùs quàm ex adulationibus tuis vellent æstimare, neminem te pejus odisse, neminem à se longiùs abigere atque arcere debeant. Dum enim regiam potestatem supra leges in immensum extollis, admones eàdem operà omnes ferè populos servitutis suæ nec opinatæ; eoque vehementiùs impellis ut veternum illum, quo se esse liberos inaniter somniabant, repentè excutiant; moniti abs te quod non putabant, servos se esse regum. Eoque minùs tolerandum sibi esse regium imperium existimabunt, quò magis tu iis persuasum reddideris tam infinitam potestatem non suà patientià crevisse, sed ab initio ralem atque tantam ipso jure regio

natam fuisse. Ita te tuamq; hanc defensionem,
 sive populo persuaseris, sive non persuaseris,
 omnibus posthac regibus funestam, exitialem
 & execrabilem fore necesse erit. Si enim po-
 pulo persuaseris, jus regium omnipotens esse,
 regnum amplius non feret; si non persuaseris,
 non feret reges, dominationem tam injustam,
 pro jure usurpantes. Me si audiant, quibus
 integrum hoc est, seque circumscribi legibus
 patiantur, pro incerto, imbecillo, violento
 imperio quod nunc habent, curarum atque
 formidinum pleno, firmissimum, pacatissimum
 ac diuturnum sibi conservabunt. Consilium
 hoc sibi, suisque regnis adeò salutiferum si pro-
 pter authorem contempserint, sciant non tam
 esse meum, quàm regis olim sapientissimi. Ly-
 curgus enim Spartanorum rex, antiquà regum
 stirpe oriundus, cum propinquos videret suos
 Argis & Messenæ rerum potitos, regnum quæ-
 que suum in tyrannidem convertisse, sibi que
 pariter suisque civitatibus exitio fuisse, ut pa-
 triæ simul saluti consuleret, & dignitatem in
 familia sua regiam quàm diutissimè conserva-
 ret, consortem imperii senatum, & Ephoro-
 rum potestatem in ipsum regem quasi censo-
 riam, firmamentum regno suo induxit. Quo
 facto regnum suis nepotibus firmissimum in
 multa secula transmisit. Sive, ut alii volunt,
 Theopompi, qui centum amplius annis post
 Lycurgum Lacedæmone regnabat, ea modera-
 tio

tio fuit, ut popularem Ephorum potestatem
 superiorem quàm suam constitueret, eoq;
 factò gloriatus est, stabilivisse se regnum, mul-
 tòque majus ac diuturnius filiis reliquisse; ex-
 emplum profectò haud ignobile hodierni reges
 ad imitandum habuerint, eundem etiam consi-
 llii tutissimi authorem egregium. Majorem e-
 nim legibus dominum ut perferrent homi-
 nes hominem omnes unum, nulla lex un-
 quam sanxit; ne potuit quidem sancire. Quæ
 enim lex leges omnes evertit, ipsa lex esse non
 potest. Cùm itaque everforem te, & parricidam
 legum omnium rejiciant ab se leges, exemplis
 redintegrare certamen, hoc capite, conaris. Fa-
 ciamus itaq; periculum in exemplis: sæpe enim,
 quod leges tacent, & tacendo tantùm innuunt,
 id exempla evidentiùs docent. Ab Judæis au-
 spicabimur voluntatis divinæ consultissimis;
postea ad Christianos tecum descendemus. Initium
 autem altiùs petitum ab eo tempore faciemus,
 quo Israëlitarum regibus quocunque modo subje-
 cti, jugum illud servile cervicibus dejecerunt.
 Rex Moabitarum Eglon Israëlitas bello sube-
 gerat; sedem imperii inter ipsos Hierichunte
 posuerat: numinis contemptor non erat, factà
 enim Dei mentione, è folio surrexit: servierant
 Israëlitarum Egloni annos duodeviginti; non ut
 hosti, sed ut suo regi munus milerant. Hunc
 tamen dū publicè munerantur ut regem suum,
 interficiunt per insidias ut hostem. Verùm

Ehudes qui interfecit, Dei monitu id fecisse creditur. Quid factum hujusmodi commendare magis potuit? Ad honesta enim quæque & laudabilia hortari solet Deus, non ad injusta, infida, truculenta. Expressum autem Dei mandatum habuisse nusquam legimus, *clamârunt filii Israël ad Iehovam*; clamavimus & nos; excitavit iis Jehova servatorem; excitavit & nobis. Ille ex vicino domesticus, ex hoste rex factus erat; Noster ex rege hostis; non ergò rex erat; nam neque civis ullo modo esse potest, qui reipublicæ est hostis; neque Consul habebatur Antonius, neque Nero imperator, ex quo uterque hostis à Senatu est judiciatus. Quod Cicero quartâ Philippicâ de Antonio clarissimè docet: *Si Consul Antonius, Brutus hostis; si conservator Reipublicæ Brutus, hostis Antonius. Quis illum consulem nisi latrones putant?* Pari ego jure, quis tyrannum, inquam, regem nisi hostes patriæ putant? Fuerit itaque Eglon externus, fuerit Noster domesticus, necne quandoquidem uterque hostis & tyrannus parùm refert. Si illum Ehudes jure trucidavit, nos nostrum supplicio jure affecimus. Quin & heros ille Sampson, incusantibus etiam popularibus suis (Jud. 15. *An nesciebas Philistheos dominium habere in nos?*) suis tamen dominis bellum solus intulit, neque unum sed multos simul patriæ suæ tyrannos, sive Dei, sive propriæ virtutis instinctu occidit; conceptis prius

prius ad Deum precibus ut auxilio sibi esset. Non impium ergò sed pium Sampsoni visum est, dominos, patriæ tyrannos occidere; cum tamen pars major civium servitutem non detrectaret. At David, rex & propheta, noluit Saulem interimere *unctum Dei*. Non quicquid noluit David, continuò nos obligat ut nolumus; noluit David privatus; id statim nolle synedrium, Parlamentum, totum populum necesse erit? noluit inimicum dolo occidere, noler ergò Magistratus noxium lege punire? noluit regem occidere, timebit ergò Senatus tyrannum plectere? religio erat illi *unctum Dei* interficere, an ergò religio erit populo *unctum* suum capitis damnare? præsertim qui *unctio* nem illam vel sacram vel civilem totus cruore civium delibutus tam longâ hostilitate aboleverat? Equidem reges, vel quos Deus per prophetas unxit, vel quos ad certum opus, sicuti olim Cyrum, nominatim destinavit, Isa. 44. *unctos domini* agnosco; cæteros vel populi, vel militum, vel factionis tantummodò suæ *unctos* esse arbitror. Verùm ut concedam tibi omnes reges esse *unctos Domini*, esse tamen idcirco supra leges, non esse ob scelera quæcunque puniendos, nunquam evinces. Quid enim? & sibi & privatis quibusdam interdixit David, ne extenderent manus suas in *unctum domini*. At regibus interdixit ipse Dominus, Psal. 105, ne attingerent *unctos suos*, id est populum

suum. Unctionem sui populi prætulit unctioni, si qua erat, regum. An ergo fideles punire, si quid contra leges commiserint, non licebit? Unctum domini sacerdotem Abiatharem prope erat ut rex Salomon morte mulctaret; neque illi, quod unctus domini esset, pepercit, sed quod patris fuerat amicus. Si ergo summum sacerdotem, summum eundem in plerisque magistratum, unctio illa domini & sacra & civilis eximere supplicio non potuit, cur unctio tantum civilis tyrannum eximeret? At *Saul quoque tyrannus erat, & morte dignus*, esto: non inde enim sequetur, dignum, aut idoneum fuisse Davidem qui sine populi autoritate, aut magistratum iussu Saulem regem quocunque in loco interficeret. Itane verò Saul tyrannus erat? Utinam diceret; quin immo dicis; cum tamen suprà dixeris, *cap. 2. pag. 32. Tyrannum non fuisse, sed bonum & electum*. Ecquid causæ est nunc cur in foro quadruplator aut falsarius quispiam stigmatè notetur, tu eadem careas ignominia notà? cum meliori profectò fide lycophantari soleant illi, quàm tu scribere, & res vel maximi momenti tractare. Saul igitur, si id ex usu est tuo, bonus erat rex, sin id minùs tibi expedit, repentè non rex bonus, sed tyrannus erit; quod certè mirum non est; dum enim potentia tyrannicæ tam impudenter lenocinaris, quid aliud facis quàm ex bonis regibus tyrannos omnes. At verò David quamvis regem

regem focerum multis de causis, quæ ad nos nihil attinent, interimere nolle, sui tamen tuendi causâ copias comparare, Saulis urbes vel occupare vel insidere non dubitavit; & Chelam oppidum contra Saulem etiam præsidio tenuisset, nisi oppidanos erga se malè animatos cognovisset. Quid si Saul urbe obsessa, scalis muro admotis, primus ascendere voluisset, an censes Davidem arma protinus abjecturum, suos omnes uncto hosti proditurum fuisse? non existimo. Quidni enim fecisset quod nos fecimus, qui rationum suarum necessitate coactus, Phelithæis patriæ hostibus operam prolixè suam pollicitus, id fecit contra Saulem quod nos in nostrum tyrannum credo nunquam fecissemus. Pudet me, & jam diu pertæsum est mendaciorum tuorum; *Inimicis potius parcendum quàm amicis*, Anglorum esse dogma fingis; *seque regi suo parcere non debuisse, quia amicus erat*. Quis unquam hoc priùs audivit, quàm à te confictum esset, hominum mendacissime. Verùm ignoscimus: deerat nempe huic capiti præstantissimum illud & tritissimum orationis tuæ pigmentum, jam quintò, & ante finem libri decies ex oculis tuis & myrotheciis expromendum, *molossis suis ferociores*. Non tam Angli suis molossis ferociores sunt, quàm tu cane quovis rabido jejuniore, qui ad illam, quam toties evomuisti, cramben duris ilibus identidem redire sustines.

David

David denique *Amelechitam* interfici jussit, Saulis, ut simulavit ipse, interfectorem; nulla hic neque facti neque personarum similitudo. Quod nisi David ad Phelisthaeos defecisse, & pars eorum exercitus fuisse visus, eò diligentius omnem à se suspicionem maturandæ regi necis amovere studuit, non erat, meo quidem judicio, cur virum illum tam malè exciperet, qui moribundum jam regem & ægrè morientem opportuno vulnere se confecisse nuntiavit. Quod idem factum in Domitiano, qui Epaphroditum similiter capite damnavit, eò quod Neronem in adipiscenda morte adjuvisset, ab omnibus reprehenditur. Novâ deinde audaciâ quem tyrannum modò dixeras, & *ma-
lo spiritu agitatum*, hunc non jam satis habes unctum Domini, sed *Christum domini* vocare; adeò tibi vile Christi nomen videtur, ut illo tam sancto nomine vel Dæmoniacum tyrannum impertire non metuas. Venio nunc ad exemplum illud, in quo qui jus populi jure regis antiquius esse non videt, cæcus sit oportet. Mortuo Salomone populus de constituendo ejus filio Sechemi comitia habebat; profectus est eò Roboamus candidatus, ne regnum tanquam hæreditatem adire, ne populum liberum tanquam paternos boves possidere videretur: proponit populus conditiones regni futuri; ad deliberandum rex triduum sibi dari postulat; consulit seniores; nihil illi de jure re-
gio,

gio, sed ut populum obsequio & pollicitationibus conciliet sibi suadent, penès quem erat, vel illum creare regem vel præterire. Consulit deinde æquales suos, secum à pueris educatos; illi Salmasiano quodam œstro perciti, nil præter jus regium intonare, scuticas & scorpiones ut miniteretur hortari. Horum ex consilio respondit Roboamus populo. Videns itaque totus Israël regem *non auscultasse sibi*, suam protinus libertatem & populare jus liberis palàm vocibus testatur. *Qua nobis portio cum Davide? ad tentoria tua Israël; jam ipse videris de domo tuâ David.* Missum deinde a rege Adoram lapidibus obruerunt; exemplum fortasse aliquod etiam in regem edituri, nisi maxima celeritate se in fugam contulisset. Parat ingentem exercitum, quo in suam ditionem Israëlitas redigeret: prohibet Deus; *ne ascendite, inquit, ne pugnetis contra fratres vestros, filios Israël, nam à me facta est res ista.* Adverte jam animum; populus antea regem volebat, displicuit id Deo; eorum tamen juri noluit intercedere: nunc Populus Roboamum non vult regem, id Deus non solum penes populū esse finit, sed regē eo nomine bella moventem vetat ac reprimat: nec ideo rebelles, sed nihilo minùs fratres eos qui desciverant appellandos esse docet. Collige te nunc jam; sunt omnes, inquis, reges à Deo, ergo populus vel tyrannis resistere non debet. Vicissim ego, sunt, inquam, populi

92 PRO POPULO ANGELIC.

puli conventus, comitia, studia, suffragia, plebisciter pariter à Deo, teste hic ipso; ergò & rex iridem resistere non debet populo, auctore etiam eodem Deo. Quàm enim certum est, esse hodie reges à Deo, quàmque hoc valet ad imperandam populo obedientiam, tam est certum esse à Deo etiam hodie libera populi concilia, tamq; hoc valet ad cogendos in ordinem reges, vel ad rejiciendos; neq; magis propterea bellum populo inferre debebunt, quàm debuit Roboamus. Quæris cur ergò non defecerint Israëlitaræ à Salomone? Quis præter te tam stulta interrogaret, cum defecisse constet impunè à tyranno? In vitia quædam lapsus est Salomon; non idcirco statim tyrannus: sua vitia magnis virtutibus, magnis de repub. meritis compensabat: fac tyrannum fuisse; sæpe est ut populus nolit tyrannum tollere, sæpe est ut non possit: satis est sustulisse cum potuerit. At *factum Ieroboami semper improbatum fuit & Apostasia ejus detestata, successores ejus pro rebellibus semper habiti.* Apostasiam ejus non à Roboamo, sed à vero cultu Dei reprehensam sæpius lego; & successores quidem ejus sæpe reprobos, rebelles nusquam dictos memini. *Si quid fiat, inquis, juri & legibus contrarium, ex eo jus fieri non potest.* Quid quæso tum fiet juri regio? Sic tuus ipse perpetuò refutator es. *Quotidie, inquis, adulteria, homicidia, furtiva impunè committuntur.* An nescis nunc te tibi respondere querenti cur
roties

toties tyrannis impunè fuerit? *Rebelles fuerunt isti reges, propheta tamen populum ab eorum subjectione non abducebant.* Cur ergò, sceleste, & pseudopropheta, populum Anglicanum à suis magistratibus, tuo sint licet iudicio rebelles, abducere conaris? *Allegat, inquis, Anglicani latrocinii factio. se ad id scelus, quod tam nefariè suscepit, nescio quâ voce cœlitus missâ impulsos fuisse.* Primùm delirâsse te cùm hæc scriberes planè video, neque mentis neque latinitatis compotem satis fuisse: deinde Anglos hoc unquam allegâsse, de innumeris mendaciis & figmentis tuis est unum. Sed pergo exemplis tecum agere; *Libna* Urbs validissima ab Joramio rege defecit, quia dereliquerat Deum; defecit ergò rex, non urbs illa, neque defectione ista notatur; sed si adjectam rationem spectes, approbari potiùs videtur. *In Exemplum trahi non debent huiusmodi defectiones.* Cur ergò tantâ vaniloquentiâ pollicitus es, exemplis te nobiscum toto hoc capite decertaturum, cùm exempla ipse nulla præter meras negationes, quarum nulla vis est ad probandum, afferre possis: nos quæ certa & solida attulimus, negas in exemplum trahi debere? Quis te hoc modo disputantem non explodat? Provocâsti nos exemplis; exempla protulimus; quid tu ad hæc? tergiversaris, & diverticula quæris; progredior itaque. Jehu regem à Propheta jussus occidit, etiam Achaziam suum regem legitimum occidendum curavit. Si no-

luisset

luisset Deus tyrannum interimi à cive, si impium hoc, si mali exempli fuisset, cur jussit fieri? si jussit, certè licitum, laudabile, præclarum fuit. Non tamen tyrannum perimi, quia Deus jussit, idcirco bonum erat & licitum, sed quia bonum & licitum erat, idcirco Deus jussit. Jam septem annos regnantem Arthalam Jehoida sacerdos regno pellere & trucidare non est veritus. *At regnum, inquis, non sibi debitum sumpserat.* Annon Tiberius multò postea *imperium ad se nihil pertinens?* illi tamen, & id genus tyrannis aliis, ex doctrina Christi obediendum esse suprà affirmabas: ridiculum planè esset, si potestatem regiam non ritè adeptum interficere liceret, pessimè gerentem non liceret. At per leges regnare non potuit utpote scœmina, *constitues autem super te regem*, non reginam. Hoc si sic abibit, constitues, inquam, super te regem, non tyrannum. Pares ergo jam sumus. Amaziam regem ignavum & Idololatram non conjurati quidam, sed principes & populus, quòd verisimilius est, morte affecerunt: nam fugientem Hierosolymus, & adjutum à nemine, Lachisum usque persecuti sunt. Hoc consilium iniisse dicuntur *ex quo is Deum deseruerat*, neq; ullam ab Azaria filio de morte patris quæstionem habitam fuisse legimus. Multum rursus nugaris ex Rabbinis, ut Regem Judaicum supra synedrium constituas; ipsa regis verba Zedechiæ non attendis. Jer. 38. *Non is est*

est rex qui possit contra vos quicquam. Sic principes alloquitur; fassus se planè suo senatu inferiore; *Fortasse*, inquis, *nihil negare illis ausus metu seditionis*. At tuum illud *fortasse* quanti quæso est, cujus asseveratio firmissima non est pili? quid enim te levius, quid inconstantius, quid instabilius? quoties te varium & versicolorem, quoties tibimet discordem, dissidentem à temetipso, & discrepantem offendimus? Rursus comparationes instituis Caroli cum bonis Jūdææ regibus. Davidem imprimis quasi contemnendum aliquem nominas; *Sume tibi Davidem*, inquis, *adulterii simul & homicidii reum; nihil tale in Carolo*. *Salomon ejus filius qui sapiens audit vulgo*. Quis non indignetur maximorum & sanctissimorum virorum nomina ab impurissimo nebulone & vappâ hunc in modum jactari? Tunc Carolum cum Davide, regem & prophetam religiosissimum cum superstitioso & Christianæ doctrinæ vix initiato, sapientissimum cum stolido, fortissimum cum imbelli, justissimum cum iniquissimo conferre sustinuisti? castimoniam tu ejus & continentiam laudes, quem cum Duce Buchingamio flagitiis omnibus coopertum novimus? secretiora ejus & recessus perscrutari quid attinet, qui in Theatro medias mulieres petulanter amplecti, & suaviari, qui virginum & matronarum papillas, ne dicam cætera, pertractare in propatulo consueverat? Te
 porro

porro moneo Pseudoplutarche, ut istiusmodi Parallelis ineptissimis dehinc superse-
deas, ne ego, quæ tacerem alioqui libens de
Carolo, necesse habeam enuntiare. Contra ty-
rannos quid tentatum a Populo aut peractum
fuerit, & quo jure, per ea tempora quibus ipse
Deus Hebræorum reipub. suo nutu ac verbo
quasi præsens regebat, hætenus liquet. Quæ
sequuntur ætates non nos sua autoritate du-
cunt, sed ad majorem suorum normam & ra-
tionem omnia dirigentes, imitatione sua nos-
tram tantummodò confirmant. Cum itaque
Deus post captivitatem Babylonicam nullum
iis de reipub. mandatum dedisset novum, quam-
vis regia soboles extincta non esset, ad anti-
quam & Mosaicam reipub. formam reverte-
runt. Antiocho Syriæ regi, cui erant vectiga-
les, ejusque præsidibus, quòd is vetita impera-
ret, per Maccabæos pontifices restiterunt; se-
que armis in libertatem vindicarunt; dignissi-
mo deinde cuique principatum dederunt: do-
nec Hyrcanus Simonis Judæ Maccabæi fratris
filius, expilato Davidis sepulcro, militem ex-
ternum alere, & regiam quandam potestatem
adjicere sacerdotio cœpit; unde filius ejus A-
ristobulus diadema sibi primus imposuit. Ni-
hil in eum populus quamvis tyrannum movit
aut molitus est; neque mirum, annum tantum-
modò regnantem. Ipse etiam morbo gravissi-
mo correptus, & suorum facinorum pœni-
tencia

tentia ductus mortem sibi optare non destitit, donec inter ea vota expiravit. Ejus frater Alexander proximus regnabat. *Contra hunc aïs neminem insurrexisse*, tyrannus cum esset. O te securè mendacem si periisset Josephus, restaret tantum *Iosippus* tuus, ex quo pharisaëorum quædam nullius usus apophthegmata depromis. Res itaque sic se habet; Alexander, cùm & domi & militiæ rempub. malè administraret, quamvis magna Pisidarum & Cilicum manu conductitia se tutaretur, populum tamen cohibere non potuit, quin ipsum etiam sacrificantem, utpote indignum eo munere, thyrsis palmeis & citreis penè obrueret; exinde per sexennium gentis ferè totius gravi bello petitus est; in quo Judæorum multa millia cùm occidisset, & pacis tandem cupidus interrogaret eos quid vellent a se fieri, responderunt uno ore omnes, ut moreretur; vix etiam mortuo se veniam datuos. Hanc historiam tibi incommodissimam, quoquo modo avertere ut posses, fraudi tuæ turpissimæ pharisaïcas quasdam sententiolas obtendisti; cùm exemplum hoc aut omnino prætermisisset, aut rem, sicuti gesta erat, fideliter narrasse debuisses, nisi veterator & lucifugus mendaciis longè plùs quàm causæ confideres. Quinetiam Pharisaï illi octingenti, quos in crucem tolli jussit, ex eorum numero erat, qui contra ipsum arma ceperant: quique omnes cùm cæteris unâ voce testati sunt,

sunt, se regem morte affecturos fuisse, si bello victus in suam potestatem venisset. Post maritum Alexandrum, Alexandra regnum cepit; ut olim Athalia, non legitimè, nam regnare foeminam leges non sinebant, quod ipse modò passus es, sed partim vi, extraneorum enim exercitum ducebat; partim gratiâ, nam Phariseos, qui apud vulgus plurimum poterant, sibi conciliaverat hac lege, ut nomen imperii penès illam, imperium ipsum penès illos foret. Haud aliter atque apud nos nuper Scoti Presbyteri nomen Regis Carolo concesserunt, eâ mercede ut regnum sibi reservare possent. Post Alexandræ obitum Hyrcanus & Aristobulus ejus filii de regno contendunt; hic viribus & industriâ potior fratrem natu majorem regno pellit. Pompeio deinde in Syriam à Mithridatico bello divertente, Judæi nactos se jam æquissimum libertatis suæ arbitrum Pompeium rati, legationem pro se mittunt; fratribus utrisque regibus renuntiant; ad servitutem se ab iis adductos queruntur; Pompeius Aristobulum regno privavit; Hyrcano pontificatum reliquit & principatum more patrio legitimum; exinde Pontifex & Ethnarcha dictus est. Iterum sub Archelao Herodis filio Judæi, missis ad Augustum Cæsarem quinquaginta legatis, & Herodem mortuum & Archelaum graviter accusarunt; regnum huic pro sua virili parte abrogarunt, Cæsarem orant ut Populum Judaicum

eum sine regibus esse permetteret. Quorum
 Cæsar precibus aliquantum permotus, non re-
 gem eum, sed Ethnarcam duntaxat constituit.
 Ejus anno decimo rursus eum Populus per le-
 gatos ad Cæsarem tyrannidis accusat; qui-
 bus Cæsar benignè auditis Romam accersi-
 tum, & judicio damnatum Viennam in exi-
 lium misit. Jam mihi velim respondeas; qui
 suos reges accusatos, qui damnatos, qui puni-
 tos volebant, annon ipsi, si potestas facta, si
 optio data sibi esset, annon ipsi, inquam, judi-
 cio damnassent, ipsi supplicio affecissent? Jam
 in Romanos præfides avarè & crudeliter pro-
 vinciam administrantes, populum & primo-
 res etiam sæpiùs arma sumpsisse non negas;
 causas more tuo stultissimas affingis, *nondum*
jugo erant assueti; sub Alexandro scilicet, He-
 rode, ejusque filiis. At C. Cæsari, & Petronio
bellum inferre noluerunt. Prudenter illi qui-
 dem, non poterant. Vis ipsorum audire verba,
 πελεμῆν μὲν ἔβηλόμενοι δὲ τὸ μὴδ' αὖ
 δύνασθαι. Quod ipse fatentur imbecillitatis ef-
 fe suæ, hoc tu hypocrita ad religionem refers?
 Magno dein molimine prorsus nihil agis, dum
 ex patribus probas, quod & antea tamen pari
 oscitatione feceras, pro regibus orandum esse.
 Nam pro bonis quis negat? pro malis quoad
 spes est; pro latronibus etiam & pro hostibus,
 non ut agros depopulentur, aut nos occisione
 occidant, sed ut resipiscant. Oramus pro utrif-
 que;

que; illos tamen legibus, hos armis vindicare quis vetat? *Liturgias Ægyptiacas* nŕl moror; sacerdos autem ille qui orabat, uti ais, ut *Commodus patri succederet*, meo quidem iudicio non orabat, sed Romano imperio pessima imprecatus est. *Fidem*, ais, *fregisse nos, de authoritate & maiestate regis conservanda solenni conventionem non semel interposita.* Exspecto te fusiùs ista de re infrà, illic te rursus conveniam. Redis ad patrum commentationes, de quibus hoc summatim accipe; Quicquid illi dixerint, neque ex libris sacris, aut ratione aliqua satis idonea confirmaverint, perinde mihi erit, ac si quis alius è vulgo dixisset. Primum adfers Tertullianum, scriptorem haud orthodoxum, multis erroribus notatum, ut si tecum sentiret, pro nihilo tamen hoc esset. Quid autem ille? damnat tumultus, damnat rebelliones; damnamus & nos, neque hinc statim de jure omni populorum, de privilegiis, & Senatus consultis, de potestate magistratuum omnium cæterorum præterquam unius regis, præjudicatum esse volumus: loquuntur isti de seditionibus temere conflatis, & multitudinis insaniã, non de magistratibus, non de Senatu, aut Parlamento ad legitima arma populum contra tyrannos convocante. Unde Ambrosius quem citas, *Non repugnare, flere, gemere, hæc sunt munimenta Sacerdotis, & quis est qui potest vel unus vel inter paucos dicere Imperatori, Lex tua mihi non probatur:*

batur : non permittitur hoc dicere Sacerdotibus, permittetur Laïcis ? Vides jam planè de quibus hic loquatur , de Sacerdotibus, de Laïcis privatis, non de Magistratibus : vides quàm infirma tamen & præpostera ratione usus , dissensionis inter Laïcos & Sacerdotes , de legibus etiam civilibus , postmodùm futuræ facem prætulit. Sed quoniam primorum Christianorum exemplis urgeri nos maximè, & redargui putas, quòd illi, omnibus modis vexati bellum in Cæsares non moverent , ostendam primò non potuisse , deinde quoties poterant movisse, postremò etiamsi , cum possent , non movissent, non esse tamen cæteroqui dignos quorum ex vitâ & moribus, tantis in rebus, exempla sumamus. Primùm ignorare hoc nemo potest, ex quo Romana respublica nulla fuit , omnes imperii vires rerumque summam ad unum Cæsarem rediisse; omnes legiones sub uno Cæsare stipendia meruisse: aded ut Senatus ad unum omnis , totus ordo Equester , plebs universa, si novis rebus studuisset, poterant se quidem internecioni objecisse , ad libertatem tamen recuperandam nihil prorsus effecissent; nã imperatorem si forte sustulissent, imperium tamen mansisset. Jam verò Christiani , innumerilicet, at sparsi , inermes , plebelli & plerunque infimi, quid potuerunt ? quantum eorum multitudinem una legio in officio facile continuisset? Quod magni sæpe duces cum interitu suo &

veteranorum exercituum deletionem incassum tentarunt, isti è plebecula fere homuli posse se ad exitum perducere sperarent? cum annis à Christo nato prope trecentis, ante Constantinum plus minus viginti, imperante Diocletiano, sola Thæbea legio Christiana esset; eoque ipso nomine à reliquo exercitu in Gallia ad Octodurum oppidum cæsa est. *Cum Cassio, cum Albino, cum Nigro* non conjurârunt: idne illis gratiæ vult apponi Tertullianus, quòd sanguinem pro infidelibus non profuderunt? Constat igitur Christianos ab imperatorum imperio liberare se non potuisse; cum aliis conjurare non Christianis nequaquam sibi expedivisse, quamdiu imperatores Ethnici regnabant. Bellum autem tyrannis postea intulisse Christianos aut armis se defendisse, aut tyrannorum facta nefaria sæpe ultos esse nunc ostendam. Primus omnium Constantinus jam Christianus consortem imperii Licinium Orientalibus Christianis gravem bello sustulit; quo facto illud simul declaravit, posse à magistratu in magistratum animadverti, cum is Licinium pari jure secum regnantem subditorum ejus causâ supplicio affecerit, nec Deo soli pœnam reliquerit: poterat enim Licinius Constantinum, si Constantinus populum sibi attributum iis modis oppressisset, eodem supplicio affecisse. postquam igitur à Deo ad homines redacta res est, quod Licinio Constantinus erat,

cur non idem Carolo Senatus? Constantinum enim milites, Senatum jura constituerunt regibus parem, immo superiorem. Constantio imperatori Arriano Byzantini, quoad poterant, armis restiterunt; missum cum militibus Hermogenem, ad pellendum ecclesiâ Paulum orthodoxum episcopum, facto impetu repulerunt, & incensis ædibus, quos se receperat, semiustum & laniatum interfecerunt. Constantis fratri Constantio bellum minatur, ni Paulo & Athanasio episcopis sedes suas restituat; videsne ut istos sanctissimos patres, de episcopatu cum agitur, bellum fraternum in regem suum concitare non puduit? Haud multò post Christiani milites, qui tunc temporis quos volebant imperatores creabant, Constantem Constantini filium dissolutè & superbè regnantem interfecerunt, translato ad Magnentium imperio. Quid? qui Julianum nondum apostatam, sed pium & strenuum, invito Constantio imperatore suo imperatorem salutârunt, annon ex illis Christianis fuerunt, quos tu exemplo nobis proponis? Quod factum Constantius cum suis literis ad populum recitatis acriter prohiberet, clamarunt omnes, fecisse se ut Provincialia, & miles, & reipublicæ auctoritas decreverat. Iidem bellum Constantio indixerunt, & quantum in se erat, imperio ac vita spoliârunt. Quid Antiocheni, homines apprime Christiani? orarunt credo pro Juliano

jam Apostatâ, quem palâm adire, & convitiis, proscindere solebant; cujus barbam illudentes promissam, funes ex ea conficere jubebant. Cuius morte audita supplicationes, epulas, & lætitiâ publicè indixerunt, ejus pro vita & incolumitate preces fuisse censet? Quid? quodd eundem etiam à Christiano commilitone interfectum esse ferunt. Sozomenus certè scriptor ecclesiasticus non negat; immo, si quis ita fecisset, laudat. *ἡ δὲ ἀπειρία τὴν αὐτῶν τὴν σέξ-
την ἀποφύων*, &c. *Non est mirum*, inquit, *aliquem ex militibus hoc secum cogitasse; non Gracos solum, sed omnes homines ad hanc usque ætatem tyrannicidas laudare solitos esse. qui pro omnium libertate mortem oppetere non dubitant; nec temere quis hunc militem reprehendat, Dei & religionis causâ tam strenuum.* Hæc Sozomenus ejusdem ætatis scriptor, vir bonus & sanctus; ex quo quid reliqui eâ tempestate viri boni hac de re senserint, facillè perspicimus. Ipse Ambrosius ab imperatore Valentiniano minore jussus urbe Mediolano excedere, parere noluit, sed circumseptus armato populo se atque basilicam suam contra regios præfectos armis defendit; & summæ potestati resistere, contra quam docuit ipse, est ausus. Constantinopoli haud semel propter exilium Chrysostomi contra Arcadium imperatorem seditio maxima commota est. In tyrannos igitur quid antiqui Christiani fecerint, non milites solum, sed populus, sed ipsi

ipsi patres, vel resistendo, vel gerendo bellum, vel concitando, usque ad Augustini tempora, quoniam tibi ulterius progredi non libet, breviter exposui. Valentinianum enim Placidiae filium interfectum à Maximo patricio, ob stuprum uxori ejus illatum, taceo: Avitum etiam imperatorem dimissis militibus suis luxuriâ diffluentem à Senatu Romano confestim exutum imperio non memoro: quia annos aliquot post Augustini obitum ista acciderunt. Verùm dono tibi hoc omne, tu nihil horum exposuisse me finge, paruerint per omnia suis regibus veteres christiani, quicquam contra tyrannos ne fecerint, aut fecisse voluerint, non esse tamen eos quorum authoritate niti debeamus, aut à quibus exempla petere salutariter possimus, quod superest, nunc docebo. Jam diu ante Constantinum populus christianus multum de primæva illa sanctimonia & sinceritate cùm doctrinæ tum morum deperdiderat. Postquam immensis opibus ditata ab eo ecclesia, honores, dominatum, & potentiam civilem adamare cœpit, statim omnia in præceps ruere. **Primo** luxur & segnities, errorum deinde omnium & vitiorum caterva, veluti solutis aliunde carceribus, in ecclesiam immigravit, hinc invidentia, odium, discordia passim redundabat; tandem haud mitius inter se charissimo religionis vinculo fratres quàm hostes acerrimi dissidebant; nullus pudor, nulla officii ratio

F 3

restabat;

restabat; milites, & copiarum præfecti quoties ipsis visum erat, nunc imperatores novos creabant, nunc bonos pariter ac malos necabant. Quid Vetranniones & Maximos, quid Eugenios à militibus ad imperium subito evectos, quid Gratianum optimum principem, quid Valentinianum minorem non pessimum, occisos ab iis commemorem? Militum hæc quidem facinora & castrensium, sed tamen christianorum illius ætatis, quam tu maximè evangelicam & imitandam esse ais. Jam ergò de ecclesiasticis pauca accipe: pastores & Episcopi, & nonnunquam illi, quos admiramur, patres, sui quisque gregis ductores, de episcopatu non secus quàm de tyrannide certabant: nunc per urbem, nunc in ipsa ecclesia, ad ipsum altare sacerdotes, & Laici promiscuè digladiabantur; cædes faciebant, strages utrinque magnas nonnunquam ediderunt. Damasi & Ursicini, qui cum Ambrosio floruerunt, potes meminisse. Longum esset Byzantinos, Antiochenos, & Alexandrinos illos tumultus, sub Cyrillo præsertim, quem tu laudas obedientiæ prædicatorem, duce ac patre; occiso pæne à monachis in illo urbico prælio, Oreste Theodosii præfecto. Jam tua quis vel impudentia vel supinitate non obstupescat? *Vsq̃ue ad Augustinum, inquis, & infra ejus ætatem, nulla ejusquam privati aut præfecti, aut plurimum conjuratorum extat in historiis mentio, qui regem suum*

suum necaverint, aut contra eum armis pugna-
rint: nominavi ego ex historiis notissimis &
privatos, & proceres, qui non malos tantum,
sed, vel optimos reges suâ manu trucidaverint;
totos christianorum exercitus, multos cum iis
episcopos, qui contra suos imperatores pugna-
verint. Adfers patres, obedientiam erga regem,
multis verbis aut suadentes aut ostentantes;
adfero ego partim eosdem, partim alios patres
haud paucioribus factis obedientiam, etiam
licitis in rebus, detrectantes, armis se contra
imperatorem defendentes, alios præsidibus e-
jus vim & vulnera inferentes, alios, episcopa-
tûs competitores, civilibus præliis inter se di-
micantes; scilicet de episcopatu christianos
cum christianis, cives cum civibus configere
fas erat, de libertate, de liberis & conjugibus,
de vita, cum tyranno, nefas. Quem non pœni-
teat hujusmodi patrum? Augustinum inducis
de potestate domini in servos, & regis in subditos
idem pronuntiantem; respondeo, ista si dicat
Augustinus, ea dicere quæ neque Christus ne-
que ejus Apostoli unquam dixerunt; cum eo-
rum tamen solâ autoritate rem alioqui aper-
tissimè falsam commendare videatur. Quæ su-
per sunt hujus capituli tres vel quatuor paginae,
aut mera esse mendacia, aut oscitationes iden-
tidem repetitas, ex iis quæ à nobis responsa jam
sunt, per se quisque deprehender. Nam ad Pa-
pam quod attinet, in quem multa gratis pero-

ras, facile te patior ad ravim usque declamitare. Quod tamen ad captandos rerum imperitos tam prolixè adstruis, *regibus sive justis sive tyrannis subjectum fuisse omnem christianum, donec potestas papa regali major agnosci cœpta est, & subjectos sacramento fidelitatis liberavit*, id esse falsissimum plurimis exemplis & usque ad *Augustinum, & infra ejus ætatem* prolatis demonstravimus. Sed neque illud quod postremò dicis, *Zachariam pontificem Gallos juramento fidelitatis absolvisse*, multò verius esse videtur. Negat Franciscus Hotomanus, & Gallus, & jurisconsultus, & vir doctissimus in *Francia sua cap. 13. abdicatum* autoritate *Papæ Chilpericum*, aut regnum *Pipino delatum*; sed in magno gentis concilio pro sua pristina autoritate transactum fuisse id omne negotium, ex annalibus Francorum vetustissimis probat. Solvi deinde illo sacramento Gallos omnino opus fuisse, negant ipsa Gallorum monumenta, negat ipse papa Zacharias. Monumentis enim Francorum traditur, teste non solum *Hotomanno*, sed *Girardo* historiarum illius gentis notissimo scriptore, veteres Francos ut eligendi, sic abdicandi, si videretur, suos reges jus sibi omne antiquitus reservasse; neque aliud sacramentum regibus, quos creabant, dicere consuevisse, quàm se illis hoc pacto fidem & officium præstituros, si vicissim illi quòd eodem tempore jurati etiam spondent, præstiterint.

rint. Si ergò Reges rempublicam sibi commissam malè gerendo, fidem jusjurandi fregerint priores, nil opus est Papà, ipsi sua perfidia populum sacramento solverunt. Papa denique Zacharias, quam tu auctoritatem sibi aïs arrogàsse, eam in epistolâ illâ ad Francos à te citatâ ipse sibi derogavit, populo attribuit. *Nam si princeps populo, cujus beneficio regnum possidet, obnoxius est, si plebs regem constituit, & destituere potest*, quæ ipsius verba sunt Papæ, verisimile non est voluisse Francos de antiquo jure suo, ullo postmodùm jurejurando, præjudicium facere; aut unquam ita sese obstrinxisse, quin semper sibi liceret quod majoribus suis licuit, reges bonos quidem colere, malos amovere; nec eam præstare fidem tyrannis, quam bonis regibus sese dare arbitrati sunt. Tali obstrictum juramento populum, vel tyrannus ex rege factus, vel ignaviâ corruptus, suo ipse perjurio solvit, solvit ipsa justitia, solvit naturæ lex ipsa: unde pontifex quod solveret, etiam ipsius pontificis judicio nihil prorsus erat.

C A P. V.



Uanquam in ea sum opinione, Salmasi, semperque fui, legem Dei cum lege naturæ optimè consentire, adeoque si factis ostendi quid divina lege

III PRO POPULO ANGLIC.

fit de regibus statutum, quid à populo Dei factum & Judaïco & Christiano, ostendisse me eodem tempore eadèmq; operà quid legi naturali maximè consentaneum sit; tamen quia *confutari nos lege natura validissimè nunc posse* arbitraris, quod supervacuum esse modò existimabam, id nunc ultrò necessarium fatebor; ut contra te hoc capite planum fatiam, nihil congruentius naturæ etiam legibus esse, quàm tyrannos plecti. Id nisi evincam, non recuso quin Dei quoque legibus puniri non posse, è vestigio tibi concedam. Non est consilium de natura jam, déque origine civilis vitæ longam orationem contexere; istud enim argumentum viri disertissimi cùm Græci tum Latini copiosè pertractarunt; ipse & brevitati, quantum licet, studeo, & huic rei do operam ut non tam ego, qui labori huic parvissem libens, sed tute te redarguas, teque subvertas. Ab eo igitur quod ipse ponis, incipiam, & disputationis hujus futuræ fundamenta jaciam. *Lex, inquis, natura est ratio omnium hominum mentibus insita, bonum respiciens universorum populorum, quatenus homines inter se societate gaudent. Bonum illud commune non potest procurari, nisi etiam, ut sunt quos regi necesse est, disponat quoque qui regere debeant. Ne scilicet ut quisque fortior est, est, debiliorem opprimat; atque ita quos mutua salus ac defensio unum in locum congregaverat, vis atque injuria distrahat, & ad vitam* agre-

agrestrem redire cogat. Estne hoc quod volebas, etsi verbosius? Ex ipsorum itaque numero qui in unum convenere, deligi aïs oportuisse quosdam sapientia aut fortitudine ceteris præstantes, qui vel vi vel persuadendo male morigeros in officio continerent, sæpe unum id præstare potuisse, cujus excellens sit Virtus & prudentia; interdum plures, qui mutuis consiliis id faciant. Ceterum cum unus omnia providere & administrare non possit, necesse est ut consilia cum pluribus participet, & in societatem regiminis alios admittat. Ita sive ad unum revocetur imperium, sive ad universum redeat populum, quia nec omnes simul rempublicam gubernare possunt, nec unus omnia, ideo revera penes plures semper regimen consistit. Et infra. Ipsa autem regendi ratio sive per plures sive per pauciores, sive per unum dispensetur, aequè naturalis est, cum ex natura ejusdem principii descendat, quæ non patitur ita unius singularitatem gubernare, ut non alios socios imperandi habeat. Hæc cum ex Aristotelis tertio Politicorum decerpisse potueram, malui abs te decerpta transcribere, quæ tu Aristoteli, ut ignem Jovi Promethæus, ad everisionem monarcharum, & perniciem ipsius tuam surripuisti. Jam enim prolatam à temetipso naturæ legem excute quantum voles; nullum juri regio, prout tu jus illud explicas, in natura locum, nullum ejus vestigium prorsus invenies. Lex, inquit, natura cum disponeret qui regere alios deberent, universorum

populorum bonum respexit. Non igitur unius, non monarchæ. Est itaque rex propter populum: populus ergò rege potior & superior; superior cum sit & potior populus, nullum jus regis existere potest, quo populum is affligat, aut in servitute habeat, inferior superiorem. Jus malè faciendi cum sit regi nullum, manet jus populi naturâ supremum; ut quo jure homines consilia & vires mutuæ defensionis gratia, ante reges creatos, primò consociavere, quo jure ad communem omnium salutem, pacem, libertatem conservandam unum vel plures cæteris præfecerunt, eodem jure quos propter virtutem & prudentiam cæteris præposuerant, possent eosdem aut quoscunque alios rempub. malè gerentes, propter ignaviam, stultitiam, improbitatem, perfidiam vel coercere vel abdicare: cum natura non unius vel paucorum imperium, sed universorum salutem respexerit semper & respiciat. Jam verò populus quosnam delegit? *sapientia* inquis *aut fortitudine cæteris præstantes*, nempe qui natura maximè regno idonei visi sunt, *cujus excellens virtus, & prudentia præstare id muneris potuit.* Jus igitur successionis natura nullum, nullus naturâ rex, nisi qui sapientiâ & fortitudine cæteris omnibus præcellit: Cæteri vel vi, vel factio-
ne contra naturam reges sunt, cum servi potius esse deberent. Dat enim natura sapientissimo cuique in minùs sapientes imperium, non
viro

viro malo in bonos, non stolido in sapientes: his igitur imperium qui abrogant, omnino convenienter naturæ faciunt. Cui fini sapientissimum quemque natura constituat regem ex temetipso audi; ut vel naturæ vel legibus *male morigeros in officio contineat*. Continere autem in officio potestne is alios, officium qui negligit, aut nescit, aut pervertit ipse suum? Cedò jam quodvis naturæ præceptum quo jubeamur instituta naturæ sapientissima in rebus publicis & civilibus non observare, non curare, pro nihilo habere. Cùm ipsa in rebus naturalibus & inanimatis ne suo fine frustretur, sæpissimè res magnas atque miras efficere soleat. Ostende ullam vel naturæ vel naturalis justitiæ regulam, quâ oporteat reos minores puniri, reges & malorum omnium principes impunitos esse, immò inter maxima flagitia coli, adorari, & Deo proximos haberi. Concedis *ipsam regendi rationem, sive per plures, sive per pauciores, sive per unum dispensetur, què naturalem esse*. Non est ergò rex vel optimatibus vel populi magistratibus naturâ sanctior, quos cùm puniri posse ac debere, si peccant, suprà sis largitus, idem de regibus, eidem fini ac bono constitutis fateare necesse est. Non enim *patitur natura, inquis, ita unius singularitatem gubernare, ut non alios socios imperandi habeat*. Minimè ergò patitur monarchiam, minimè unum ita imperare, ut cæteros omnes sui unius imperii

imperii servos habeat. Socios autem imperandi qui tribuis regi, *penès quos semper regimen consistat*, das eidem collegas, & æquales; addis qui punire, addis qui abdicare possint. Ita, uti semper facis, dum potestatem regiam, non jam exauges, sed tantummodò naturâ constituis, aboles: adeo ut nihil putem inauspicatius accidere regibus potuisse, quàm te defenso-rem. O infelicem ac miserum, quæ te mentis caligo in hanc impulit fraudem, ut latentem antehac diu, & quasi personatam improbitatem atque inscitiam tuam nunc tanto conatu insciens nudares ipse, & omnibus patefaceres: tuoque met opprobrio operam ipse tuam locares, tuo ipse ludibrio tam gnaviter inservires. Quæ te ira numinis quasve pœnas luentem, in lucem & ora hominum evocavit, ut tanto apparatu causam tererrimam impudentissimè simul & stolidissimè defenderes, atque ira defendendo invitus, perque inscitiam proderes? Quis te p. jûs perditum vellet, quis miseriorem, qui jam sola imprudentia, sola vâcordia saluti esse potest ne sis miserrimus, si tyrannos quorum causam suscepisti, imperita ac stulta defensione tanto magis invisos ac detestabiles omnibus, contra quam sperabas, reddideris, quanto iis majorem malefaciendi & impunè dominandi licentiam de industria attribueris; eoque plures eorundem hostes inconsultò excitaveris. Sed redeo ad tua tecum
diffidia

diffidia. Cum tantum in te scelus admiseris, ut tyrannidem naturâ fundare studeas, præ cæteris gubernandi rationibus monarchiam primò laudandam tibi esse vidisti; id, uti soles, incœptare sine repugnantia nequis. Cum enim modò dixeras, *ipsam regendi rationem sive per plures sive per pauciores sive per unum aque naturalem esse*, statim eam *qua per unum exercetur ex his tribus magis naturalem esse* ais, immò qui etiam recens dixeras, *non patitur natura unius singularitatem gubernantis*. Jam tyrannorum necem obijce cui voles, qui & monarchas omnes, & monarchiam ipsam tuâ fatuitate jugulasti. Verùm quæ sit melior administrandi temp. ratio, per unum an per plures, non est nunc differendi locus. Et monarchiam quidem multi celebres viri laudarunt, si tamen is qui solus regnat, vir omnium optimus, & regno dignissimus sit; id nisi contingat, nihil monarchia procliviùs in eam tyrannidem, quæ pessima est, labitur. Jam quòd ad unius *exemplar Dei expressam esse* dicis, quis potentiam divinæ similem in teris obtinere dignus est, nisi qui cæterorum omnium longè præstantissimus, etiam bonitate ac sapientia est Deo simillimus; is autem solus, meâ quidem sententiâ, expectatus ille Dei filius est. Quòd regnum in familiam rursus contrudis, ut patrifamilias regem assimiles, pater certè suæ familiæ regnum meretur, quam omnem vel generavit, vel alit: in re

ge

ge nihil est hujusmodi, sed planè contrá sunt omnia. Animalia deinde nobis gregalia, imprimis *aves*, & in iis *apes*, siquidem te Physiologo aves istæ sunt, imitandas proponis. *Apes regem habent*. Tridentinæ scilicet, an non meministi? cæterarum te teste *respub. est*. Verùm tu desine de apibus satuari, musarum sunt, oderunt te scarabæum, & ut vides, redarguunt. *Coturnices sub Ortygometra*. Istos onocrotalis tuis tende laqueos; nos tam stolido aucupio non capimur. Atqui jam tua res agitur, non nostra, *Gallus gallinaceus*, inquis, *tam maribus quàm feminis imperitat*. Qui potest hoc fieri? Cum tu ipse Gallus, & ut ferunt, vel nimium gallinaceus, non tuæ gallinæ, sed illa tibi imperitet, & in te regnum exerceat: si gallinaceus ergò plurium foeminarum rex est, tu gallinæ mancipium tuæ, non gallinaceum, te sed stercorearium quendam esse Gallum oportet. Pro libris certè nemo te majora edit sterquilinia, & gallicinio tuo stercoreo omnes obtundis; hoc unicum galli gallinacei habes. Jam ego multa hordei grana daturum me tibi promitto, si totum hoc vertendo sterquilinium tuum, vel unam mihi gemmam ostenderis. Sed quid ego tibi hordeum? qui non hordeum, ut *Æsopicus* ille, simplex & frugi gallus, sed aurum, ut *Plautinus* ille nequam, scalpturiendo quæfisti; quamvis exitu adhuc dispari; tu enim centum Jacobæos aureos

reos inde reperisti, cum Euclionis fuisse potiùs, quo misellus ille Plautinus, obtruncari dignior sis. Sed pergendum est. *Eadem utilitatis & incolumitatis omnium ratio naturalis postulat, ut qui semel ad gubernandum constitutus est, conservetur.* Quis negat, quatenus ejus conservatio cum incolumitate omnium consistit? ad perniciem autem omnium conservari unum, quis non videt alienissimum à natura esse? At *malum etiam regem conservari, immo pessimum omnino vis, eò quòd non tantum mali civitati procurat male gubernando, quantum creatur cladium ex seditionibus quæ ad eum tollendum suscitantur.* Quid hoc ad jus regum naturale? An, si natura me monet, ut latronibus diripiendum me permittam, ut captum me totis facultatibus redimam potiùs, quàm ut dimicare de vitâ cogar, latronum tu inde jus naturale constitues? suadet natura populo, ut tyrannorum violentiæ nonnunquam cedat, cedat temporibus; tu istâ populi necessitate ac patientiâ jus etiam naturale tyrannorum fundabis? Quod illa jus populo sui conservandi causâ dedit, tu illam tyranno perdendi populi causâ jus idem dedisse affirmabis? Docet natura ex duobus malis, eligendum esse minus; & quandiu necesse est, tolerandum; an tu hinc tyranno, utpote minori fortasse interdum malo, jus impunè malefaciendi exortiri naturale statues? Recordare saltem ea quæ jampridem ipse de Episcopis contra Loiolitam scripsisti, à me suprâ

tertio capite recitata, his planè contraria; Illic *seditiones, dissentiones, discordias optimatum & populi, longè levius esse malum affirmas, quàm sub uno monarcha tyranno certam miseriam ac perniciem.* Et vera tu quidem affirmabas; nondum enim insaniebas, nondum Carolinis Jacobæis delinitus & deauratus in morbum regium incideras. Dicerem fortasse, nisi is esses qui es, pudeat te tandem prævaricationis tuæ turpissimæ; tibi verò dicumpi facilius est quàm erubescere, qui ut rem faceres, pudorem jam diu amisisti. Annon ipse memineras Romanos florentissimam & gloriosissimam Rempub. post exactos reges habuisse? potuitne fieri ut Batavorum obliviscerere? quorum respub. Hispaniarum rege pulso post bella diutina, feliciter tamen gesta, libertatem fortiter & gloriose consequuta est, teque grammaticastrum Equitem stipendio alit suo, non ut juvenus Batavica te prævaricatore & sophistâ tam nihil sapere discat, ut ad servitutem Hispanicam redire mallet, quàm paternæ libertatis ac gloriæ hæres esse; istam doctrinæ pestem ad Riphæos ultimos, & glaciale oceanum, quo te in malam rem abire par est, tecum auferas licebit: Exemplo denique sunt Angli, qui Carolum tyrannum bello captum, & insanabilem obtruncârunt. At *insulam beatam sub regibus, & luxu affluentem discordiis deformârunt.* Immo luxu penè perditam quo tolerantior servitutis esset, extinctis
deinde

deinde legibus, & mancipatâ religione, servientem liberarunt. En autem Epicteri cum Simplicio editorem, stoicum gravissimum, cui *luxu affluens insula* beara esse videtur! Ex porticu Zenonis nunquam tale sciscio, documentum prodiit. Quid refert? an te doctore quicquid libet regibus licebit, tibi ipsi non licebit Lupi domino ex Lupanari tuo, tanquam ex novo quodam lyceo quamcunq; libet emittere philosophiam? sed resume nunc quam suscepisti personam. *Nunquam sub ullo rege tantum cruoris haustum est, tot familia desolata;* Hoc totum Carolo imputandum est, non Anglis; qui exercitum Hibernicorum prius in nos paraverat, omnes Hibernos conjurare contra Anglos suo ipse diplomate jusserat; per illos ducena circiter millia Anglorum una in provinciâ Ultoniâ occiderat; de reliquis nihil dico: binos exercitus in exitium Parlamenti Anglicani urbisque Londini sollicitaverat; multa alia hostiliter fecerat, priusquam a populo aut magistratibus tuendæ Reipub. causâ vel unus miles confcriptus esset. Quæ doctrina, quæ lex, quæ unquam religio sic homines instituit, ut otio consulendum, ut pecuniæ, ut sanguini, ut vitæ potius parcendum esse ducerent, quàm hosti obviam eundum: nam externo an intestino, quid interest? cum interitus reipub. sive ab hoc, sive ab illo funestus æquè, & acerbus impendeat. Vidit totus Israel non posse se sine multo sanguine

sanguine levitæ uxorem stupro enectam ulcisci; an igitur quiescendum sibi esse duxit, an bello civili quamvis truculentissimo superse-
dendum, an unam igitur mulierculam mori in-
ultam est passus? Certè si natura nos docet
quamvis pessimi regis dominatum potius pati,
quàm in recuperanda libertate, plurimorum
civium salutem in discrimen adducere, doceret
eadem non regem solùm perferre, quem tamen
solum perferendum esse contendis, sed opti-
matium, sed paucorum quoque potentiam; la-
tronum etiam nonnunquam & servorum rebel-
lantium multitudinem. Non Fulvius aut Ru-
pilius bellum servile post cæsos exercitus præ-
torios, non Crassus in Spartacum post deleta
consularium castra, non Pompejus ad pirati-
cum bellum exiisset. Romani vel servis, vel pi-
ratis, ne tot civium sanguis effunderetur, hor-
tante scilicet naturâ, succubissent. *Hunc ita-
que sensum*, aut hujusmodi ullum *gentibus im-
pressisse naturam* nusquam ostendis: et tamen
non desinis malè ominari, & vindictam divi-
nam, quam in te augurem tuique similes aver-
tat Deus, nobis denuntiare; qui nomine tan-
tum regem, re hostem acerbissimum debito
supplicio ultus sumus; & innumerabilem bono-
rum civium cædem auctoris poenâ expiavi-
mus. Nunc magis naturalem esse monarchiam
ex eo probari ais quod *plures nationes & nunc
& olim regium statum receperint*, quàm optima-
tem

rum & popularem. Respondeo primùm neque Deo neque naturâ suadente id factum esse; Deus nîllî invitus, populum suum sub regio imperio esse noluit; natura quid suadeat & recta ratio, non ex pluribus, sed ex prudentissimis nationibus optimè perspicitur. Græci, Romani, Itali, Carthaginieneses, multique alii suoapte ingenio vel optimatum vel populi imperium regio prætulerunt; atque hæc quidem nationes cæterarum omnium instar sunt. Hinc Sulpitius Severus, *regium nomen cunctis ferè liberis gentibus semper invisum* fuisse tradit. Verùm ista non jam huc pertinent, nec quæ sequuntur multa, inani futilitate à te sæpiùs repetita: ad illud festino, ut quod rationibus firmavi, id exemplis nunc ostendam, esse vel maximè secundùm naturam, tyrannos quoquo modo puniri; id omnes gentes, magistra ipsa natura, sæpiùs fecisse; ex quo impudentia tua prædicanda & turpissima mentiendi licentia omnibus innotescere dehinc poterit. Primos omnium, inducis Ægyptios; & certè quis te per omnia Ægyptizare non videat? *Apud hos inquis nusquam menti extat ullius regis à populo per seditiones occisi, nullum bellum illatum, aut quicquam factum à populo quo è solio deiceretur.* Quid ergo Ofitis rex Ægyptiorum fortasse primus? annon à fratre Typhone, & viginti quinque aliis conjuratis interemptus est? quos & magna pars populi secuta magnum cum Iside & Oro, regis conjugem,

juge, & filio praelium commisit? prætereo Sesostrin à fratre per insidias penè oppressum; Chemmin etiam & Cephrenem, quibus populus meritò infensus, quos vivos non poterat, mortuos se discerpturum minatus est. Qui reges optimos obtruncare sunt ausi, eosne putas naturæ lumine, aut religione aliquâ retentos, à pessimis regibus manus abstinuissè? qui reges mortuos, & tum demùm innocuos sepulcro eruituros se minitabantur, ubi etiam pauperculi cujusque corpus inviolatum esset soler, vivosne illi & nocentissimos propter naturæ legem punire, si modò viribus valerent, vererentur? Affirmares hæc, scio, quamlibet absurda; at enim ego ne affirmare audeas elinguem te reddam. Scito igitur multis ante Cephrenem seculis regnâsse apud Ægyptios Amosin; & tyrannum, ut qui maximè, fuisse; eum Ægyptii æquo animo pertulerunt. Lætaris; hoc enim est quod vis. At reliqua audi vir optime & veracissime, Diodori enim verba sunt quæ recito, μέγιστον πικρὸν ἔχαρτον ἔδυνάμενοι, &c. tolerabant aliquandiu oppressi, quia resistere potentioribus nullo modo poterant. Quamprimùm verò Actisanes Æthiopum rex bellum gerere cum eo cœpit, nacti occasionem plerique defecerunt, eoque facilè subactò, Ægyptus regno Æthiopum accessit. Vides hic Ægyptios, quamprimùm poterant arma contra

ty-

tyrannum tulisse, copias cum externo rege conjunxisse, ut regem suum ejusque posteros regno privarent, bonum & moderatum regem, qualis erat Actisanes, maluisse externum, quam tyrannum domesticum. Iidem Ægyptii consensu omnium maximo Aprien tyrannum suum, conductitiis copiis præfidentem, duce Amasi prælio victum strangularunt; Amasi viro nobili regnum dederunt. Hoc etiam adverte; Amasis captum regem ad tempus in ipsa regia honestè asservabat: incusante demùm populo, injustè eum facere qui suum & ipsorum hostem aleret, tradidit populo regem; qui eum prædicto supplicio affecit. Hac Herodorus & Diodorus. Quid amplius tibi quæris? ecquem tyrannum censes non maluisse vitam securi quam laqueo finire? Postea sub Persarum imperium *reducti Ægyptii fideles*, inquis, *existere*; Quod falsimum est; in fide enim Persarum nunquam permansere; sed quarto post anno quam subacti à Cambyse fuerant, rebellarunt. Domiti deinde à Xerxe, haud multò post ab ejus filio Artaxerxe defecerunt, regem Inarum quendam sibi adsciverunt. Quo occiso iterum fidem mutant, & constituto rege Tacho Artaxerxi Mnemoni bellum indicunt. Sed neque suo regi fideliores, ablatum patri regnum filio Nectanebo tradunt: donec tandem ab Artaxerxe Ocho in ditionem Persarum rediguntur. Sub Macedonum etiam imperio, quantum

tum in se erat, tyrannos coercendos esse factis indicarunt; statuas & imagines Prolemæi Physconis dejecerunt, ipsum mercenario exercitu præpollentem interficere nequiverunt. Alexander ejus filius ob cædem matris concursu populi in exilium agitur: filium item ejus Alexandrum insolentiùs dominantem Alexandrinus populus vi abreptum ex regia in gymnasio publico interfecit: Prolemæum denique Auleten ob multa flagitia regno expulit. Hæc tam nota cum non possit nescire vir doctus, non debuerit qui hæc docere proficereatur, qui fidem tantis in rebus haberi sibi postuler, quis non pudendum & indignissimum esse dicat, hunc, vel tam rudem & indoctum tanta cum infamia bonarum literarum pro doctissimo circumferre se tumidum, & stipendia regum & civitatum ambire, vel tam improbum & mendacem, non insigni aliquâ ignominiâ notatum, ex omnium communitate & consortio tum doctorum tum bonorum exterminari. Postquam Ægyptum lustravimus, ad Æthiopes jam proximos visamus. Regem à Deo electum, ut credunt, quasi Deum quendam adorant: quoties tamen eum Sacerdotes damnant, ipse mortem sibi consciscit. Sic enim, Diodoro teste, omnes alios maleficos puniunt; non ipsi morte afficiunt, sed ipsos reos lictore misso mori jubent. Ad Assyrios deinde & Medos & Persas regum observantissimos

simos accedis: *jus illic regium summa cum licentia quidlibet faciendi conjunctum fuisse* contra omnium Historicorum fidem affirmas. Narrat imprimis Daniel ut regem Nebuchadnezzarem plus nimio superbientem homines à se depulerint, & ad bestias ablegaverint. Jus eorum non regium, sed Medorum & Persarum id est populi jus appellatur; quod cum irrevocabile esset, reges etiam obligavit. Darius itaque Medus eripere manibus satraparum Daniele, quanquam id maximè agebat, non potuit. *Populi*, inquis, *nefas esse tum credebant regem repudiare quòd illo jure abuteretur.* Inter ipsa tamen hæc verba adeò miserè obtorpes, ut dum istorum populorum obedientiam & modestiam laudas, ereptum Sardanapalo regnum ab Arbace tuâ sponte commemores. Eripuit autem is non solus, sed partim à Sacerdotibus juris peritissimis, partim à populo adjutus, atque hoc præsertim nomine eripuit, quòd is jure regio, non ad crudelitatem, sed ad luxuriam tantummodò & mollitiem abuteretur. Percurre Herodotum, Ctesiam, Diodorum, intelliges omninò contrà esse quàm dicis, à *Subditis ut plurimum ea regna destructa fuisse, non ab externis: Assyrios reges a Medis, Medos à Persis, utrisque tum Subditis, sublatos fuisse. Cyrum ipse rebellasse, & arreptas tyrannides in diversis imperii locis fateris.* Hoc cene est jus regium apud Medos & Persas, & observantiam eorum in reges,

quod instituti, asserere? Quæ te Anticyra tam delirum sanare potest? *Persarum reges quali jure regnârint ex Herodoto, inquis, liquet. Cambyfes*, cum sororem in matrimonio habere cupeperet, judices regios consulit, delectos *ex populo viros*, legum interpretes, ad quos omnia referri solebant. Quid illi? negant se invenire legem quæ jubeat fratrem secum in matrimonium sororem jungere; aliam tamen invenisse, quâ liceat Persarum regi facere quæ libeat. Primum si rex omnia pro suo jure poterat, quid aliis legum interpretare quàm ipso rege opus erat? supervacanti isti judices ubivis potius quàm in regia mansissent. Deinde si Regi Persarum quidvis licuit, incredibile est id adeò nescivisse Cambysem dominationis cupidissimum, ut quid licitum esset, judices illos percunctaretur. Quid ergo? vel *gratificari* volentes regi, ut fateris ipse, vel à tyranno sibi metuentes, ut ait Herodotus, facilem quandam se reperisse legem simulant, palpum regi obtrudentes: quod in judicibus & legum peritis hac etiam ætate novum non est. At verò *Artabanus Persa dixit ad Themistoclem*, nullam legem apud Persas esse meliorem illâ quâ sancitum fuerat, regem esse honorandum & adorandum. Præclaram tu quidem legem de adoratione regum introducis etiam à patribus antiquis damnatam; præclarum etiam legis commendatorem Artabanum, qui ipse haud multo postea sua manu

manu Xerxem regem suum trucidavit. Probos regum defensores regicidas nobis adfers: suspicor te regibus insidias quasdam moliri. Claudianum citas poetam, Persarum obedientiae testem. At ego te ad res eorum gestas & annales revoco, defectionibus Persarum, Medorum, Bactrianorum, Babyloniorum, etiam cædibus regum refertissimos. Proximus tibi author est Otanes Persa, ipse etiam Smerdis intersector sui regis, qui cum odio potestatis regiae, injurias & facinora regum exponat, violationes legum, cædes indemnatorum, stupra, adulteria, hoc tu jus regium vis appellari, & Samuelis iterum calumniandi in mentem tibi venit. De Homero qui reges esse ab Jove cecinit, supra respondi: Philippo regi jus regium interpretanti tam credam quàm Carolo. Ex Diogenis deinde Pythagoræi fragmento quædam producis, at quali is de rege dicat taces. Accipe igitur quo ille usus est exordio; ad quod referri quæ sequuntur cuncta debent. Βασιλεὺς κ' εἴη ὁ δικαιοτάτος, &c. *Rex ille fuerit, qui justissimus est, justissimus autem, qui maximè legitimus, nam sine justitia nullus rex esse poterit, neque justitia sine lege.* Hæc cum jure tuo regio è regione pugnant. Eadem abs te recitatus Ecphantas philosophatus. δεῖ γὰρ καὶ εἰς αὐτὰν καταστάντα, &c. *oportet qui regnum suscipit purissimam & lucidissimum naturâ esse:*

& infra ὁ καὶ δέεται ἐξάρχων, &c. ille qui imperat secundum virtutem, nominatur rex, & est. Quem tu igitur regem vocas, Pythagoreorum iudicio rex non est. Jam tu vicissim Platonem audi in Epistola octava δρχὴ γνέσθω ὑπὸ βυνοῦ βασιλική, &c. Sit regia potestas redenda rationi obnoxia; leges dominantur & aliis civibus & ipsis etiam regibus, si quid prater leges fecerint. Addo Aristotelem Polit. 3. ἐν μὲν τοῖς ὁμοίοις ἢ ἴσοις ἔτε συμφέρον ἐστίν, &c. inter similes & aequales neque utile est neque justum, esse unum omnium dominum, neque ubi leges non sunt, neque ut ipse lex sit, neque ubi sunt leges; neque bonum bonorum, neque non bonum non bonorum dominum esse. Et lib. quinto, Quem populus non vult, statim is non rex, sed tyrannus est, c. 10. Hem tibi etiam Xenophontem in Hierone ἀνὴρ ἔτι μωρεῖν αἰπέλεις αὐτοῖς, &c. tantum abest ut tyrannorum necem civitates ulciscantur, ut magnis honoribus officiant eum, qui tyrannū interfecerit, imagines etiam tyrannicidarum in templis statuunt. Testē oculatū adjiciam Marcum Tullium pro Milone. Graci homines Deorum honores tribuunt iis viris qui tyrannos necaverunt: quæ ego vidi Athenis, quæ aliis in urbibus Graciæ, quas res divinas talibus institutas viris, quos cantus, quæ carmina? prope ad immortalitatem, & religionem, & memoriam consecrantur. Polybius denique author gravissimus,

Historiarum sexto. τότε ὃ τοῖς Ἰνδουσίαις
 ἐτόλμα, &c. cum principes, inquit, cupi-
 ditatibus obsequi cœperunt, tum de regno facta est
 tyrannis, & conspiratio in caput dominantium in-
 ibatur, cuius quidem authores erant non deterrimi
 civium, sed generosissimi quique & maximi ani-
 mi. Longè plura cùm mihi suppeterent, hæc
 pauca delibavit: obruor enim copiâ. A philo-
 sophis ad Poëtas jam provocas, eò te libentissi-
 mē sequimur. Potestatem nullis legibus, nullis ju-
 diciis obnoxiam in Græcia reges obtinuisse vel u-
 nus, inquis, Æschylus potest docere; qui in tragæ-
 dia, Supplices, Regem Argivorum ἀνακτορὸν πρύ-
 τανιν vocat, non judicabilem rectorem. Verùm
 tu scito, præcipitem enim te & nullius iudicii
 esse, quocunque te vertis, eò magis perspicio,
 scito, inquam, non quid poëta, sed quis apud
 Poëtam quidque dicat, spectandum esse: va-
 riæ enim personæ inducuntur, nunc bonæ,
 nunc malæ, nunc sapientes, nunc simplices,
 non semper quid Poëtæ videatur, sed quid cui-
 que maximè conveniat loquentes. Danaï filiar
 quinquaginta ex Ægypto profugæ ad Argivo-
 rum regem supplices pervenerant; orant uti se
 contra vim Ægyptiorum classe insequentium
 defendat, respondet rex non posse se nisi rem
 prius cum populo communicet.

Εγὼ δὲ ἀνὶ ὧν κελεύοιμι ὑποχέσιν πάρος
 Ἀσῶν ὃ πᾶσι τοῖςδε κρινώσας πέει.

Mulieres peregrinæ & supplices incerta populi suffragia veritæ, regem denuò blandiùs compellant.

Σὺ τοι πόλις, σὺ ᾗ τὸ δῆμιον,

Πρύτανις ἀκροῖσθ' ὦν.

Tu instar urbis es & populi, Prator in judicatu.
Rursus rex.

Εἶπεν ᾗ κ' πρὶν, ἔκ αὖθι δῆμ' ἰδὲ τάδε

Προΐξαιμ' ἀνδ' ἐπερ κροτῶν —

Dixi antea, non sine populo hac faciam.
ne si possem quidem.

De re itaque tota ad populum refert,

Εἰ γὰρ ᾗ λάσσει συγκαλῶν ἐγχωρεῖς

Πείσω τὸ κρινόν.

Populus itaque decernit opem Danai filiabus ferendam; unde illa senis Danai lætantis.

Θαρσῆτε παῖδες, ὧ τὰ τ' ἐγχωρεῖων

Δῆμ' δέδοκ' ὅπαντελῇ ψηφίσματι.

Bono estote animo filia, benè decreverunt

Indigenarum, in conventu populari, perfectissima suffragia.

Hæc nisi protulissem, quàm temere statuisset sciòlus iste de jure regio apud Græcos ex ore mulierum, & peregrinarum, & supplicum; cùm & ipse rex, & ipsa res gesta longè aliud nos doceat. Idem etiam docet Euripidis Orestes, qui, mortuo patre, Argivorum ipse rex, ob cædem matris à populo in judicium vocatus, ipse causam dixit, & suffragiis populi capite damnatus est

est. Athenis regiam potestatem legibus obnoxiam fuisse testatur Idem Euripides etiam in Supplicibus, ubi hæc Thæseus Athenarum Rex —

ὃ γὰρ ἄρχεται

Ενὸς πρὸς ἀνδρὸς, αἴτ' ἐλθέρεα πόλις,
Δῆμ' οὐδ' ἀνάσσει —

non regitur

*Ab uno viro, sed est libera hac civitas,
Populus autem regnat —*

Sic ejus filius Demophoon Rex item Atheniensium apud eundem poëtam in Heraclidis.

Οὐ γὰρ τυραννίδ' ὥς τε βαρβάρων ἔχω,
Αἴτ' ἦν δίκαια δρῶ, δίκαια πείσσομαι.

*Non enim iis tyrannicè tanquā barbaris impero,
Sed si facio justa qua sunt, justa mihi rependuntur.*

Non aliud Thebis jus regium antiquitùs fuisse testatur Sophocles in Oedipo tyranno, unde & Tiresias & Creon Oedipo ferociter respondent, ille

ὃ γὰρ τι σοὶ ζῶ δούλ' οὔ

Non servus tibi sum.

Hic, Κάμοι πόλεως μέπεσι τ' οὐδ' ἐσσι μόνω.

Est & mihi jus in hac civitate non tibi solū.

Et Aemon Creonti in Antigone.

Πόλις γὰρ ἓκ' ἐστ', ἥ τις ἀνδρὸς ἐστ' ἐνός.

Non est civitas, qua unus est viri.

Jam verò Lacedæmoniorum reges in judicium sæpe adductos, & interdum morte mulctatos nemo ignorat. Atque hæc quidem antiquum in Græcia jus regium quale fuerit satis declarant. Ad Romanos veniamus. Tu ad illud imprimis recurris non Sallustianum, sed C. Memmii apud Sallustium, *impune quid vis facere*: cui suprâ responsum est. Sallustius ipse disertis verbis author est, *Romanos imperium legitimum, nomen imperii regium habuisse*; quod cum *se in dominationem convertit*, ut nōsti, expulerunt. Sic M. Tullius in Pisonem, ego Consulem esse putem, qui Senatum esse in repub. non putavit? & sine eo consilio consulem numerem, sine quo Romæ ne reges quidem esse potuerunt? Audin' regem Romæ sine Senatu nihil fuisse? *At Romulus, ut libitum Romani imperitaverat, ut ait Tacitus.* Nondum enim fundata legibus, colluvies potius convenarum quam respub. erat: omnes olim mortales sine legibus vivebant, cum respUBLICÆ nondum essent. Post Romulum autem, authore Livio, etsi regem omnes volebant, liberratis dulcedine nondum expertâ, *Populo tamen summa potestas permissa est, ut non plus darent juris quam detinerent: jus illud à Cæsaribus vi ademptam fuisse* idem ait. Servius Tullius dolo primum quasi Tarquinii Prisci vicarius regnabat; postea verò ad populum ipse retulit, *vellent juberentne se regnare*; tandum ut ait Tacitus,

sanctor

sanctorum legum fuit quæis etiam reges obtemperarent, Fecissetne hanc sibi & posteris injuriam, si supra leges prius fuisse jus regium sensisset? Ultimus illorum regum Tarquinius superbus morem de omnibus Senatuum consulendi primus solvit; ob hæc & alia flagitia populus L. Tarquinio Regi imperium abrogavit; exulæmque esse cum conjuge ac liberis jussit. Hæc fere ex Livio & Cicerone; quibus alios juris regil apud Romanos haud tu interpretes attuleris meliores. Ad dictaturam quod attinet, temporaria tantum fuit, nunquam adhibita nisi difficillimis reipub. temporibus, & intra sex menses deponenda. Jus autem imperatorum quod vocas, non jus illud, sed vis planè erat; imperium nullo jure præterquam armis partum. At Tacitus, inquis, qui sub imperio unius floruit, ita scripsit. Principi summum rerum arbitrium dii dederunt, subditis obsequii gloria relicta est. Nec dicis quo loco; tibi conscius nimirum insigniter lectoribus imposuisse; quod mihi quidem statim suboluit, quamvis locum illum non statim reperi. Non enim Taciti hæc verba sunt, scriptoris boni, & tyrannis adversissimi, sed apud Tacitum M. Terentii cujusdam equitis Romani, qui capitis reus, inter alia quæ metu mortis ab eo dicta sunt, sic Tiberium adulatur, annalium 6to. Tibi summum rerum judicium dii dederunt, nobis obsequii gloria relicta est. Hanc tu quasi Taciti sententiam pro-

fers, qui sententias tibi commodas non ex pristrina solùm aut tonstrina, sed ex ipsa carnificinâ oblatas non respueres: ita omnia vel ostentationis causâ, vel imbecillitatis conscientiâ, undecunque corradis. Tacitum ipsum si legere maluisses quàm alicubi decerptum negligētius transcribere, docuisset te is, jûs illud imperatorum unde ortum sit. *Post Actiacam, verso civitatis statu nihil usquam prisci aut integri moris; omnes exutâ equalitate jussa principis aspectare; docuisset idem annalium 3^{tio}, unde tuum omne jus regium; Postquam exui aequalitas, & pro modestia ac pudore ambitio & vis incedebat, provenere dominationes, multosq; apud populos aeternum mansere.* Idem ex Dione poteras didicisse, si innata levitas & inconstantia tua quicquam te altius percipere pateretur. Narrat enim is l. 3. abs te citato, ut partim armis, partim dolo & simulatione Octaviani Cæsaris effectum sit, ut imperatores legibus soluti essent; dum enim pro concione pollicetur se principatu abiturum, legibus & imperiis etiam aliorum obtemperaturum, per causam belli in provinciis suis gerendi, retentis apud se semper legionibus, dum simulatè renuit imperium, sensim invasit. Non est hoc legibus rite solutum esse, sed legum vincula, quod gladiator ille Spartacus potuit, vi solvere; nomen deinde principis aut imperatoris & αὐτοκράτορ & sibi arrogare, quasi Deus aut naturæ lex omnes & homi-

nes

nes & leges illi subjecisset. Vis alitùs paulo juris Cæsarei originem cognoscere? Marcus Antonius, jussu Cæsaris, qui armis in rempublicam nefariè sumptis tum plurimum poterat, Consul factus, cùm Lupercalia Romæ celebrarentur, ex composito, ut videbatur, diadema capiti Cæsaris cum gemitu & plangore populi imposuit: ascribi deinde jussit in fastis ad Lupercalia, C. Cæsari Antonium Consulem, jussu populi, regnùm detulisse. Quà de re Cicero in secunda Philippica; *Ideò ne L. Tarquinius exactus, Spurius Cassius, Sp. Melius, M. Manlius necati, multis post seculis à M. Antonio, quod fas non est, ut rex Roma constitueretur?* Tu verò omni malo cruciatu atque infamia sempiternà etiam ipsa Antonio dignior es; quanquam tu hinc noli superbire, non enim te hominem despicatissimum, ullà re alià quàm scelere cum Antonio conferendum putem, qui in hisce tuis Lupercalibus nefandis non uni tantùm, sed omnibus tyrannis diadema cunctis legibus solutum, nullà solvendum imponere studuisti. Certè si ipsorum Cæsarum oraculo credendum est, sic enim apellant Christiani imperatores Theodosius & Valens edictum suum, cod: 1: 1: tit. 14. de auctoritate juris, imperatorum pendet auctoritas. Majestas ergo regnantis, vel ipsorum Cæsarum sive judicto sive oraculo, submittenda legibus est, de quibus pendet. Hinc adultrà jam potestate im-

peratoriâ ad Trajanum Plinius in Panegyrico ;
Diversa sunt naturâ , dominatio, & principatus.
Trajanus regnum ipsum areet ac summovet , se-
démque obtinet principis , ne sit dom'no locus. Et
infra, omnia qua de aliis principibus à me dicta
sunt , eò pertinent ut ostendam , quàm longa con-
suetudine corruptos , depravatósque mores princi-
patus parens noster reformet , & corrigat. Quod
 depravatos principatûs mores Plinius, id te ne
 puder jus regium perpetuò vocitare ? Verum
 hætenûs de jure apud Romanos breviter. Quid
 illi in tyrannos suos, sive reges, sive Imperato-
 res fecerint, vulgo notum est. Tarquinium ex-
 pulerunt. Sed *quomodo, inquis, expulerunt, an*
in jus vocarunt ? nequaquam ; *Portas venienti*
clauserunt. Ridiculum caput , quid ni claude-
 rent advolanti cum parte copiarum ? quid re-
 fert exulare jussus fuerit an mori , modò pœ-
 nas dedisse constat ? Ca. Cæsarem tyrannum
 excellentissimi ejus ætatis viri in Senatu in-
 terfecerunt ; id factum M. Tullius & ipse vir
 optimus, & pater patriæ publicè dictus, miris
 laudibus , cum alibi passim , tum in secunda
 Philippica celebravit. Pauca recitabo. *Omnes*
boni quantum in ipsis fuit , Cæsarem occiderunt ;
aliis consilium , aliis animus , aliis occasio defuit ,
voluntas nemini. Et infra. *Qua enim res un-*
quam, proh sancte Iupiter, non modò in hac urbe,
sed in omnibus terris est gesta major, qua gloriosior,
qua commendatior hominum memoria sempiter-
net

na? in huius me consilii societatem, tanquam in
in equum Trojanum includi cum principibus non
recuso. Illud Senecæ tragici & ad Græcos referri
potest, & ad Romanos:

— *Victima haud ulla amplior*

Potest, magisque opima mactari Iovi

Quam rex iniquus —

Nam si ad Herculem spectes, cuius hæc sen-
tentia inducitur, quid senserint illa ætate Græ-
corum summi viri ostendit: si ad poëtam, qui
sub Nerone floruit (& sensum fere suum poëtae
personis optimis assignare solent) significabat
& quid ipse, & quid omnes viri boni, ætate e-
tiam Neronis, faciendum tyranno consuerint;
quamque pium, quamque diis gratum esse du-
xerint tyrannicidium. Sic optimi quique Ro-
manorum, quantum in se erat, Domitianum
occiderunt. Palàm hoc profitetur Plinius se-
cundus in illo ad Trajanum imperatorem Pa-
negyrico. *Iuvabas illidere solo superbissimos vul-
tus, instare ferro, seivire securibus, ut si singulos
ictus sanguis dolorque sequeretur: nemo tam tem-
perans gaudii, quin instar ultionis videretur cer-
nere laceros artus, truncata membra, postremo
truces horrendasque imagines abjectas excoctasque
flammis. Et deinde, non satis amant bonos prin-
cipes, qui malos satis non oderint. Tum inter fla-
gitia Domitiani ponit, quòd is Epaphroditum
Neronis utcunque interfectorem trucidaverit.
An excidit dolori nostro modo vindicatus Nero,*
per-

permitteret credo famam vitamque ejus carpi, qui mortem uliscebatur? Planè quasi sceleri proximum esse judicaret, non interfecisse Neronem, scelus gravissimum vindicasse interfectum. Ex his manifestum est, Romanorum præstantissimos quosque viros non solum tyrannos quoquo modo, quoties poterant, occidisse, sed factum illud, ut Græci olim, in maxima laude posuissent: Vivum enim tyrannum quoties judicare non poterant viribus inferiores, mortuum tamen & judicabant, & lege Valeriâ damnabant. Valerius enim Publicola Junii Bruti collega cum videret non posse stipatos suis militibus tyrannos ad judicium perducere, legem tulit qua indemnatum quovis modo occidere liceret; deinde facti rationem reddere. Hinc C. Caligulam, quem Crassus ferro, omnes votis interfecerunt, Valerius Asiaticus, vir consularis cum non adesset, ad milites tamen ob necem ejus tumultuantes exclamat, *utinam ego interfecissem*; Senatus eodem tempore abolendam Cæsarum memoriam, ac diruenda templa censuit; tantum absuit ut Cassio irasceretur; Claudium a militibus imperatorem mox salutatum vetant per tribunum plebis principatum capeßere; vis autem militum vicit. Neronem Senatus hostem judicavit, & ut puniretur more majorum, quærebat; id genus pœnæ erat, ut nudi cervix infereretur furcæ, corpus virgis ad necem cæderetur. Vide quan-

to mitiùs & moderatiùs Angli cum tyranno egerint suo, qui multorum judicio plus ipso Nerone sanguinis fundendi author fuerat. Sic Domitianum mortuum Senatus damnavit; quod potuit, imagines ejus coràm detrahi, & solo affligi jussit. Commodus à suis interfectus, non vindicatus à Senatu aut Populo, sed hostis judicatus est, qui etiam cadaver ejus ad supplicium quærebant. Ea de re Senatusconsultum extat apud Lampridium; *Hosti patria honores detrahantur, Parricida trahatur, in spoliario lanietur, hostis Deorum, carnifex Senatus unico trahatur, &c.* Idem Didium Julianum imperatorem frequentissimo Senatu capitis damnarunt; & misso Tribuno, occidi in Palatio jusserunt. Idem Maximino imperium abrogarunt, hostemque judicarunt. Juvat ipsum Senatusconsultum ex Capitolino recitare. *Consul retulit; Patres Conscripti, de Maximinis quid placeat?* responsum est, *hostes, hostes, qui eos occideris præmium merebitur.* Vis scire populus Romanus & provinciæ Maximino imperatori an Senatui paruerint? audi eundem Capitolinum. *Literas mittit Senatus* ad omnes provincias, ut communi salutis, libertatique subveniant; quæ auditæ sunt ab omnibus. Ubique amici, administratores, duces, tribuni, milites Maximini interfecti sunt: paucæ civitates fidem hosti publico servaverunt. Eadem tradit Herodianus. Quid plura de Romanis? Jam apud finitimas
natio-

nationes quale jus regium illâ ætate fuerit videamus. Apud Gallos rex eorum Ambiorix sua ejusmodi esse imperia fatetur, ut non minus haberet in se juris multitudo, quàm ipse in multitudinem. Judicabatur ergo non minùs quam judicabat. Rex item Vercingetorix proditiōnis infimulatus est à suis; tradit hæc Cæsar bellum Gallicum scribens. Nec Germanorum regibus infinita aut libera potestas erat, de minoribus rebus principes consultant, de majoribus omnes. Rex aut princeps auditur autoritate suadendi magis quàm jubendi potestate: si displicuit sententia, fremitu aspernantur. Hæc Tacitus. Tu vero quod inauditum prorsus esse modò exclamabas, nunc sæpiùs factum concedis, quinquaginta nimirum Scotorum reges aut expulsos aut in carceratos, aut necatos, quosdam etiam in publico capitali supplicio affectos, Quod in ipsâ Britannia factitatum est, cur tu, tyrannorum vespillo, infandum, inauditum esse tanta ejulatione vociferaris? Pergis Judæorum & Christianorum erga tyrannos suos religionem extollere, & mendacia ex mendaciis serere, quæ jam toties refutavimus. Modò Assyriorum & Persarum obedientiam latè prædicabas, nunc eorum rebellionem enumeras; & quos nunquam rebellasse paulò ante dixeras, nunc cur iidem toties rebellaverint multas causas affers. Ad narrationem deinde sumptide rege supplicii tamdiu intermissam revertis, ut, si tunc forte satis sedulo

ineptus

ineptus & ridiculus non eras, nunc esses. *Per aula sua membra ductum* narras. Quid per aulae membra intelligas scire gestio. Romanorum calamitates ex regno in rempub. verso recens, in quo te tibi met turpissimè mentiri suprà ostendimus. Qui ad Loiolitam, *seditiones tantum sub optimaribus & populo, certam sub tyranno perniciem esse* demonstrabas, nunc hominum vanissime & corruptissime *ob reges olim ejectos seditionum illa mala tanquam supplicia illos habuisse* audes dicere? scilicet quia centum Jacobæis donavit te postea rex Carolus, idcirco reges expulsos luent Romani. At malè cessit Julii Cæsaris intersectoribus. Sanè si cui unquam tyranno, huic parcitum vellem; quamvis enim regnum in repub. violentiùs invadebat, erat tamen regno fortasse dignissimus: nec ideo quenquam magis putem interfecti Cæsaris poenas pependisse, quàm deleri Catilinæ Caium Antonium Ciceronis collegam: quo postea de aliis criminibus damnato, ut inquit Cicero pro Flacco, *sepulchrum Catilina floribus ornatum est*. Fautores enim Catilinæ tunc exultabant, *iusta Catilina tum facta esse dictitabant*, ad invidiam cæteris conflandam, qui Catilinam sustulerant. Hæ sunt improborum artes, quibus viros præstantissimos à supplicio tyrannorum, & puniendus etiam sæpè facinorosissimis deterreant. Dicerem ego contrà, quod facile esset, quoties bene cessit, & prospere

rè tyrannorum interfectoris, si quid certi de eventu rerum colligere quis posset. Objectas, quòd *regem hereditarium Angli non illo affectum supplicio, quo tyranni solent mactari, sed eo quo latrones & proditoris rei.* Primum hæreditas ad maleficiorum impunitatem quid conferat nescio: conferre quicquam ut credat sapientia fieri vix potest. Quod tu deinde ad *immanitatem* refers, in eo lenitas potius Anglorum, & moderatio prædicanda erat; qui, cum tyrannum esse, omnes in patriam impietates, latrocinia, prodiciones, perduelliones in se complectatur, satis habebant supplicium haud gravius de tyranno sumere, quàm de simplici latrone quovis, aut proditore vulgari sumere solebant. Speras *exorituros esse aliquos Harmodios & Thrasibulos, qui, nostrorum cade, tyranni manibus parentent.* At tu citius animum despondebis, & vitam te dignam, omnibus bonis execrandus, antè suspendio finieris, quàm Harmodios Harmodiorum sanguine litantes tyranno videas. Tibi enim illud accidere verisimillimum est, deque te tam scelerato quis augurari rectius possit: alterum est impossibile. Tyrannorum triginta mentionem facis qui sub Gallieno rebellarunt. Quid si tyrannus tyrannum oppugnat, an omnes ergo qui oppugnant tyrannum, aut tollunt, tyranni erunt ipsi? haud tu id persuaseris, mancipium equestre; neque is qui author tibi est, Trebellius Pollio historico-
rum

rum propè ignobilissimus. *Si qui hostes, inquis, à Senatu judicari sunt, factio id fecit, non jus.* Nobis in memoriam revocas quid fecit Imperatores; factio nempe, & vis, & ut planius dicam, furor Antonii, non jus fecit, ut contra Senatum populumque Romanum ipsi priùs rebellarent. *Dedit, inquis, pœnas Galba qui contra Neronem insurrexit.* Dic etiam quas pœnas dedit Vespasianus, qui contra Vitellium. *Tantum, inquis, absuit Carolus à Nerone, quâ tum isti Ianiones Anglicani à Senatoribus illius temporis Romanis.* Trifurcifer, à quo laudari vituperium est, vituperari laus magna: Paucis modò periodis interpositis hac ipsa de re scribens, *Senatum sub imperatoribus togatorum mancipiorum confessum fuisse* aiebas, nunc eundem *Senatum aïs confessum regum fuisse*: hoc si ita est, quid obstat quin reges, te authore, togata mancipia sint. Beatos hoc laudatore reges! quo inter homines nihil nequius, inter quadrupedes nihil amentius: nisi si hoc illi peculiare dicam esse, quòd nemo literatiùs rudit. Senatum Angliæ Neroni visesse similiorem quàm Senatui Romano: Cogit me cacoëthes hoc tum ineptissimas conglutinandi similitudines, ut corrigam te; & quàm similis Neroni fuerit Carolus, ostendam. *Nero, inquis, matrem suam ferro necavit.* Carolus & patrem & regem veneno; nam, ut alia omittam indicia, qui Ducem veneficium reum legibus eripuit, fieri non potuit quin ipse

ipse reus quoque fuerit. Nero multa millia Christianorum occidit, Carolus multo plura. Non defuerunt, teste Suetonio, qui Neronem mortuum laudarent, qui desiderarent, qui per longum tempus, *vernīs astivisque floribus tumulum ejus ornarent*, ejus inimicis omnia mala ominarentur: non desunt qui Carolum eandem insaniam desiderent, & summis laudibus extollant, quorum tu, patibularis eques, chorum ducis. *Milites Angli molossis suis ferociores novum & inauditum tribunal instituerunt.* En acutissimum Salmasii sive symbolum sive adagium, jam sexies inculcatum, *Molossis suis ferociores*; adeste rhetores, vósque ludimagistri, delibate, si sapitis, flosculum hunc elegantissimum, qui tam Salmasio in deliciis est; codicillis vestris & capsulis mandate copiosissimi hominis pigmentum, ne intereat. Adeone etiam verba tua consumpsit rabies, ut cuculi in modum eadem identidem occinere cogaris? Quid hoc monstri esse dicam? Rabies, ut fabulantur, vertit Hecubam in canem, te Sti-Lupi dominum vertit in cuculum. Jam novas exordiris repugnantias: supra p. 113. affirmaveras *principem legibus solutum esse, non cogentibus solum, sed dirigentibus, nullas esse omnino quibus teneatur*; nunc dicturum te aïs *infra de regum differentia quatenus potestate alii minore alii majore in regnando fuerunt.* Vis probare, *reges non potuisse judicari, nec damnari à*
sub-

subjectis suis, argumento ut ipse ais, firmissimo, revera stolidissimo; nihil, inquis, aliud inter judices & reges discrimen fuit: atqui Iudaei iudicium tadio odióque adducti reges postulabant. An quia iudices illos magistratum malè gerentes iudicare & damnare poterant, ideóne putas tadio odióque eorum adductos postulasse reges quos jura omnia violantes punire, aut in ordinem cogere non poterant? quis, excepto te uno, tam fatuè ratiocionari solet? Aliud igitur quiddam erat cur regem peterent, quàm ut haberent dominum legibus superiorem; de quo nunc divinare nihil attinet: quicquid erat, haud prudenti consilio factum & Deus Propheta ejus testatus est. Iterum Rabbini tuis, ex quibus probasse te supra asserebas regem Judæorum non judicari, nunc litem acerrimam intendis, quòd regem & judicari & verberari posse tradiderint: quod idem planè est ac si facerere e mentitum te tunc esse, quod ex Rabbini probasse dixeras. Eo demùm descendis ut de numero equilium Salomonis, quot is equorum praesepia habuerit, ablitis regiae defentionis, controversias putidulas concites. Tandem ab agasone ad equitem redis aretalogum & tautologum, vel potiùs ad id monstri quod priùs eras, cuculum rabiosum. Quereris enim postremis hisce seculis discipline vigorem laxatum, regulam corruptam; quòd uni scilicet tyranno cunctis legibus soluto disciplinam omnem laxare,

laxare, mores omnium corrumpere impune non liceat. Hanc doctrinam *Brunistas inter reformatos* introduxisse ais. Ita Lutherus, Calvinus, Zuinglius, Bucerus & Orthodoxorum quotquot celeberrimi Theologi fuere, tuo iudicio Brunistæ sunt. Quo æquiore animo tua maledicta perferunt Angli, cum in ecclesiæ doctores præstantissimos, totamque adeo ecclesiam reformatam, iisdem propè contumeliis debacchari te audiant.

CAP. VI.



Ost legem Dei & naturæ agit-
tam abs te frustra, & pessimè
tractatam, unde nihil præter
ignorantiæ simul & improbita-
tis ignominiam retulisti, quid
deinde, in hac causa regiâ, præ-
ter nugas agere possis, non video. Cum autem
omnibus & bonis & doctis viris, huic etiam
causæ nobilissimæ abunde me satisfacisse spe-
rem, etiamsi hoc loco finem respondendi face-
rem, tamen ne interea videar aliis varietatem
potius & acumen tuum, quàm immodicam lo-
quacitatem defugisse, quo voles usque progre-
diar: eâ tamen brevitate, ut facilè appareat,
me iis omnibus perfunctum, si minùs quæ di-
gnitas, at saltem quæ necessitas causæ require-
bat, nunc hominum quorumvis expectationi,
vel

vel etiam curiositati morem gerere. *Hinc alius, inquis, & major argumentorum mihi surget ordo.* An major eo argumentorum ordine quem lex Dei & Naturæ suppeditabat? Fer opem, Lucina, parturit Mons Salmasius; non de nihilo nupsit uxori; foetum aliquem ingentem expectate mortales. *Si is qui rex est ac dicitur, postulari posset apud aliam potestatem, eam omnino regia majorem esse oporteret, qua autem major statueretur, hanc verè regiam dici & esse necesse esset.* Sic enim definienda potestas regia: *Qua summa est in repub. & singularis, & supra quam nulla alia agnoscitur.* O murem verè montanum, & ridiculum! Succurrite grammatici grammatico laboranti; actum est non de lege Dei aut naturæ, sed de glossario. Quid si sic responderè tibi? cedant nomina rebus, non est nostrum nomini cavere, qui rem sustulimus; curent id alii quibus cordi sunt reges; nos nostrâ utimur libertate: responsum sanè haud iniquum auferres. Verùm ut me per omnia ex æquo & bono tecum agere intelligas, non ex mea solùm, sed ex optimorum olim & prudentissimorum virorum sententiâ respondebo, qui & nomen & potestatem regiam cum potestate legum & populi majore, posse optimè consistere judicârunt. *Lycurgus, imprimis vir sapientiâ clarissimus, cum vellet maximè potestati regiae consulere, ut author est Plato, nullam aliam ejus conservandæ rationem invenire potuit, quàm*
ut

ut Senatûs & Ephorum, id est, populi potestatem regiâ maiorem in suâ patriâ constitueret, Idem sensit Theseus Euripidéus, qui cum Athenarum rex esset, populo tamen Atheniensi in libertatem cum magna sua gloria vindicato, & potestatem popularem extulit supra regiam, & regnum nihilo secius in illa civitate suis posteris reliquit. Unde Euripedes in Supplicibus ita loquentem inducit..

Δῆμον κατέστησ' αὐτὸν εἰς μοναρχίαν
Ἐλευθερώσας τήνδ' ἰσοψηφον πόλιν.

*Populum constitui ipsum in monarchiam,
Liberans hanc Urbem aequale jus suffragii habentem.*

Et rursus ad præconem Thebanum.

Πρῶτον μὲν ἤρξω ἃ λόγῳ ψάδῳς ξένο
Σητῶν τύραννον ἐνθάδ' ἢ γὰρ ἄρχεται
Ἐνὸς πρὸς ἀνδρὸς, αἴτλ' ἰλευθίῃ πόλιν,
Δῆμος δ' ἀνάσσει. —

*Primum incæpisti orationem falsè hospes,
Quærens tyrannum hic, non enim regitur
Ab uno viro, sed est libera hac civitas.*

Populus autem regnat —

Hæc ille; cùm tamen rex in illa civitate & esset & dictus esset. Testis est etiam divinus Plato in epistola octava, *Induxit Lycurgus senatum & Ephorum potestatem, τῆς βασιλικῆς ἀρχῆς σωτήριον potestati regia maximè salutarem,*

rem, qua hac ratione per tot saecula magna cum laude conservata est; postquam lex domina, rex facta est hominum. Lex autem rex esse non potest, nisi sit qui in regem quoque si usus venerit, lege possit agere. Sic temperatam potestatem regiam Siciliensibus commendat, ἡλευθερία γυνέσθω μετὰ βασιλικῆς δόξης, &c. sit libertas cū regia potestate: sit regia potestas ὑπὸ θυνοῖ reddenda rationi obnoxia; dominetur lex etiam regibus siquid prater legem fecerint. Aristoteles denique pollicorum 3^o, In repub. Spartano- rum videtur, inquit, regnum esse maximè, eorum regnorum qua sunt secundùm legem: omnes autem regni species secundùm legem fuisse ait, prater unam quam vocat παμβασιλείαν, neq; talem usquam extitisse meminit. Tale itaque regnum maximè omnium propriè & dici & esse regnū sensit Aristoteles, quale apud Spartanos fuit; talem proinde regē non minùs propriè & dici & esse regem, ubi tamen populus supra regem erat, negare non potuit. Cū tot tantique authores & nomen & rem regiam suā fide salvam regi præstiterint, etiam ubi populus penes se summam potestatem, tamen si exercere non solet, tamen, quoties opus est, obrinet, noli tam angusto animo summæ rerum Grammaticalium, hoc est vocabulorum, sic timere, ut potius quàm glossarii tui ratio turberetur, aut detrimenti quid capiat, pro- dere libertatem omnium, & rempub. velis.

Scito etiam dehinc, nomina rebus servire, non res nominibus; ita plus sapiens, nec in infinitum, quod meruis, *ibi. Frustra ergo Seneca tria illa genera statuum ita describit, Frustratur Seneca, nos liberi simus; & nisi fallor, non ii sumus quos Flores Senecæ in servitutem reducant. Seneca autem, si summam in uno potestatem esse dicit, populi tamen eam dicit esse, commissam videlicet regi ad salutem omnium, non ad perniciem; nec mancipio, sed usu duntaxat à populo datam. Non jam ergo per Deum reges regnant, sed per populum. Quasi vero Deus non ita regat populum, ut cui Deus vult, regnum tradat populus; cum in ipsis institutionibus Imperator Justinianus palam agnoscat, exinde Cæsares regnasse, ex quo lege regia populus is & in eos omne imperium suum, & potestatem concessit. Sed quousque ista recoquimus? quæ jam toties refutavimus. Rursus, quod ingenium tuum importunum & agreste, mores odiosissimos indicat, in nostra repub. quæ ad te nihil pertinet, alienigena & peregrinus curiosum te infers. Accede igitur, ut te tanto ardellione dignum est, cum insigni soleccismo. *Quicquid, inquit, illi perdis homines dicunt, ad populum decipiendum pertinent.* O scelerate! hoc cene erat, quod deminurus capite Grammaticus in nostram rempub. te ingerere cupiebas, ut soleccismis nos tuis & barbarissimis oppleres? Verum tu dic, populum quo modo decepimus? *Forma regimi-**

*giminis quam introducere non popularis est, sed
militaris. Ista scilicet grex ille perfugarum mer-
cedulâ conductum iussit te scribere: non tibi
igitur, qui ea blatis, quorum nihil intelligis, sed
iis qui te pretio conduxerunt, respondebitur.
Quis ordinem procerum & parlamento ijecit? an
populus? Immo populus; eoque facto servitu-
tis jugum à cervicibus suis haud ferendum de-
jecit. Ipsi milites, à quibus hoc factum dicitis,
non exteri, sed cives, & magna pars populi fu-
ere; idque cætero fere consentiente populo &
cupiente, nec sine Parlamenti etiam autori-
tate fecerunt. An populus, inquis, plebejâ or-
dinem domus inferioris mutilavit, alios fugando,
&c. Populus inquam; quod enim Senatûs
pars potior, id est sanior, fecit, in quo vera po-
puli potestas residebat, quid ni id populum
fecisse dicam? Quid si servire, quid si vatum
rempub. dare, in Senatu plures maluerint, an-
non id impedire, & libertatem retinere, si in
manu est suâ, paucioribus licebit? At duces hoc
fecerunt cum militibus suis. Habenda igitur gra-
tia est ducibus, quod operas & tabernarios
Londinenses qui paulo ante, veluti fax illa
Clodiana, ipsam curiam obsederant; ferocien-
tes repulerint, reipub. non defuerint: Tunc id-
circo jus Parlamenti primarium ac proprium,
ut libertati imprimis populi sive pace sive bel-
lo prospiciat, *militarem dominationem* appella-
bis? Verùm hoc à perduellibus; dici, qui tibi*

ista dictarunt, non est mirum; sic enim perditissima olim Antoniorum factio Senatum Romanum contra hostes patriæ ad saga euntem, *Castra Pompeii* appellare solebat. Jam verò fortissimo nostri exercitus ductori Cromuello, quod is amicorum læto agmine stipatus, non sine favore populi secundo, votis etiam bonorum omnium prosequentibus, in bellum Hibernicum Deo gratissimum proficisceretur, indixisse tuos gaudeo; auditis enim postea tot ejus victoriis, jam arbitror eos livore contabuisset. Multa prætereo quæ de Romanis militibus prolixè nugaris: quod sequitur a veritate remotissimum esse quis non videt? *Populi*, inquis, *potestas esse desinit ubi regis esse incipit*. Quo tandem jure? cum satis constet, omnes fere ubique genti a reges sub certis conditionibus traditum sibi regnum a populo accipere: quibus si rex non steterit, cur illa potestas, quæ fiducia tantum fuit, ad populum redire non debeat, tam a rege quàm a consule, vel ab alio quovis magistratu, tu velim doceas: nam quod *salutem reipub. id aïs postulare*, ineptias dicis; cum salutis ratio eadē omninò sit, sive a rege, sive ab optimatibus, sive a triumviris imperio sibi tradito perperam utentibus *potestas illa ad populum revertatur*; posse autem à magistratibus quibuscunque præterquam a rege solo ad populum reverti ipse concedis. Sanè si neque regi, neque ullis magistratibus imperiū in se populus metis compos

compos dederit, nisi tantummodò communis omnium salutis causâ, nihil potest obstare quo minùs ob causas planè contrarias ne interitus omnium sequatur, haud secus regi quàm aliis magistratibus, quod dedit imperium adimere possit: quid quòd uni etiam faciliùs quàm pluribus ademerit? & potestatem in se plusquam fiduciariam cuiquam mortalium tradere summae esset insaniae: neque credibile est illum ab orbe terrarum condito populum, qui quidem suae spontis esset, adeò miserè desipuisse, ut vel omnem prorsus potestatem ab se alienaret, aut suis magistratibus conceditam sine causis gravissimis ad se revocaret. Quod si discordiae, si bella intestina inde oriantur, regium certè jus nullum inde oritur illius potestatis per vim retinendae, quam populus suam sibi vindicat. Ex quo efficitur, quod ad prudentiam populi, non ad jus regis referendum est, quodque nos non negamus, *rectorem non facile mutandum esse*: nunquam ergo aut nulla prorsus de causa, nullo modo sequitur: neque tu adhuc quicquam allegasti, neque jus ullum regis expromsisti, quo minùs liceat consentienti populo, regem haud idoneum regno privare; siquidem id, quod etiam in Gallia tua saepiùs factum est, sine tumultu ac civili bello fieri possit. Cum itaque salus populi suprema lex sit, non salus tyranni, ac proinde populo in tyrannum, non tyranno in populum prodesse

H 3 debeat;

debeat, tu, qui tam sanctam legem, tam angustam tuis præstigiis pervertere es ausus, qui legem inter homines supremam, & populo maximè salutarem ad tyrannorum duntaxat impunitatem valere voluisti, tu inquam scito, quandoquidem Angli *Enthusiasta*, & *Enthei*, & *vates* toties tibi sumus, me vare scito, Deum tibi atque homines tanti piaculi ultores imminere: quanquam universum genus humanum subicere tyrannis, id est, quantum in te fuit, ad bestias damnare, hoc ipsum scelus tam immane sua partim in te ultio est, suis te furiis quocunque fugis terrarum, atque oberras, vel citiùs vel seriùs insequetur; & pejora etiam eà, quam nunc insanis, insanià agitabit. Venio nunc ad alterum argumentum tuum, prioris haud dissimile; si populo resumere liceret potestatem suam, *nihil tum esset, discriminis inter popularem & regalem statum, nisi quòd in hoc singuli rectores constituuntur, in illo plures.* Quid si nihil aliud interesset, nunquid inde respub. detrimenti caperet? Ecce autem aliæ differentiæ à temet ipso allatæ, temporis nimirum & *successionis*; cum populares magistratus annui fere sint, reges, nisi quid committant, perpetui; & in eadem plerunque familia. Differant ergo inter se aut non differant, de istis enim minutiis nihil laboro, in hoc certè conveniunt, quod utrobique populus quoties id interest reipub. potest quam alteri potestatem salutis publicæ causâ

causâ tradiderat, eam ad se rursus nec injuriâ
 tandem ob causam revocare. *At lege regia Roma
 sic appellata, de quâ in institutis, populus Roma-
 nus principi & in eum omne imperium suum, &
 potestatem concessit.* Nempe vi Cæsarium coactus,
 qui honesto legis titulo suam tantummodo
 violentiam sanxerunt; de quo supra, id quod
 ipsi jurisconsulti in hunc locum non dissimu-
 lant. Quod igitur legitimè, & volente populo
 concessum non est, id revocabile quin sit non
 dubitamus. Veruntamen rationi maximè con-
 sentaneum est, populum Romanum non aliam
 potestatem transulisse in principem, atque
 prius concesserat suis magistratibus; id est im-
 perium legitimum & revocabile, non tyranni-
 cum & absurdum; quocirca & consularem, &
 tribunitiam potestatem Cæsares recepere; di-
 ctatoriam nemo post Julium; populum in Cir-
 co adorare etiam solebant, ut ex Tacito & Clau-
 dianò supra meminimus. Verùm ut *multi olim
 privati se in servitutem alteri vendiderunt, sic po-
 rest populus universus.* O equitem ergastularium
 & mangonem, patriæ etiam tuæ æternum op-
 probrium! quem servitutis tam fœdum procu-
 ratorem ac lenonem publicum etiam servitia
 infima cujuscvis catastæ abhorreere atque con-
 spuere deberent! Sanè si populus hunc in mo-
 dum se regibus mancipasset, possent & reges
 eundem populum alteri cuivis domino manci-
 pare, aut pretio addicere; & tamen constat re-

gem ne patrimonium quidem coronæ posse alienare. Qui igitur coronæ, quod aiunt, & patrimonii regii usumfructum solum à populo concessum habet, is populi ipsius manceperit? Nō si pertusis auribus utrisque perforatus eques, non si gypsatis pedibus cursitares, tam esses omnium servorum vilissimus, quam nunc es, hujus tam pudendæ author sententiæ. Perge pœnas tuorum scelerum invitus, quod nunc facis, de remetipso sumere. Multa postremò de jure belli balbutis, quæ hic locum non habent; nam neque Carolus nos bello vicit, & majores ejus, etsi maximè vicissent, isti tamen juri sæpius renuntiaverant; nec verò tam unquam victi fuimus, ut nos in eorum nomen, illi in nostras leges non vicissim jurarent; quas cum Carolus insigniter violasset, vel olim victorem, vel nunc regem perjurum priùs ab ipso lacessiti armis debellavimus: ex tua autem sententia *quod armis queritur, transit in ejus dominium qui acquisivit.* Sis itaque deinceps hac in parte quàm voles verbosus, sis quod in Solino dudum fuisti, exercitator Plinianus, blateronum omnium verbosissimus, quicquid exinde argutaris, quicquid turbas, quicquid rabbinicaris, quicquid rauces ad finem usque hujus capitis, id totum non jam pro rege devicto, sed pro nobis divinâ ope victoribus contra regem desudare te scias.

CAP. VII.



Ropter duo incommoda sanè maxima, & pro tuo pondere gravissima, potestatem populi esse regia majorem proximo capite negasti: quippe, si concederes, quærendum regi aliud nomen esset, translato in populum regis vocabulo; & partitiones quædam politicæ conturbarentur: quorum alterum vocabularii dispendium foret, alterum, tuorum crux politico- rum. Ad ea sic à nobis responsum est, ut primum salutis & libertatis nostræ, deinde etiam nomenclaturæ tuæ & politices habita nonnulla ratio esset. Nunc *aliis rationibus evincendum esse ais, regem à sibi subjectis judicari non posse, quarum hæc erit maximè potens & valida, quod rex parem in suo regno non habeat.* Quid ais? non habet rex in suo regno parem? quid ergo illi regis Franciæ duodecim vetustissimi Pares; an fabulæ sunt & nugæ? an frustra & ad ludibrium sic nominati? Cæve istam viris Galliæ Principibus contumeliam dixeris. Quòd nisi revera sint regis pares, ut nominantur, vide ne in Franciæ regno potiùs quàm in nostra repub. quod unicum tuà interest, glossario illudatur. Age verò, fac planum, non esse regi in regno suo parem. *Quia, inquis, populus Romanus post reges exactos, duos constituit Consules, non unum; ut si unus peccaret, coërceri à collega posset.* Vix fingi-

quicquam potuit ineptius : cur igitur unus duntaxat Consulum fasces apud se habuit, non uterque, si ad alterutrum coercendum alter datus erat ? quid si etiam uterque contra rempub. conjurasset, an meliore loco res fuisset, quàm si collegam alteri nullum dedissent ? Constat autem & ambos Consules & Magistratus omnes obtemperare Senatui semper debuisse, quoties id e repub. esse, patribus & plebi visum est. Illustri exemplo esse poterunt Decemviri ; qui cum potestate consulari, & summa præditi essent, eos tamen omnes simul, etiam renitentes, patrum autoritas in ordinem coëgit ; Consules etiam nonnullos, antequam magistratum deposuerant, hostes judicatos & contra eos sumpta arma esse legimus : hostilia enim facientem, esse consulem nemo putabat. Sic bellum contra Antonium Consulem Senatus auctoritate est gestum : in quo victus pœnas capitis dedisset, nisi Octavianus Cæsar regnum affectans evertendæ reipub. consilium cum eo iniisset. Jam quòd *hoc proprium esse aîs Majestatis regalis, ut imperium penes unicum sit*, haud minùs lubricum est, & à te quidem ipso statim refellitur : *Judices, enim Hebraeorû & singuli & toto vita spatio imperium obtinebant ; Scriptura quoque reges eos vocat ; & tamen à Synedrio magno judicabantur.* Ita fit, dum dixisse omnia vîs videri, ut nihil fere nisi pugnancia loquaris. Quæro deinde qualem tu formam regiminis esse

esse dicas, cum Romanum imperium duo simul tresve imperatores habuerunt; an imperatores tibi, id est reges, an optimates, an triumviri videntur fuisse? An vero dices Romanum imperium sub Antonino & Vero, sub Diocletiano & Maximiano, sub Constantino & Licio, non unum imperium fuisse? Jam ista tua *statuum tria genera* tuismet ipsius argutiis periclitantur, si reges isti non fuere: si fuere, non est ergo proprium imperii regii, ut penes unicum sit. *Alter*, inquis, *horum si delinquat, potest aliter de eo referre ad populum vel ad senatum, ut accusetur & condemnetur.* Annon ergo iudicat vel populus vel Senatus ad quos aliter ille refert? Si quid igitur ipse tribuis tibi, collegam opus non erat ad iudicandum collegam. Heu te defensorem, nisi execrabilis potius esses, plane miserandum! unde quaque ictibus adeo opportunum, ut si forte per luserum destinare quis vellet, quovis te loco punctim ferire, vix esse credo ubi temere possit aberrare. *Ridiculum esse statuis, regem in se iudices dare velle à quibus capite damnaretur.* Atqui ego non ridiculum, sed optimum tibi oppono imperatorem Traianum; qui praefectum praetorio Saburanum, cum et insigni potestatis, uti mos erat, pugionem daret, crebro sic monuit. *Accipe hunc gladium pro me, si recte agam, sin aliter, in me magis, quod moderatorem omnium, vel errare minus fas sit.* Haec Dion & Aurelius Victor. Vi-

des ut judicem in se statuerit imperator egregius quamvis non parem. Hoc idem Tiberius per simulationem & vaniloquentiam fortasse dixisset ; Traianum autem virum optimum & sanctissimum non id ex animo dixisse quod verum, quod jus & fas esse sentiebat scelestus penè sit qui arbitretur. Quanto justius ergo Senatui, cum viribus superior potuerit non parere, planè ex officii ratione paruit ; & jure superiorem est fassus. De quo Plinius in Panegyrico. *Senatus ut susciperes quartum Consulatam & rogavit & jussit ; imperii hoc verbum non adulationis esse, obsequio tuo crede : & paulo post, hac nempe intentio tua ut libertatem revoces ac reducas.* Quod Traianus de se, idem Senatus de Traiano sensit, suamque authoritatem revera esse supremam ; nam qui imperatorem jubere potuit, potuit eundem & judicare. Sic Marcus Aurelius imperator, cum præfectus Syriæ Cassius regnum ei eripere conaretur, obtulit se in judicem vel Senatui vel Populo Romano ; paratus regno cedere siquidem iis ita videretur. Jam verò quis rectius aut melius de jure regio existimare & statuere queat, quàm ex ore ipso regum optimorum. Profectò jure naturali rex quisque bonus vel senatum vel populum habet sibi semper & parem & superiorem : Tyrannus autem cum naturâ infimus omnium sit, nemo non illi par atque superior existimandus est, quicumque viribus plus valet. Quem
admo-

admodum enim à vi olim ad leges 'duce natura deventum est, ita ubi leges pro nihilo habentur, necessariò, eadem etiam duce, ad vim est redeundum. *Hoc sentire*, inquit Cicero pro Sestio, *prudencia est; facere, fortitudinis; & sentire verò & facere, perfecta cumulat aq; virtutis.* Maneat hoc igitur in natura, nullis parasitorum artibus concutiendum, rege siue bono, siue malo, vel senatum vel populum esse superiorem. Quod & ipse confiteris, cum potestatem regiam à populo in regem transiisse dicis. Quam enim regi potestatem dedit, eam natura; ac virtute quadam, vel ut ita dicam virtualiter, etiam cum alteri dederit, tamen in se habet: Quæ enim causæ naturales isto modo per eminentiam quandam quidvis efficiunt, plus semper suæ retinent virtutis quàm impertiunt; nec impertiendo se exhauriunt, Vides, quo propius ad naturam accedimus, eò evidentius potestatem populi supra regiam eminere. Illud etiam constat, populum, modò id ei liberum sit, potestatem regi suam simpliciter & mancipio nunquam dare, neque naturâ posse dare; neque naturâ posse dare; sed tantùm salutis & libertatis publicæ causâ, quam cū rex procurare destiterit, intelligitur populū nihil dedisse; quia certo fini tantummodò dedit, monente ipsa naturâ; quem finem si neque natura neque populus assequitur, non erit magistratū, quod dedit quàm pactum quodvis aut foetus irritum. His ratio-

rationibus firmissimè probatur superiorem rege esse populum; unde argumentum hoc tuum *maximè potens & validum, non posse regem iudicari, quia parem in suo regno non habet, nec superiorem*, diluitur. Id enim assummus quod nullo modo concedimus. *In populari statu*, inquis, *Magistratus à populo positus ab eodem ob crimen plecti potest*; *In statu Aristocratico optimates*, *ab iis quos habent collegas, sed pro monstro est, ut rex in regno suo cogatur causam capitis dicere*. Quid nunc aliud concludis quàm miserrimos esse omnium & stultissimos, qui regem sibi constituunt? Sed quamobrem, quæso, non poterit populus tam regem punire reum, quàm popularem magistratum, aut optimates? An putas omnes populos qui sub regibus vivunt, amore servitutis usque eò deperiisse, ut, liberi cum essent, servire maluerint, seque omnes, seque totos in unius dominium viri sæpe mali, sæpe stulti ita tradere, ut contra dominum, si fors ferat, immaniissimum nullum in legibus, nullum in natura ipsa præsidium salutis, aut per fugium sibi reliquerint? cur ergo regibus primò regnum ineuntibus conditiones ferunt, cur leges etiam dant regnandi, au ut sporni se eò magis atque irrideri paterentur? adeone populum universum se abjicere, se deserere, sibi deesse, spem omnem in uno homine, eoque fere vanissimo, collocare? cur item jurant reges nihil se contra legem facturos? ut discant nempe mi-
feri

feri mortales suo maximo malo, solis licere regibus impunè peierare. Id quod hæc tua nefanda consecraria demonstrant. *Si rex qui eligitur, aliqua vel cum sacramento promiserit, quæ nisi promississet, fortasse nec sumptus esset, si stare nolit conventis, à populo judicari non potest. Immo si subditis suis juraverit in electione, se secundum leges regni justitiam administraturum, & nisi id faciat, eos sacramento fidelitatis fore solutos, & facto ipso abiturum esse potestate, à Deo non ab hominibus poena in fallentem exposcenda est.* Descripsi hæc, non ob elegantiam, sunt enim incultissima, nec quod ampliùs refutationis indigeant, etenim ipsa se refutant, se explodunt, se damnant apertissimâ falsitate sua, atque turpitudine; sed eò feci, ut ob merita tua egregia commendarem te regibus: qui inter officia aulæ tam multa aliquem dignitatis locum, aut munus idoneum tibi prospiciant: cum enim alii sint à rationibus, alii a poculis, alii a voluptatibus, tu iis commodissimè sanè eris à perjuriis; tu regis non elegantis, nam inscitus nimium es, sed perfidis summus arbiter eris. Verùm ut summam in te stultitiam summam improbitate conjunctam esse omnes fateantur, expendamus paulo accuratiùs præclara illa, quæ proximè affirmasti: *Rex, inquis, et si subditis juraverit in electione, se secundum leges regnaturum, & ni faciat, eos sacramento fidelitatis solutos fore, & se facto ipso abiturum potestate, abdicari*
tamen

tamen aut puniri ab iis non poterit. Qui minus quæso rex quàm popularis magistratus? quia in eo regimine populus non omnem transfundit potestatem suam ad magistratum. An hic igitur in regem? cui regnum in se non diutius tradunt, quàm id benè gesserit. Tam itaque rex juratus in leges, reus abjici aut puniri poterit, quàm popularis magistratus. Nam argumento illo Paneratico omnis in regem translata potestatis, amplius uti non potes, quod tuis ipse machinis imprudens arietasti. Cognoscite nunc *aliam potentissimam & invictam ejus rationem cur subditi regem* judicare nequeant, *quia legibus solutus est, quia leges solus rex omnes fert*; quæ cum falsissima esse jam toties probaverim, hæc etiam invicta tua ratio cum prior ad nihilum recidit. Cæterum rex ob delicta quævis privata, utpote stuprum, adulterium, & similia, si rarò plectitur, non tam justitia quam æquitate id fit, ne plus turbarum ex morte regis, & rerum mutatione populo eveniat, quàm boni ex uno atque altero vindicato. Ex quo verò omnibus gravis & intolerandus esse incipit, tum quidem, quoquo possunt modo, judicatum vel injudicatum omnes nationes tyrannum occidere fas esse semper credidere. Unde Marcus Tullius in secunda Philippica de Cæsaris interfectores. *Hi primi cum gladiis non in regnum appetentem, sed in regnantem impetum fecerunt: quod cum ipsum factum per se*
præclarum

*præclarum atque divinum est, tum est positum ad imitandum. Quam hujus tu dissimilis! Homicidium, adulterium, injuria, non hæc crimina regia sunt, sed privata. Euge parasite, lenones jam omnes & propudia aulica hac voce demeruisti; O quàm lepidè simul & parasitaris, & eadem operâ lenocinaris! Rex adulter bene potest regnare, & homicida, ideoque vita privari non debet, quia cum vita regno quoque exueretur; at nunquam hoc fuit probatum legibus divinis aut humanis, ut duplex vindicta de uno crimine sumeretur. Os impurum & infame! eadem ratione nec populares magistratus, nec optimates, ne duplici pœnâ afficerentur, ne judex quidem, aut senator flagitiosus pœnas capite ullas persolvere debebit; cum vita enim & ipsi suo magistratu privarentur. Ut potestatem, sic majestatem etiam populo adimere & in regem conferre studes; vicariam si vis & translatitiam, primariam certè non potes, uti nec potestatem. **Crimen**, inquis, *majestatis non potest committere rex adversus populum suum; potest autem populus adversus regem*, Et tamen rex propter populum duntaxat rex est, non populus propter regem. Populus igitur universus aut pars major plus semper rege debet posse: negas, & calculos ponis, *plus potest quam singuli, bini, terni, deni, centeni, milleni, decies milleni*. Esto. *Plus quam dimidia pars populi*. Non repugno. *Quid si alterius dimidia pars altera accedat, annò adhuc plus poterit?**

Minimè.

Minimè. Progredere ; quid aufers abacum, peritissime Logista, an progressionem Arithmeticam non calles? Vertit rationes, & *an non rex cum optimatibus plus potestatis habeat*, quærit; iterum nego, Vertumne, si pro optimatibus procures intelligas ; quoniam accidere potest, ut nemo inter eos optimatis nomine fir dignus: fir etiam sæpiùs, ut multo plures de plebe sint, qui virtute & sapientiâ procures antecellant; quibus cum pars populi major vel potior accedit, eos universe populi iustar esse haud verear dicere. *At si plus quam universi non potest, ergo rex erit tantum singulorum, non omnium universim sumptorum*, rectè ; nisi ipsi voluerint. Rationes jam subducito; comperies te imperitè supputando sortem perdidisse. *Dicunt Angli penes populum jus majestatis ex origine & natura residere, hic verò est omnium statuum ever- sionem inducere.* Etiamne Aristocratix, & Democratix? Credibile sanè narras: quid si etiam Gynæocratix, sub quo statu ferunt te domi propemodùm vapulare, an non bearent te Angli. O perpusilli homo animi? sed hoc frustra speraveris; æquissimè enim est comparatum, ut qui tyrannidem foris imponere omnibus cupias, ipse domi tuæ servitutem servias turpissimam, & minimè virilem. *Doceamus te oportet*, inquis, *quid nomine populi intelligi velimus.* Per multa sunt, quæ te doceri potiùs oporteret; nam quæ te propiùs attingunt, videris ea peni-

penitus nescire, & præter literulas nihil unquam didicisse, ne percipere quidem potuisse. Hoc tamen scire te putas, nos populi nomine plebem solum intelligere quod *optimatum consessum abrogavimus*. At illud est ipsum quod demonstrat nos populi vocabulo omnes ordinis cujuscunque cives comprehendere: qui unam tantummodo populi curiam supremam stabilivimus, in qua etiam principes, ut pars populi, non pro sese quidem solis, ut antea, sed pro iis municipiis, à quibus electi fuerint, suffragia ferendi legitimum jus habent. Invehers deinde in plebem, *cacam eam & brutam, regendi artem non habere, nil plebe ventosius, vanius, levius, mobilius*. Conveniunt in te optimè hæc omnia; & de infima quidem plebe sunt etiam vera, de media non item; quo ex numero prudentissimi fere sunt viri, & rerum peritissimi: cæteros hinc luxus & opulentia, inde egestas & inopia à virtute, & civilis prudentiæ studio plerunque avertit. *Plures nunc esse modos asseris regum constituendorum, qui nihil populo debent hoc nomine, & imprimis illi, qui regnum habent hereditarium*. At verò servæ sint istæ nationes oportet, & ad servitutem natæ, quæ talem agnoscant dominum, cui se sine assensu suo hereditate obvenisse credant: pro civibus certè, aut ingenuis & liberis haberi non possunt; nec rempub. habere ullam censendæ; quin immò inter facultates, & possessiones

fiones quasi heri sui, & herilis filii numerandæ sunt: nam quod ad jus dominii, quid distent a servitiis & pecoribus non video. Secundò, *qui armis sibi regnum fecit, populum*, inquis, *non potest authorem agnoscere imperii prolati vel usurpati*. At nobis non de victore, sed de subacto regis sermo nunc est; quid victor possit, alias disputabimus, tu hoc age. Quod autem regi jus patrisfamilias antiquum toties attribuis, ut inde *absoluta potestatis in regibus exemplum* petas, dissimillimum id esse jam sæpiùs ostendi: Aristoteles etiam ille quem crepas vel initio politicorum, si legisses, idem te docuisset: ubi ait malè eos judicare, qui inter patremfamilias & regem parùm interesse existimant; regnum enim à familia, non numero solum, sed specie differre. Postquam enim pagi in oppida & urbes crevere, evanuit paulatim jus illud regale familias, & agnosci desitum est. Hinc scribit Diodorus. l. i. regna antiquitus dari non regum filiis, sed iis quorum maxima in populum beneficia extiterunt. Et Justinus, *Principio rerum, gentium, nationumque imperium penes reges erat; quos ad fastigium hujus majestatis, non ambitio popularis, sed spectata inter venos moderatio provehebat*. Unde perspicuum est, in ipso gentium principio, imperium paternum & hæreditarium virtuti, & populari statim juri cessisse. Quæ origo imperii regii & ratio & causa maxime naturalis est. Ob eam enim ipsam causam primò

primò homines in unum convenere, non unus omnes insultaret, sed ut quocunq; alterum lædente, ne lex deesset, neve iudex inter homines, quo læsus aut defendatur aut saltem vindicaretur. Dispersos olim homines & dispalatos disersus aliquis, & sapiens ad vitam civilem traduxit; tu *hoc maxime consilio*, inquis. *ut in congregatos imperium haberet.* Nimbrorum fortasse intelligis, qui tyrannorum primus fuisse dicitur: vel hæc tua solius malitia est, quæ in illos olim magnos & excelsi animi viros cadere non potuit, tuum solius commentum, à nemine, quod sciam, ante te traditum; cum utilitatem & salutem generis humani, non sua commoda, suumque dominatum respexisse illos primos urbium conditores, antiquorum omnium monumentis proditum sit. Unum præterire non possum, quo tu veluti emblemate quodam exornare credo cætera hujus capituli voluisti: si *consulem*, inquis, *in iudicium venire oportuisset, priusquam magistratu abisset, dictator ad hoc creandus fuisset*, eum initio dixeris, *ideo collegam ei fuisse datum.* Sic tua semper inter se congruunt, & quid de quaque re dicas, quidve scribas, quàm nullius momenti sit, paginis fere singulis declarant. *Sub antiquis regibus Anglo-saxonice plebem, ais, ad comitia regni nunquam vocari solitam esse.* Si quis nostrorum hoc affirmasset, possem eum haud multo negotio erroris arguere; tua ista peregrina affirmatione

res nostras hallucinante minùs moveor. Et de communi regum jure quæ habuisti hæc ferè sunt. Reliqua multa, nam & sæpiſſimè deviùs eſſe ſoles, prætermitto, vel quæ fundamento nituntur nullo, vel quæ extra cauſam poſita ſunt: non enim id operam do, ut tibi par eſſe loquacitate videar.

C A P. VIII.



I de communi regum jure, Salmaſi, quæ ſentires, ea ſine contumelia cujuſquam protuliſſes, quamvis in hac rerum apud Anglos mutatione, tamen, cum libertate ſcribendi utere re tuâ, neque erat cur quiſquam Anglorum tibi ſuccenſeret, neque in aſſerenda, quam tueris, ſententia minus effeciſſes. Nam ſi hoc & Moſis & Chriſti præceptum eſt, *omnes regiſus ſuis tam bonis quam malis ſubjici, ſive Hiſpanos, ſive Gallos, ſive Italos, ſive Germanos, ſive Anglos, ſive Scotos*, quod ſupra (p. 127.) affirmabas, quid attinebat te exterum & ignotum jura noſtra balbutire, eaque velle nobis e cathedra quaſi ſchedulas tuas, & miſcellanea prælegere, quæ utcunque legibus divinis debere cedere multis antea verbis docueras. Nunc latis conſtat non tam tu opte ingenio ad cauſam regiam adje-
ciſſe te animum, quàm partim pretio, pro e-
jus,

jus, qui te conduxit, copia, maximo, partim
 spe præmii cujusdam majoris conductum fuisse,
 ut Anglos vicinorum nemini molestos, rerum
 tantummodò suarum arbitros libello infami
 lacerares. Hoc nisi esset, quenquamne tanta
 credibile est impudentia esse aut insania, ut
 longinquus & extraneus immergere se gratis in
 res nostras, ad partes etiam se adjungere non
 dubitaret? Nam quid tua malum refert quid
 rerum Angli inter se gerant? Quid tibi vis Ole,
 quid tibi quæris? nihilne domi habes quod ad
 re pertinet? Utinam eadem haberes quæ habuit
 ille notissimus in epigrammate Olus; & for-
 tasse habes; dignus profecto es. An uxor tua
 stimulatix illa, quæ ut in gratiam exulis Ca-
 roli hæc scriberes etiam currentem incitasse
 fertur, ampliores forte in Anglia professiones,
 & honoraria nescio quæ, redeunte Carolo, o-
 mnata tibi est? At scipote fœmina Virque, non
 esse locum in Anglia neque Lupo neque Lupi
 Domino. Unde mirum non est te toties in
 molossos nostros tantum rablem effudisse.
 Quin redis ad illustres illos in Gallia titulos
 tuos, & imprimis ad famelicum illum Lupi
 dominatum, deinde ad consistorium illud re-
 gis Christianissimi sacrum; nimis longo inter-
 vallo consiliarius peregrè abes à patribus. Verùm
 illa, quod planè video, neque te desiderat ne-
 que consilia tua; ne cum redires quidem pau-
 cis ab hinc annis, & cullinam Cardinalitiam ol-
 facere

facere & sectari cœpisses: sapit mehercule, sapit, teque oberrare semivirum Gallum cum uxore viro, & refertissimis inaniarum scriniis facile finit; donec stipem sive equiti grammatistæ, sive illustri Hippocritico satis largam alicubi gentium inveneris; si cui fert animus regi vel civitati, doctorem erraticum & venalem mercede maximâ liceri. Sed eccum tibi licitatore; vendibilis necne sis, & quanti, jam statim videbimus. *Pertendunt*, inquis, *Parricida regni Anglicani statum mixtum esse, non merè regium*. Pertendit idem sub Eduardo 6^{to}. Smithus noster, jurisconsultus idem bonus, & politicus, quem fuisse parricidam non dices, ejus libri ferè initio, quem de repub. Anglicana scripsit; neque id de nostrâ solùm, sed de omni penè repub. idque ex Aristotelis sententia verum esse affirmat; neque aliter ullam rempub. stare posse. At enim quasi piaculum esse crederes quicquam dicere sine repugnantis, ad priores illas & jam tritissimas fœdè revolveris. Nullam gentem ais esse nec fuisse unquam, qua regis appellatione non intellexeris eam potestatem qua solo Deo minor est, quaque solum Deum judicem haberet, & tamen paulo post fateris nomen regis datum vel olim fuisse ejusmodi potestatibus & magistratibus, qui plenum & liberum jus non haberent, sed à populi nutu dependens, ut susfetes Charithaginiensium, judices Hebraorum, reges Lacedæmoniorum, & postremo Aragonensium.

Sarisne

Satisne bellè tibi constas ? Tum quinque monarchiæ species ex Aristotele recensens, quarum una tantùm jus illud obtinuit quod tu regibus commune omnibus esse dicis. De qua haud semel jam dictum est, nullum ejus exemplum vel ab Aristotele allatum, vel usquam extitisse; quatuor reliquas, & legitimas, & legibus fuisse minores dilucidè ostendit. Primum horum erat regnum Læonicum, & maximè quidem ejus sententiâ regnum, eorum quatuor quæ legitima erant. Secundum, erat barbaricum, hoc solo diuturnum quia legitimum, & volente populo : nolente autem, omnis rex continuò non erit rex sed tyrannus, si invito populo regnum retinuerit, eodem teste Aristotele. l. 5. Idem de tertia regum specie dicendum est, quos ille *Æsymnetas* vocat, electos à populo, & ad certum plerunque tempus, certasque causas quales ferè apud Romanos fuere Dictatores. Quarta species eorum est qui Heroicis temporibus regnabant, quibus ob egregia merita regnum ultro à populo delatum erat, sed legitimum tamen; neq; verò hi nisi volente populo regnum tenebant, nec aliâ re magis differre has quatuor regni species à tyrannide ait, quàm quòd illic volente, hic invito populo regnetur. Quinta denique regni species; quæ *παμβασιλεία* dicitur, & est cum summa potestate, quale tu jus regum omnium esse vis, à philosopho planè damnatur, ut neque utile,

I

neque

neque iustum, neque naturale, nisi sit ut populus ferre possit istiusmodi regnum, illisque deferat qui virtute aliis omnibus longè prælucent. Hæc 3^{tio} politicorum, cuius obvia sunt. Verùm tu, credo, ut vel semel ingeniosus & floridus esse viderere, *has quinque monarchia species quinque; zonis mundi assimilare gestiebas; Inter duo extrema potentia regalis tres alia species interposita magis temperata videntur, ut inter zonas torridam & frigidam, qua media jacent.* Festivum caput! quam pulchras nobis similitudines semper concinnas! Tu igitur, quò regnum *absoluta potestatis* ipse damnas, ad zonam frigidam hinc ocyùs amolire; quæ post adventum illic tuum plus duplo frigebit: nos interim à te novo Archimede sphæram illam, quam describis, mirabilem expectamus, in qua duæ sint extremæ zonæ, una torrida, altera frigida, tres mediæ temperatæ. Reges, inquis, *Lacedæmoniorum in vincula conjici fas erat, morte mulctari fas non erat.* Quare? an quia damnatum capite Agidem lictores & peregrini milites rei novitate perculsi, regem ducere ad mortem non esse fas existimabant? Et populus quidem Spartanus ejus mortem ægrè tulit, non quòd rex capitali supplicia affectus fuerit, sed quod bonus, & popularis, factione divitum judicio illo circumventus esset. Sic itaque Plutarchus, *primus rex Agis ab ephoris est morte mulctatus;* quibus verbis non quid fas, sed quid factum sit, tantum-

tummodò narrat. Nam qui regem in jus ducere, vel etiam in vincula possunt, illos non posse eundem supplicio ultimo afficere, puerile est credere. Accingeris jam tandem ad jus regem Anglicorum. *Rex*, inquis, *in Anglia unus semper fuit*. Hoc eo dicis, quia modò dixeras, *rex non est nisi unus sit & unicuſ*. Quod si ita est, aliquot sanè quos credebam Angliæ reges fuisse, non erant: nam ut multos omittam Saxoniorum, qui consortes imperii vel filios vel fratres habuere. constat Henricum 2^{um} è stirpe Normanica cum filio regnasse. *Ostendant*, inquis, *aliquid regnum sub unius imperio cui non potestas absoluta adjuncta fuerit, in quibusdam tamen magis remissa, in aliis magis intenta*. Ostende tu potestatem absolutam remissam, a sine; annon absoluta est summa? Quomodo ergò summa & remissa simul erit? quoscunque fateberis reges cum remissa potestate esse, eos non esse cum absoluta facilè vincam; inferiores proinde esse populo naturâ libero, qui & suus ipse legislator est, & potestatem regiam vel intendere, vel remittere potest. Britannia, an tota olim regibus paruerit, incertum: Verisimilius est, prout tempora ferebant, nunc hanc nunc illam reipub. formam adhibuisse. Hinc Tacitus, *Britanni olim regibus parebant, nunc per principes factionibus & studiis trahuntur*. Deserti à Romanis, XL circiter annos sine regibus fuere, *regnum itaq; perpetuum*, quod affirmas, antiquitùs non fuit, fuisse

autem hæreditarium præcisè nego; quod & regum series, & mos creandi eorum demonstrat: disertis enim verbis petuntur populi suffragia. Postquam enim rex consuetum juramentum dedit, accedens archiepiscopus ad quatuor partes exstructi suggesti, toties rogat populum univèrsam his verbis, *consentire vultis de habendo ipsum regem?* planè ac si Romano more dixisset, vultis, jubetis hunc regnare? quod opus non foret, si regnum jure esset hæreditarium; verùm apud reges usurpatiopro jure sæpissimè obtinet. Tu Caroli bello toties victi jus regium jure belli fundare adniteris: Guilielmus scilicet cognomento *conquæstor* nos subjugavit. At sciunt qui in nostra historia peregrini non sunt, Anglorum opes uno illo prælio Hastingenfi non adedò attritas fuisse, quin bellum facile instaurare potuissent. Sed regem accipere, quàm victorem & tyrannum pari malebant. Dant itaque jusjurandum Guilielmo, se fidem ei servaturos: dat pariter Guilielmus juramentum illis, admotus altari, se omnia, quæ par est bonum regem, iis esse vicissim præstiturum. Cum falleret fidem, & rursus Angli arma caperent, diffusus ipse suis viribus juvavit denuò, ractis Evangeliiis, antiquas se leges Angliæ observaturum. Si postea igitur Anglos miserè afflixit, non id jure belli, sed jure perjurii fecit. Certum est præterea jam multis ab hinc seculis victos & victores in unam gentem coaluisse;

ut jus illud belli, si quod unquam fuit, antiquari jam diu necesse sit. Ipsius verba morientis quæ ex libro Cadomenfi fide dignissimo descripta reddimus, omnem dubitationem rollunt. *Neminem, inquit, Anglici regni constituo heredem.* Qua voce jus illud belli, simulque illud hæreditarium, cum ipso mortuo Guilielmo conclamatum atque sepultum est. Video nunc aliquam te in aula dignitatem, quod prædixi fore, esse adeprum, summus nimirum aulicæ astutiæ quæstor regius & procurator es factus. Unde hoc quod sequitur videris ex officio scribere, Vir magnifice. *Siquis prædecessorum regum factionibus procerum, vel seditionibus plebis coactus, aliquid de suo jure remiserit, id non potest successoribus obesse, quin id iterum sibi vindicet.* Rectè mones: itaque si quo tempore majores nostri aliquid de jure suo per ignaviam amisere, an id oberit nobis, eorum posteris? Pro se illi quidem servitutem spondere, si vellent, pro nobis certè non poterant; quibus idem semper jus erit nosmet liberandi, quod illiserat in servitutem se cuilibet tradendi. Miraris quid faciat, ut rex Britannia hodie debeat haberi pro magistratu tantum regni, qui autem alia regna in Christianitate obtinent, plenâ & libera potest. ut polleant. De Scotia remitto te ad Buchananum, de Gallia etiam tua, ubi hospes esse videris, ad Franco-galliam Hotomani, & Girardum Franciæ

Historicum, de cæteris ad alios, quorum nulli quod sciam Independentēs erant: ex quibus de jure regio longè alia poteras didicisse, quàm quæ doces. Cum jure belli tyrannidem regibus Angliæ asserere nequiveris, facis jam periculum in jure parasitico, Edicunt reges se regnare *Dei gratiâ*: quid si Deos se esse edixissent? te credo flaminem facile erant habituri: sic Pontifex Cantuariensis *Dei providentiâ* archiepiscopari præ se tulit. Tunc ista fatuitate Papam non vis esse regem in Ecclesia, ut regem constituere plusquam Papam in repub. possis? At in regni statutis appellatur *rex Dominus noster*. Mirus tu quidem statutorum nostrorum nomenclator repentè evasisti; nescis tamen multos dici dominos qui non sunt; nescis quàm iniquum sit ex titulis honorariis, ne dicam adulatoriis, de jure & veritate rerum statuere. Eodem refer quod *Parlamentum regis* dicitur: nam & frænum regis vocatur; adeoque non magis rex Parlamenti est dominus, quàm equus est sui dominus fræni. At *cur non regis Parlamentum, cum ab eo convocetur*. Dicam tibi, quia convocatur etiam senatus à Consule, neque propterea dominus illius concilii erat. Quod itaque rex Parlamentum convocat, id facit pro officio suo ac munere quod à populo accepit, ut etiam quos convocat, eos de arduis regni negotiis consulere, non de suis: aut si qua dici sua possunt, de iis postremo
semper

semper loco agi solitum erat ; ad arbitrium etiam Parlamenti , non suum. Nec verò ignorant , quorum id interest scire , Parlamentum sive vocatum , sive non vocatum bis intra verentem annum antiquitus ex lege potuisse convenire. At *regis etiam leges nuncupantur*. Sunt istæ quidem ad regem phaleræ ; rex autem Angliæ legem ferre per se potest nullam ; neque enim ad leges ferendas , sed ad custodiendas à populo latas constitutus erat. Tuque hic fatearis *congregari* idcirco *Parlamentum ut leges conderet*. Quapropter & lex Terræ vocatur , & lex populi : Unde Ethelstanus rex in præfatione legum , ubi omnes alloquitur , *vobis* , inquit , *lege vestrà* omnia largitus sum : & in formula jamenti quo reges Angliæ antequam crearentur obstringere se solebant , sic populus à rege stipulatur. *Concedis justas leges quas vulgus elegerit ?* respondet rex , *concedo*. Erras etiam tota Anglia , *qui regem quo tempore Parlamentum non habetur , plenè planeque totum regni statum regio jure gubernare aïs*. Nam neque de bello , neque de pace quod magni sit momenti , quicquam decernere , ne in jure quidem dicundo curiarum decretis intercedere potest. Jurant itaque judices nihil se in judiciis exercendis nisi ex lege facturos , etiamsi rex ipse dicto , aut mandato , vel etiam literis proprio annulo obsignatis aliter imperaret. Hinc sæpius in nostro jure rex *infans* dicitur ; nec sua jure aut dignitates , nisi

pueri aut pupilli in modum, possidere. Spec. Just. c. 4. sect. 22. hinc etiam illud apud nos crebrò dici solitum, *rex non potest facere injuriam*. Quod tu hoc modo sceleratè interpreteris, *non est injuria quam facit rex, quia in eo non puniatur*. Admirabilem hominis impudentiam & improbitatē vel hoc solo interprementato quis non perspiciat? *Capitis est imperare*, inquis, *non membrorum, rex Parlamenti caput est*. Siccine nugare, si cor tibi saperet? erras iterum (sed quis finis errorum est tuorum) in quo regis consiliarios à Parlamenti ordinibus non distinguis; nam neq; illos quidem omnes, horum verò nullos reliquis non probatos eligere debeat rex in plebeium autem ordinem ut quenquam eligeret, id sibi ne sumebat quidem unquam. Quibus id muneris populus delegabat, per municipia singuli suffragiis omnium eligebantur; notissima loquor, eoque brevior sum. *Falsum autem esse ais, quod sancta Independentia cultores asserunt, Parlamentum à populo fuisse institutum*. Video jam quid sit cur papatum tanto impetu evertere contendas: alium ipse papatum in alvo, quod aiunt, gestas: quid enim aliud uxor uxoris, lupus ex lupa gravidus, nisi aut portentum, aut papatum aliquem novum parturire te oportebat? certè Papa germanus quasi jam esses, sanctos & sanctas pro arbitrio facis; reges etiam omni peccato absolvis, &, quasi strato jam hoste, ejus exuviis opimum te ornas. Verùm quia
papa

papa nondum per te planè cecidit, dum libri illius tui *de Primatu*, secunda & tertia, & fortasse quarta & quinta pars prodierit, qui multos mortales tædio prius enecabit, quàm tu papam eo libro subegeris, sit satis interea, quæso, ad Antipapatum saltem aliquem posse ascendere; est altera, quam tu, præter illam Independentiam abs te irrisam, sanctorum in numerum seriò retulisti, Tyrannis regia: sanctæ ergo Tyranni dis regię tu Pontifex eris Maximus; & nequid desit tibi ad Papales titulos, *Servus etiam servorum* eris, non Dei, sed aulæ; quoniam illa Chenaani maledictio adhæsisse tibi ad præcordia videtur. *Bestiam* appellas *populum*. Quid interim es ipse? Non enim sacrum illud consistorium, neque sanctus ille Lupus te dominum suum aut populo exemerit aut vulgo; neque effecerit, quin, sicuti es, teterrima ipse bestia sis. Certè libri sacri prophetici magnorum regum monarchiam & dominationem immanis Bestiæ nomine ac specie adumbrare solent. *Sub regibus ante Guilielmum*, inquis, *nulla Parlamenti mentio exstat*. De vocabulo Gallicano altercari non lubet: res semper fuit: & Saxonice temporibus *Concilium Sapientum* vocari solitum concedis. Sapientes autem tam sunt plebis, quàm procerum ex numero. At in *statuto Mertonensi*, *vigesimo Hen. 3ⁱⁱ comitum & baronum tantum sit mentio*. Ita te semper nomina decipiunt, qui tantum in nominibus ætatem

omnem contrivisti; nobis enim satis constat, & Quinqueportuum curatores, & decuriones urbicos, nonnunquam & mercatores illo seculo baronum nomine appellatos fuisse, neque dubium omnino est, quin Parlamenti quosque Senatores quantumvis plebeios, ætas illa jure multò potiore barones nuncupaverit: nam & anno ejusdem regis 52. tam nobiles, quàm plebeios fuisse convocatos, Marlbrigii statutum, sicut & reliqua fere statuta omnia disertis verbis testantur: quos etiam plebeios, comitatuum magnates Edouardus tertius in præfatione Statuti Stapli, quam perdoctè pro me recitas, vocavit; eos nimirum *qui de singulis civitatibus pro toto comitatu venerant*; qui quidem plebeiorum ordinem constituebant, neque erant proceres, aut esse poterant. Tradit etiam liber statuti illis vetustior, qui inscribitur, *Modus habendi Parlamenta*, licere regi cum plebe sola Parlamentum habere, legesque ferre, quamvis Comites & Episcopi non adsint; non itidem licere regi cum comitibus & episcopis, si plebs non aderit. Hujus rei ratio quoque adjicitur; quia cum nondum Comites aut episcopi constituti essent, reges cum populo tamen Parlamenta, & Concilia peragebant: deinde comites pro se tantum veniunt; plebs pro suo quisque municipio. Ex quo iste ordo universi populi nomine adesse intelligitur; eoque nomine & potiore, & nobiliore ordine patricio, omni-

omnique ex parte anteponendum esse. Sed *judicandi potestas*, inquis, *penes domum plebeiam nunquam fuit*. Neque penes regem Angliæ fuit unquam : illud tamen memineris , principio omnem potestatem à populo fluxisse , & etiamnum proficisci. Quod & Marcus Tullius de lege agraria pulcherrimè ostendit. *Cum omnes potestates, imperia, curationes ab universo populo proficisci convenit, tum eas profectò maximè, qua constituuntur ad populi fructum aliquem, & commodum; in quo & universi deligant quem populo maximè consulturum putent, & unusquisque studio & suffragio suo viam sibi ad beneficium impetrandum munire possit.* Vides Parlamentorum veram originem, illis Saxonis archivis longè vetustiore. Dum in hac luce veritatis & sapientiæ versari licebit , frustra nobis obscuriorum ætatum tenebras offundere conaris. Quod non eò dici à me quisquam existimet , quasi ego de authoritate & prudentiâ majorum nostrorum detrahi quicquam velim; qui in legibus bonis ferendis plus sanè præstiterunt , quàm vel illa secula , vel illorum ingenium & cultus tulisse videatur : & quamvis leges rarè non bonas irrogarent , ignorantia tamen, & imbecillitatis humanæ sibi consilii , hoc veluti fundamentum legum omnium posteris tradi voluerunt , quod & nostri Jurisperiti omnes agnoscunt, ut si qua lex aut consuetudo legi divinæ aut naturali , aut rationi denique repugnaret ,

ea ne pro lege sancitā habeantur. Unde tu, etiam si edictum fortasse aliquod aut statutum in jure nostro, quo regi tyrannica potestas attribuat, invenire posses, id, cum & divinæ voluntati, & naturæ, & rationi contrarium sit, intelligitò, ex generali & primariā ista lege nostra quam attuli, rescindit apud nos, & ratum non esse; verum tu jus nullum tale regium apud nos invenies. Cum enim judicandi potestas primitus in ipso populo fuisse constet, Anglos autem eam ab se in regem nullā lege regiā unquam transtulisse, neminem enim judicare aut solet aut potest rex Angliæ, nisi per leges provisas jam & approbatas: Fleta l. 1. c. 17. sequitur eandem adhuc integram atque totam in populo sitam esse; nam parium domui aut nunquam traditā, aut recuperari jure posse non negabis. At, *regis est, inquis, de vico municipium, de eo civitatem facere, ergo illos creat qui constituunt domum inferiorem.* At inquam, oppida & municipia regibus antiquiora sunt; etiam in agris populus est populus. Jam Anglicis tuis magnopere delectamur; **Countie Court, The Turn/ Hundreda**; mira nempe docilitate centenos Jacobæos tuos Anglicè numerare didicisti.

Quis expedivit Salmasio suam Hundredam,
Picāmque docuit nostra verba conuri?
Magister artis venter, & Jacobæi
Centum, exulantis viscera marsupii regis.

Quod

*Quod si dolosa spes refulserit nummi,
Ipse Antichristi qui modò primatum Papæ
Minatus uno est dissipare sufflatu,
Cantabit ultrò Cardinalitium melos.*

Longam deinde de comitibus & Baronibus dissertationem subtexis; ut ostendas regem esse eorum omnium creatorem, quod facilè concedimus, eoque nomine regibus plerunque serviebant; ideoque ne gentis liberæ deinceps iudices essent rectè providimus. *Potestatem convocandi parlamentum quoties libet, & quando vult dissolvendi ex omni temporis memoria penes regem esse affirmas.* Tibine igitur balatroni mercenario & peregrino, perfugarum dictata excribenti, an disertis legum nostrarum verbis fides habenda sit, infra videbimus. *At, inquis, reges Anglia parlamento majus imperium habuisse alio argumento probatur, eoque invincibili; regis potestas perpetua est & ordinaria, qua per se sine Parlamento regnum administrat, Parliamenti extraordinaria est authoritas, & ad certas tantum res, nec sine rege quicquam validi statuere idonea.* Ubinam dicamus vim magnam latere hujus argumenti? an in *ordinaria & perpetua*? Atqui minores multi magistratus habent potestatem ordinariam & perpetuam, quos Irenarchas vocamus; an summam ergo habent? suprà etiam dixi potestatem regi idcirco traditam à populo fuisse, ut videret authoritate sibi commissa ne quid contra legem fiat, utque

utque leges custodiret nostras, non ut nobis imponeret suas: regis proinde potestatem nisi in regni curiis & per eas, esse nullam: immo populi potius ordinaria est omnis, qui per duodecim viros de omnibus judicat. Atque hinc est quòd interrogatus in curiâ reus, *Cui te permittis judicandum*; respondet semper ex more atque lege, *Deo & populo*, non Deo & regi, aut regis vicario. Parlamenti autem auctoritas quæ re & veritate, summa populi potestas in illum senatum collata est, si extraordinaria est dicenda, id tantum propter ejus eminentiam dicitur; alioqui, ut notum est, ipsi ordines appellantur, non extra ordinem ergo; & si non actu, quod aiunt, virtute tamen perpetuum habent in omnes curias & potestates ordinarias jus atque auctoritatem, idque sine rege. Offendunt nunc limarulas, opinor, aures tuas nostrorum barbaræ locutiones: cujus ego, si vacaret, aut operæ pretium esset, tot barbarissimos hoc uno libro notare possem, quot si pro merito lueres, profectò omnes puerorum ferulas in te frangi oporteret, nec tot aureos tibi dari, quot illi quondam pessimo poëtæ; colaphos longè plures. *Prodigium esse* ais, *omnibus portentis opinionum monstrosius, quod fanatici personam regis à potestate ejus sejungant*. Equidem dicta singulorum non præstitero: personam autem si pro homine vis dici, separari à potestate ejus nec absurde posse Chrysostomus haud fanaticus

fanaticus docere te potuit; qui præceptum Apostoli de potestatibus ita explanat, ut potestatem ibi & rem, non hominem intelligi asserat. Quidni dicam regem, qui contra leges quid facit, id agere ut privatum vel tyrannum, non ut regem legitima potestate præditum? Tu si uno in homine posse plures esse personas, easque ab ipso homine, sensu & cogitatione separabiles non intelligis, & sensus communis & latinitatis planè expers es. Sed hoc eò dicis, ut reges peccato omni absolvas, utque erepto Papæ primatu indutum te esse existimemus: *Rex*, inquis, *non posse peccare intelligitur, quia peccatum ejus pœna non consequitur.* Quisquis ergo non punitur, non peccat; non furtum sed pœna facit furem; Salmasius Grammaticus non facit solœcismos, quia manum ferulæ subduxit: post eversum à te Papam sint isti sanè Pontificatus tui canones, vel certè indulgentiæ tuæ, sive sanctæ Tyrannidis, sive sanctæ Servitutis Pontifex dici mavis. Congesta extremo capite maledicta tua in *Anglicana reipub. & Ecclesia statum* prætereo: hoc enim habent tui similes, homo contemptissime; ut quidque plurimà dignum est laude, id solent per calumniam maximè vituperare. Sed de jure regio apud nos, seu potius de jure populi in regem nequid temere affirmasse videar, proferre ex ipsis monumentis non gravabor, quamvis pauca quidem de multis, ea tamen quibus liquidò satis consti-

constabit, Anglos ex lege & instituto, & more etiam majorum suorum, regem nuper judicavisse. Post Romanorum ex insula discessum sui juris Britanni circiter annos 40. sine regibus fuere; quos primos crearunt, eorum nonnullos, supplicio affecere. Britannos eo nomine Gildas, contrà quàm tu facis, reprehendit, non quòd reges necavere, sed quòd injudicatos, vel ut ejus verbis utar, *non pro veri examinatione*. Vortigernus ob incestas cum filia nuptias, teste Nennio historicorum nostrorum post Gildam antiquissimo, damnatur à beato Germano, & omni concilio Britonum, ejusque filio Guorthemiro regnum traditur. Haud multo hæc post Augustini obitum gesta sunt: unde vanitas tua facile redarguitur, qui supra asseruisti, primum omnium Papam, & nominatim Zachariã docuisse, judicari reges posse. Circa annum Christi 600 Morcantius, qui tunc temporis in Cambria regnabat, propter cædem patrui ab Oudoceo Landaviæ Episcopo in exilium damnatur, quàmquam is exilii sententiam latifundiis quibusdam ecclesiæ donatis redemit. Ad Saxones jam veniamus; quorum jura cum reperiantur, facta prætermittam. Saxones Germanis oriundos memineris; qui nec infinitam aut liberam potestatem regibus dedere, & de rebus majoribus consultare omnes solebant; ex quibus intelligere est, Parlamentum, si solum nomen excipias, etiam apud Saxonum majores summa auctoritate

ritate viguisse. Et ab iis quidem Concilium Sapientum passim nominatur; ipsis Ethelberti temporibus, quem *decreta judiciorum juxta exempla Romanorum cum Concilio Sapientum constituisse* memorat Beda; sic Edvvinus Northanymbrorum, Inas occidentalium Saxonum rex, *habito cum sapientibus & Senioribus concilio*, novas leges promulgavit; alias Aluredus edidit *ex concilio*, item *prudentissimorum*; atque iis, inquit, *omnibus placuit edici earum observationes*. His atque aliis multis hujusmodi locis luce clarius est, delectos etiam ex plebe conciliis maximis interfuisse; nisi siquis Proceres solos sapientes esse arbitratur. Extat etiam apud nos perantiquus legum liber cui titulus *speculum Iusticiariorū*, in quo traditur primos Saxones post Britanniam subactam, cum reges crearent, ab iis jusjurandum exigere consuevisse, se, ut quemvis alium è populo, legibus ac judiciis subiectos fore. cap. 1. sect. 2. ibidem aut jus esse & æquum ut rex suos in Parlamento habeat pares, qui de injuriis quas vel rex vel regina fecerit, cognoscerent; regnante Aluredo sancitum legibus fuisse, ut singulis annis Parliamentum bis Londini, vel eo sæpius, si opus esset, haberetur. Quæ lex cū pessimo juris neglectu in desuetudinem abiisset, duabus sub Edouardo 3^{tio} sanctionibus renovata est. In alio etiam antiquo manuscripto, qui Modus Parlamenti inscribitur, hæc legimus; si rex Parliamentum

tum prius dimiserit, quàm ea omnia transigantur quorum causa concilium indictum erat, perjuri reus erit; & juramentum illud quod regnum initurus dederat, violasse censebitur. Quomodo enim, quod juratus est, justas leges concedit, quas populus elegerit, si earum eligendi facultatem perenti populo non dat vel rariùs Parlamentum convocando, vel citiùs dimittendo quàm res populi ferunt? Jus autem illud jurandum, quo rex Angliæ se obligat, nostri jurisperiti pro sanctissimâ lege semper habuere. Quod autem maximis reipub. periculis remedium inveniri potest (qui solus convocandi Parlamenti finis erat) si conventus ille magnus, & augustissimus ad regis libitum stultissimi sæpe & pervicacissimi dissolvitur? Possè à Parlamento abesse, procul dubiò minus est, quàm Parlamentum dissolvere: at rex per leges nostras illo Modorum libro traditas abesse à Parlamento, nisi planè ægrotaret, neque potuit, neque debuit: & ne tum quidem nisi inspecto ejus corpore à duodecim regni paribus, qui de aversa regis valetudine testimonium perhibere in senatu possent: solentne servi cum domino sic agere? Contrà verò plebeius ordo, sine quo Parlamentum haberi non potest, etiam à rege convocatus potuit non adesse, & secessione factâ, de reipub. malè gestâ cum rege expostulare: quod & prædictus liber testatur. Verùm, quod caput est, inter leges Edouardi

regis

DEFENSIO CAP. VIII. 191

regis vulgò Confessoris, una est eximia, quæ de regis officio tractat; cui rex officio si desit, *nomen regis in eo non constabit*. Hoc quid esset, ne non satis intelligeretur, Chilperici Francorum regis exemplum subnectit, cui idcirco regnum à Populo abrogatum erat. Puniri autem malum regem ex legis hujus sententia oportere, significabat ille S. Edouardi gladius cui nomen Curtana erat, quæ in regum creatione & pompâ gestare Comes Palatii solebat; *insignum*, inquit noster Matthæus Paris, *quod & regem, si oberret, habeat de jure potestatem cohibendi*: gladio autem nemo fere nisi capite punitur. Hanc legem, cum aliis boni illius Edouardi, Guilielmus ipse conquæstor anno regni quarto ratam habuit: & frequentissimo Anglorum Concilio prope Verulamium religiosissimè juratus confirmavit: quo factò non solùm jus omne belli, si quod in nos habuit, ipse extinxit, sed etiam hujus legis judicio atque sententiæ se subjecit. Ejus etiam filius Henricus cùm in omnes Edouardi leges, tùm in hanc quoque juravit; atque iis duntaxat conditionibus, vivente adhuc fratre Roberto natu majore, in regem est electus. Jurarunt eadem omnes deinceps reges, antequam insignia regni acciperent. Hiuc celebris ille & antiquus noster jurisconsultus Bractonus, l. 1. c. 8. *Non est rex ubi dominatur voluntas & non lex*. Et l. 3. c. 9. *rex est dum benè regit, tyrannum dum populus sibi creditum violenta op-*

primis

primit dominatione. Et ibidem, exercere debet rex potestatem juris, ut vicarius & minister Dei: potestas autem injuria diaboli est, non Dei: cum declinat ad injuriam rex, diaboli minister est. Eadem ferme habet verustus alter jurisconsultus, libri illius author qui Fleta inscribitur, memor nempe uterque & legis illius Eduardinae. verè quidem regiae, & regulæ illius in jure nostro primariæ à me supra dictæ, quâ nihil Dei legibus & rationi contrarium haberi pro lege potest; uti nec tyrannus pro rege, nec minister diaboli pro ministro Dei. Cum itaque lex maximè ratio recta sit, siquidem regi, siquidem Dei ministro obediendum est, eadem prorsus & ratione & lege, tyranno & diaboli ministro erit resistendû. Et quoniam de nomine sæpius quam de re ambigitur, tradunt iidem, regem Angliæ, etiamsi nomen regis nondum perdiderit, judicari tamen, ut quilibet è vulgo, & posse & debere. Bracton. l. 1. c. 8. Fleta. l. 1. c. 17. non debet esse rege major quisquam in exhibitione juris; minimus autem esse debet in judicio suscipiendo, si peccat, alii legunt si petat. Judicari igitur cum debeat rex noster, sive tyranni sub nomine, sive regis, quos habeat item judices legitimos dictu difficile non debet esse. Eisdem consulere authores haud pejus erit. Bracton. l. 1. c. 16. Fleta. l. 1. c. 17. In populo regendo rex habet superiores, legem, per quam factus est rex, & curiam suam, videlicet comites & Barones: comites dicun-

dicuntur quasi socii regis, & qui habet socium, habet magistrum; & ideo si rex fuerit sine frano, id est sine lege, debent ei franum ponere. Baronum autem nomine plebeium ordinem comprehendi supra ostendimus; quin & Pares etiam Parlamenti eosdem fuisse dictos, libri legum nostrarum antiqui passim tradunt: & imprimis liber ille cui titulus, Parlamenti modus; *Eliguntur inquit de omnibus regni paribus. 25.* quorum erunt *quinque milites, quinque cives* id est urbium delegati, *quinque municipes:* & duo milites pro comitatu majorem vocem habent in concedendo & contradicendo, quam major comes Anglia; & meritò quidem, illi enim pro tota aliqua provincia, aut municipio suffragia ferunt, isti pro se quisque dnraxat. Comites autem illos *Codicillares*, quos vocas, *rescriptitios*, cum feudales jam nulli sint, ad judicandum regem à quo creabantur minimè omnium idoneos esse, quis non videt? Cum itaque jus nostrum sit, ut est in illo speculo antiquo, regem habere pares, qui in Parlamento cognoscant & judicent, *si quid rex in aliquem populi sui peccaverit*, si notissimum sit licere apud nos cuivis de populo in minoribus quibusque curiis Injuriarum actionem regi intendere, quanto justius est, quantoque magis necessarium, si rex in universos peccaverit, ut habeat qui eum non refrænare solum & coercere, sed judicare & punire possint, Pessimè enim & ridiculè instituta esse

esse eam necesse est rempub. in qua de minimis regum injuriis etiam privato cuius cautum sit, de maximis nihil in commune provisum, nihil de salute omnium, quo minus liceat ei universos sine lege perdere, qui ne unum quidem lædere per legem poterat. Comites autem esse regis iudices, cum ostensum sit neque decere neque expedire, sequitur iudicium illud totum ad plebelum ordinem, qui & pares regni, & Barones, & populi totius potestate sibi delegatâ præditi sunt, jure optimo pertinere. Cum enim (ut in nostro jure scriptum est, quod supra attuli) plebs sola cum rege sine comitibus aut episcopis parlamentum constituat, quia rex cum sola plebe, etiam ante comites aut episcopos natos, parlamenta peragere solebat, eadem prorsus ratione plebs sola supremam & sine rege, & regem ipsum judicandi potestatem habebit, quod etiam ante ullum regem creatum, ipsa universi populi nomine concilia & parlamenta peragere, judicare, ferre leges, ipsa reges creare solita erat; non ut populo dominarentur, sed ut rem populi administrarent. Quem si rex contrâ injuriis afficere, & servitute opprimere conatus fuerit, ex ipsa legis nostræ sententiâ nomen regis in eo non constat, rex non est; quod si rex non sit, quid est quod ei pares amplius quæramus? Tyrannum enim jam re ipsa ab omnibus bonis judicatum nulli non satis pares atque idonei sunt, qui supplicio

plicio mactandum esse pro tribunali judicent. Hæc cum ita sint, tot testimoniis, tot legibus prolatis, abundè hoc demùm, quod erat propositum, evicisse arbitror, cum judicare regem penes plebem jure òptimo sit, cùmque plebs regem de repub. deque ecclesia, sine spe ulla san- nitatis, pessimè meritum supplicio ultimo affe- cerit, rectè atque ordine, exque repub. suaque fide, dignitate, legibus denique patriis fecisse. Neque possum hic non gratulari mihi de ma- joribus nostris, qui non minore prudentia ac libertate, quàm Romani olim, aut Græcorum præstantissimi, hanc rempub. instituerunt; neq; poterunt illi, siquid nostrarum rerum sentiunt, non sibi etiam gratulari de posteris suis; qui tam sapienter institutam, tanta libertate fun- datam ab impotenti regis dominatione, cum redacti penè in servitutem essent, tam fortiter tamque prudenter vindicarunt.

C A P. I X.



Atis jam arbitror palam esse, re- gem Angliæ etiam Anglorum le- gibus judicari posse; suos habere judices legitimos; quod erat pro- bandum. Quid tu porro? nam quæ tua repetis, ad ea non repetam mea) *ex rebus nunc ipsis propter quas comisia indici solent, proclive, inquis, est ostendere regem esse supra Par- lamentum*

lamentum. Sit sanè proclive quantum voles, in quo præcipitem te dari jam statim senties, *Parlamentum*, inquis, *congregari solet ad majoris momenti negotia in quibus regni salus & populi versatur.* Si rex *Parlamentum* convocat ad procurandas res populi, non suas, neque id nisi assensu eorum atque arbitrio quos convocat, quid aliud est, obsecro, nisi minister populi & procurator? cum, sine suffragiis eorum quos populus mittit, ne tantillum quidem, neque de aliis, neque de seipso decernere possit. Quod etiam argumento est, officium esse regis, toties *Parlamentum* convocare, quoties populus id petit: quandoquidè & res populi, non regis, iis comitiis tractantur, idque populi arbitrio. Quamvis enim regis quoque assensus honoris causa peti soleret, quem in rebus minoris momenti ad privatorum duntaxat commoda spectantibus poterat non præbere, poterat pro illa formula dicere, *rex deliberavit*, de iis tamen, quæ ad salutem omnium communem & libertatem pertinebant, prorsus abnuere nullo modo poterat; cum id & contra juramentum regiū esset, quo veluti lege firmissima tenebatur, & contra præcipuum magnæ Chartæ art. c. 29. *Non negabimus, non differemus cuiquam jus aut justitiam.* Non negabit rex justitiam, negabit ergò justas leges? non cuiquam, an ergò omnibus? ne in Curia quidem ullâ minori, an ergò in Senatu supremo? an verò rex ullus tantum sibi

arrogabit, ut quid justum sit, quid utile, se unum universo populo scire melius existimet? Cum ad hoc creatus & electus sit, ut justitiam faciat universis, Bracton. l. 3. c. 9. per eas nimirum leges quas vulgus elegerit. Unde illud in archivis nostris 7. H. 4. Rot. Parl. num. 59. *non est ulla regis prerogativa, qua ex justitia & aequitate quicquam derogat.* Et reges olim acta Parlamenti confirmare recusantes, Chartam videlicet magnam & hujusmodi alia, majores nostri sæpenumerò armis coëgere; neque propterea minùs valere illas leges, aut minùs legitimas esse jurisperiti nostri statuunt: quandoquidem assensum rex iis decretis coactus præbuit, quibus jure atq; sponte assentiri debebat. Tu dum contendis aliarum etiam gentium reges in potestate vel Synedrii vel Senatus, vel Concilii sui æquè fuisse, non nos in servitutem asseris, sed eas in libertatem: in quo idem facere pergis quod ab initio fecisti, quodque faciunt pragmaticorum stultissimi, ut incauti seipsum in lite sæpiùs contraveniant. At nos scilicet fatemur regem, ubicunque absit, in Parlamento tamen censeri præsentem vi potestatis: ergò quodcunque illic agitur à rege ipso actum intelligi. Tum quasi bolum aliquem nactus esses aut mercedulam, illorum recordatione Caroleorum delinitus, accipimus, inquis, quod dant: accipe igitur, quo dignus es, magnum malum, non enim damus, quod sperabas, inde sequi curiã illã non alia potiri potest.

fiat quàm à rege delegata. Si enim dicitur, potestas regis, quæcunque ea sit, à Parlamento abesse non potest, an suprema continuò dicitur? annon potius transferri in Parlamentum potestas regia videtur, utque minor majore contineri? sanè si Parlamentum potest, nolente & invito rege, acta ejus & privilegia quibusvis data revocare atque rescindere, si ipsius regis prærogativas, prout videtur, circumscribere, si proventus ejus annuos & impensas aulae, si famulitium ipsum, si totam denique rem domesticam regis moderari, si vel intimos ejus consiliarios atque amicos amovere, vel etiam è sinu abripere ad supplicium potest, si cuivis denique de plebe à rege ad Parlamentum quacunque de re provocatio est lege data, non itidem à Parlamento ad regem, quæ omnia & posse fieri, & fuisse sæpius facta, cum monumenta publica, tum legum nostrarum consultissimi testantur, neminem esse arbitror, modò mens ei sana sit, qui Parlamentum supra regem esse non fateatur. Nam in interregno etiam Parlamentum viger; & quod historiis nostris testatissimum est, nulla hæreditatis ratione habita, sepe, quem sibi visum est, suffragiis liberrimis regem creavit. Ut summatim dicam quod res est, Parlamentum est supremum gentis Concilium, ad hoc ipsum à Populo plane libero constitutum, & potestate plenà instructum, ut de summis rebus in commune consulat; rex ideo

erat

erat creatus, ut de consilio & sententiâ illorum
Ordinum consulta omnia exequenda curaret.
Quod cum Parlamentum ipsum edicto nuper
suo publicè declararet, neque enim pro æqui-
tate sua recusabat vel externis gentibus actio-
num suarum rationem ultrò ac sponte reddere,
ecce tibi è gurgustio nullius homo authorita-
tis, aut fidei, aut rei, Burgundus iste Verna, qui
summum Angliæ Senatum, jus patrium atque
suum scripto asserentem, *detestanda & horri-
bilis impostura* insimulat. Patriam mehercule
tuam pudebit, verbero, se tantæ impudentiæ
homuncionem genuisse. Sed habes fortasse quæ
salutariter monitos nos velis; agedum, auscul-
tamus, *Quas, inquis, leges sancire potest Parla-
mentum, in quo nec præsulum credo comparet?* Tū-
ne ergo, furiosè, præfules ex ecclesiâ extirpa-
tum ibas, ut in Parlamenta induceres? O homi-
nem impium, & Satanæ tradendum, quem ne-
que ecclesiâ non ejicere hypocritam & athe-
um, neque ulla respub. recipere communem
libertatis pestem atque labem deberet; qui e-
tiam quod nequit ex Evangelio, id ex Aristote-
le & Halicarnassæo, deinde ex statutis papisti-
cis pravissimorum temporum probare adniti-
tur, regem Angliæ caput esse Anglicanæ Ec-
clesiæ, ut epi copos compransores suos & ne-
cessarios nuper factos, quos ipse Deus extur-
bavit, novos iterum prædones & tyrannos, pro
virili sua parte, sancti Dei ecclesiæ imponat;

quorum universum ordinem, tanquam religioni Christianæ perniciosissimum, eradicandum esse stirpitus, editis antea libris clamose contenderat. Quis unquam Apostata, non dico à sua, quæ nulla certa est, sed à Christiana doctrina, quam ipse asseruerat, defectione tam foeda atq; nefaria descivit? *Episcopis de medio sublati, qui sub rege, & ex ejus arbitrio de causis ecclesiæ cognoscebant, quæris ad quos redibit ea cognitio.* O perditissime, verere tandem vel conscientiam tuam; memineris dum licet, nisi si hoc serò nimis te moneo, memineris quàm non impunè tibi erit, quàm inexpiabile demùm sit, sanctum Dei Spiritum sic illudere. Subsiste aliquando, & pone aliquem furori modum, ne te accensa ira numinis repentè corripiat; qui Christi gregem, unctosque Dei minimè tangendos; iis hostibus & sævissimis tyrannis obterendos iterum & persultandos tradere cupis, à quibus elata modò & mirifica Dei manus eos liberavit: túque ipse, nescio eorúmne ad fructum ullum, an ad perniciem & obdurationem tuam, liberandos esse docuisti. Quod si jus nullum dominandi in ecclesiā est episcopis, certè multo minùs est regibus; quicquid hominum statuta edicunt. Sciunt enim qui labris aliquanto plusquàm primoribus Evangelium gustarunt, ecclesiæ gubernationem divinam esse rotam ac spiritualem, non civilem. *In secularibus autem, quod ais supremam jurisdictionem habuisse*

se regem Anglia, id falsum esse jura nostra uberim declarant. Curias omnes ubi judicia exercentur, non rex, sed Parlamenti autoritas vel constituit, vel tollit; in quibus tamen minimo cuivis è plebe licebat regem in jus vocare; neque rarò judices contra regem pronuntiare solebant; id si rex vel interdicto, vel mandato, vel scriptis literis impedire conaretur, ex jramento & lege non parebant judices, sed ejusmodi mandata rejiciebant, & pro nihilo habebant: non poterat rex quenquam in vincula conjicere, aut ullius bona in publicum addicere; poterat neminem supplicio punire, nisi in aliquam curiam priùs citatum, ubi non rex, sed consueti judices sententias tulere; idque sæpe, ut supra dixi, contra regem. Hinc noster Bractonus l. 3. c. 9. *regia potestas juris est, non injuria; & nihil aliud potest rex, nisi id solum quod de jure potest*. Aliud tibi suggerunt **Causidici** tui, qui nuper solum verterunt; ex statutis nempe quibusdam haud antiquis sub Eduardo 4^{to}. **Henrico** 6^{to}, Eduardo 6^o promulgatis: neque viderunt, quamcunque regi potestatem statuta illa concedunt, eam à Parlamento concessam esse omnem & quasi precariam; quam & eadem autoritas poterat revocare. Cur sic passus es nasuto tibi imponi, ut quo maximè argumento regis potestatem ex decretis Parlamenti pendere demonstratur, eo absolutam esse & supremam probare te crederes? Nam & mo-

numenta nostra sanctiora testantur, reges nostros non hæreditati, non armis, non successioni; sed populo suam omnem potestatem debere. Talis potestas regia Henrico quarto, talis ante eum Richardo secundo à plebeio ordine concessa legitur; Rot. Parliament. 1. Hen. 4. nu. 108. haud secùs atque rex aliquis præsidibus suis præfecturas & provincias edicto & diplomate solet concedere. Id nempe literis publicis consignari diserte iussit Communium Domus, *concessisse se regi Richardo, ut tali bona libertate frueretur, qualem ante eum reges Angliæ habuere;* quàm cum rex ille *contra fidem Sacramenti sui* ad everisionem legum abuteretur, ab iisdem orbatus regno est. Iidem etiam, quod & eadem rotula testatur, in Parlamento edicunt, se prudentiâ & moderatione Henrici 4^{ti} confisos, *velle ac jubere ut in eadem magnâ libertate regia sit quam ejus progenitores obtinuerunt.* Illa autem nisi fiducia iam planè fuisset, quemadmodum hæc fuit, necesse est profectò & Parlamenti illius ordines; qui concederent quod suum non erat, ineptos ac vanos, & reges illos qui, quod suum jam erat, concessum ab aliis vellent accipere, & sibi & posteris injurios nimis fuisse: quorum utrumvis credibile non est. *Tertius pars, inquis, regia potestatis versatur circa militiam; hanc partem reges Angliæ sine pari & æmulo tractarunt.* Neque hoc verius quàm cætera quæ perfugarum fide scripsisti. Primum enim pacis & belli arbitrium

trium penes magnum regni senatum semper fuisse, & historiæ passim nostræ, & exterorum quotquot res nostras paulo accuratiùs attigere testantur. Sancti etiam Edvardi leges, in quas jurare nostri reges tenebantur, certissimam fidem faciunt, capite de Heretochiis, fuisse quasdam potestates per provincias & singulos comitatus regni constitutas, qui Heretoches vocabantur, latine ductores exercitus, qui provincialibus copiis præerant, non ad honorem coronæ solùm, sed ad utilitatem regni. Ibi vero eligebantur per commune conciliam, & per singulos comitatus in pleno conventu populari, sicut & vicecomites eligi debent. Ex quo facile perspicitur, & copias regni & copiarum ductores in potestate populi, non regis & antiquitùs fuisse, & esse oportere: illamque legem æquissimam nostro in regno haud minus valuisse, quàm olim in populari Romanorum statu valebat. De qua & M. Tullium audire non ab re fuerit. Philipp. 10. Omnes legiones, omnes copia qua ubique sunt, Populi R. sunt. Neque enim legiones qua Antonius Consul relinquerunt, Antonii potius quam reipub. fuisse dicuntur. Sancti autem Edouardi legem illam, cum aliis illius legibus Guilielmus ille conquæstor dictus, populo sic volente ac iubente, juratus confirmavit; sed & hanc insuper adjecit, c. 56. Omnes civitates, burgos, castella, singulis noctibus ita custodiri, prout vicecomes, & Aldermanni, ceterique prepositi per commune conciliam

*cilium ad utilitatem regni melius providebunt; & lege 62, ideo castella, burgi, civitates adificata sunt ad tuitionem gentium & populorum regni, idcirco & observari debent cum omni libertate, integritate, & ratione. Quid ergo? custodientur arces & oppida in pace contra fures & maleficos non nisi per commune Concilium ejusdem loci, non custodientur in maximo belli metu contra hostes sive externos sive intestinos per commune concilium totius gentis? sanè illud nisi concedatur, neque *libertas*, neque *integritas*, nec *ratio* denique in iis custodiendis ulla esse poterit; neque earum rerum quicquam assequemur, quarum causâ fundari primùm urbes & arces lex ipsa dicit. Majores certè nostri quidvis potiùs regi quàm sua arma & oppidorum præsidia tradere solebant; idem esse rati ac si libertatem ipsi suarum ferocitati regum & impotentiae proditum irent. Cujus rei exempla in historiis nostris uberrima cum sint, & jam notissima, inferere huic loco supervacaneum esset. At *protectionem rex debet subditis, quomodo eos protegere poterit, nisi arma virosque habeat in sua potestate?* At, inquam, habebat hæc omnia ad utilitatem regni, ut dictum est, non ad civium interitum & regni dispersionem: quod & Henrici tertii, temporibus, prudenter Leonardus quidem vir doctus in episcoporum conventu respondit Rustando Papæ nuntio & regis procuratori: om-*

nes ecclesia sunt Domini Papa, ut omnia principis esse dicimus, ad tuitionem, non ad fruitionem vel proprietatem, quod aiunt; ad defensionem, non ad dispersionem: eadem & prædictæ legis Edouardi sententia erat; quid est hoc aliud nisi potestate fiduciaria; non absoluta? qualem cum imperator bellicus fere habeat, id est delegatam, non planè propriam, non eò segnius populum, à quo eligitur, sive domi sive militiae defendere solet. Frustra autem Parlamenta, & impari sane congressu de legibus Sancti Edouardi & libertate olim cum regibus contendissent, si penes regem solum arma esse oportere existimassent; nam & leges quamlibet iniquas ipse dare si voluisset, frustra se *charta* quantumvis magna contra ferrum defendissent. At quid proderit, inquis, Parlamento militia magisterium habere, cum ne teruncium quidem ad eam sustinendam queat, nolente rege, de populo cogere. Ne sit ea tibi cura: primùm enim hoc falsò ponis, Parlamenti ordines non posse sine rege tributa populo imponere, à quo & ipsi missi sunt, & cujus causam suscipiunt. Deinde non potest te fugere tam sedulum de alienis rebus percunctatorem, sua sponte populum, vasis aureis atque argenteis conflatis, magnam vim pecuniæ in hoc bellum contra regem impendisse. Amplissimos exinde regum nostrorum annuos redditus recensens: nil nisi *millies quingenties quadragies crepas*; ex patri-

*monio regis maximas largitiones fieri solitas ab iis regibus qui liberalitatis laudibus emicuerunt, avidus audieras ; hac te illecebrâ veluti Bileam illum infamem proditores patriæ ad suam causam perduxere ; ut Dei populo maledicere, & divinis judiciis obstrepere auderes. Stulte ; quid tandem regi injusto ac violento tam immensæ opes profuere? Quid etiam tibi? ad quem nihil prorsus eorum, quæ spe ingenti devoraveras, pervenisse audio, præter unam illam crumenulam vitreis globulis vermiculatam, & centenis aureolis confertam. Cape istam Balaame, quam adamasti, iniquitatis mercedem, ac fruire. Pergis enim desipere ; *Erectio st. ind. ardi*, id est *vexilli ad regem solum pertinet*. Quapropter? quia.*

—— *Belli signum Laurenti Turnus ab arce Extulit.*

Tunc verò nescis, Grammaticæ hoc idem cuiusvis imperatoris bellici munus esse? At ait *Aristoteles*, *necesse est regi præsidium adstare, quo leges tueri possit; ergo oportet regem plus armis posse quàm populum universam*. Tales hic homo consequentias torquere solet, quales Ocnus funes apud inferos; quæ nulli sunt usui, nisi ut comedantur ab asinis: aliud enim est præsidium à populo datum, aliud armorum omnium potestas, quam *Aristoteles* hoc ipso, quem protulisti, loco à regibus abjudicat. Oportet inquit, habeat rex tantam circa se manum armatorum.

quanta

quanta singulis vel compluribus fortior sit, populo
 et eo minor; εἶναι δὲ τοσούτην ἰσχυρὴν ὅτε ἐκάστω
 μὲν καὶ ἐνὸς καὶ συμπλοίωνων κρείττω, ἢ δὲ
 πλεόντων ἤττω. Polit. l. 3. c. 11. Alioqui sanè, sub
 specie tuendi, possit statim & populum & le-
 ges sibi subdicere. Hoc autem rex & tyrannus
 interest; rex à senatu & populo volente, ac
 libente, quod satis est præsidii circa se habet
 contra hostes, & seditiosos: tyrannus invito
 senatu ac populo, vel hostium, vel perditio-
 rum civium præsidium sibi quàm maximum
 comparare nititur, contra senatum ipsum &
 populum. Concessit itaque Parlamentum re-
 gi, ut alia omnia, sic *standardi erectionem*; non
 ut infesta patriæ signa inferret, sed ut popu-
 lum contra eos defenderet, quos Parlamentum
 hostes judicat; si secus fuisset, ipse hostis judi-
 candus erat; cum juxta ipsam Sti Edovardi,
 vel quod sanctius est, ipsam naturæ legem, no-
 men regis perdiderit. Unde in prædictâ Philip-
 picâ, *amittit is omne exercitiis & imperii jus,*
qui eo imperio & exercitu rempub. oppugnat.
 Neque licebat regi *feudales* illos equites ad bel-
 lum evocare, quod Parlamenti autoritas non
 decrevisset; id quod ex statutis pluribus ma-
 nifestum est. Idem de vectigalibus & censu
 navali censendum; quem imperare civibus si-
 ne senatusconsulto rex non potuit: atque ita
 gravissimi legum nostrarum interpretes annis

ab hinc plus minus duodecim, tum cum ad huc firmissimum erat regium imperium, publicè statuerunt. Sic diu ante eos Fortescutius Henrici 6^{ti} cancellarius juris nostri consultissimus; rex Angliæ, inquit, neq; leges mutare potest, neq; tributa, nolente populo, imponere, sed nec probaverit quisquam ullis testimoniis antiquorum *regni Anglia statum mere esse regalem. Habet rex*, inquit Bractonus, *jurisdictionem super omnes*. Id est in curiâ; ubi regis quidem nomine nostris autè legibus jus redditur. *Omnis sub rege est*; id est, singuli; atq; ita se explicat ipse Bractonus locis à me supra citatis. Ad ea, quæ restant, ubi eundem volvis lapidè, in quo vales ipsum, credo, Sisyphum delassare, ex supra dictis abunde responderetur. De cetero, si quando Parlamenta suū regibus bonis obsequium amplissimis verbis citra assentationem & servitutē detulere, id quasi eodem modo tyrannis delatum esset, intelligi, aut populo fraudi esse nō debet; neq; enim justo obsequio libertas immiuitur. Quod autem ex Eduardo Coco & aliis citas, *Anglia regnum absolutum est imperium*, id est si ad ullum regē externum, aut Cæsarem respicias; vel, ut Cambdenus ait, *quia in imperii clientela non est*: alioqui adjicit uterque imperium hoc consistere non ex rege solo, sed ex corpore politico. Unde Fortescutius Fortesc. de laud. legum Angl. c. 9. rex, inquit, *Anglia populum gubernat non mera potestate regia, sed politica;*
populus

populus enim iis legibus gubernatur quas ipse fert. Externos hoc etiam scriptores non latebat. Hinc philippus Cominæus author gravissimus commentariorum quinto; inter omnia orbis terra regna, quorum ego notitiam habeo, non est meâ quidem sententiâ: ubi publicum moderatius tractetur, neque ubi regi minus liceat in populum, quàm in Anglia. Postremò ridiculum est, inquis, argumentum, quod afferunt, regna ante reges fuisse, quasi dicas lucem ante solem extitisse. At nos, ô bone vir, non regna, sed populum ante reges fuisse dicimus. Quem interim te magis ridiculum dicam, qui lucem ante solem extitisse, quasi ridiculum, neges. Ita dum in alienis curiosus esse vis, elementa dedidicisti. Miraris denique eos qui regem in comitiis regni viderunt solio sedentem, sub aureo & serico cœlo, potuisse in dubium vocare, utrum penes regem an penes Parlamentum majestas sit. Incredulos profectò homines narras, quos tam lucidum argumentum è cœlo ipso petatum nihil movit. Quod tu cœlum aureum homo stoicus adeò es religiosè & unicè contemplatus, ut & cœli Mosaici & Aristotelici oblitus esse penitus videre: cum in illo lucem ante solem extitisse negaveris, in hoc tres Zonas temperatas esse supra docueris: Quot Zonas in illo regis aureo & serico cœlo observaveris, nescio: hoc scio, te Zonam unanum centum stellis aureis bene temperatam ex illa tua cœlesti contemplatione abstulisse.



Um hæc omnis controversia de jure, sive generatim regio, sive separatim regis Angliæ, obstinatis partium contentionibus, quàm ipsa rei natura difficilior facta sit, spero, qui studium veritatis factionibus anteponunt, iis ea me ex lege Dei, jureq; gentium, ex institutis denique patriis, copiosè attulisse, quæ regem Angliæ judicari posse, atque etiam capite puniri indubitatum reliquerint. Cum cæteris, quorum animos aut superstitio occupavit, aut mentis acie anticipata regii splendoris admiratio ita perstrinxit, ut nihil in virtute ac libertate verà illustre ac splendidum videre possint, sive ratione & argumentis agamus, sive exemplis frustra contendimus. Tu verò Salmasi, ut reliqua omnia, ita hoc etiam absurdè admodum facere videris, qui cum omnes independentes omnibus probris onerare non desinas, regem ipsum quem defendis, maximè omnium independentem fuisse statuis: neq; *regnum populo, sed generi debuisse*: deinde quem *capitis causam dicere coactum* initio graviter dolebas, eum nunc *inauditum periisse* quæveris. At verò totam causæ dictiōnem ejus, fide summa Gallicè editam, inspicere si liber, persuasum tibi aliud fortasse erit. Carolo certè cum per aliquot dies continuos amplissima loquendi facta

copia

copia esset, non ille quidem est ea usus ad ob-
 jecta sibi crimina diluendum, sed ad iudicium
 illud ac iudices omninò rejiciendum. Qui au-
 tem reus aut tacer, aut aliena semper respòder,
 eum non est injuria, si manifestus criminum sit,
 vel inauditum condemnari. Carolum si *mor-*
tem ais planè egisse vita respondentem, assentior: si
 dicis piè & sanctè & *secure* vitam finiisse, scito
 aviam ejus Mariam, infamem forminam, pari in
 speciem pietate, sanctitate, constantia in peg-
 mate occubuisse: ne animi præsentia, quæ in
 morte quibusvis è vulgo maleficis per magna
 sæpè est, nimium tribuas: sæpè desperatio aut
 obfirmatus animus fortitudinis quandam spe-
 ciem & quasi personam induit; sæpè stupor
 tranquillitatis: videri se bonos, intrepidus, in-
 nocentes, interdum & sanctos pessimi quiq; non
 minùs in morte quàm in vita cupiunt; inq; ipsa
 scelerum suorum capitali poena solèt ultimam
 simulationis suæ & fraudum, quàm possunt spe-
 ciosissimè, pompam ducere; &, veluti poetæ
 authistrones deterrimi, plausum in ipso exitu
 ambitiosissimè captare. Nunc *ad ista quæstio-*
nem pervenisse te ais, quâ tractandum est quinam
fuerint illius regia condemnationis præcipui au-
thores. Cum de te potiùs inquirendum, sit quo-
 modo tu, homo exterus, & Gallicanus erro, ad
 quæstionem de rebus nostris, tibi tam alienis,
 habendam perveneris? quo pretio emptus? ve-
 rùm de eo satis constar. Te vero percontan-
 tem

tem de rebus nostris quis demùm docuit ? ipsi nimirum perfugæ, & perduelles patriæ, qui te hominem vanissimum nacti, mercede ad maledicendum facilè adduxerunt. Data deinde tibi est aliqua aut furibundi cujuspiam facellani semipapistæ, aut servientis aulici, de statu rerum scriptiuncula ; eam ut latinè veteres negotium tibi dabatur : hinc istæ narrationes confectæ, quas, si videtur, paulùm excutiamus. *In hanc condemnationem non centena millesima pars populi consensit.* Quid ergo cæteri, qui sese nolentibus tantum facinus fieri sunt passi ? an stipites, an trunci hominum, an fortè quales illi in scena Virgiliana,

Purpurea intexti tollunt aulaa Britanni ?

Non enim veros tu quidem Britannos, sed pictos nescio quos, vel etiam acu pictos videris mihi velle dicere. Cum itaque incredibile sit gentem bellicosam à tam paucis, iisque infimis de plebe sua, sub jugum mitti, quod in narratione tua primum occurrit, id esse falsissimum apparet. *Ordo ecclesiasticus erat ab ipso senatu ejectus.* Eo miserior itaque tua est infania, necdum enim te sentis insanire, qui eos è Parlamento quereris ejectos, quos rute ex ecclesia ejiciendos esse, libro longissimo scribis ? *Senatus alter ordo qui in proceribus consistebat, ducibus, comitibus, vicecomitibus, statione sua dejectus est.* Et meritò, à nullo enim municipio missi pro se tantùm sedebant, nihil juris in populum habe-

habebant, juri tamen ejus & libertati, suo quodam instituto, refragari in plerisque consueverant: erant à rege constituti, ejus comites, & famuli, & quasi umbræ, quo amoto, ipsi necesse est ad plebem, unde orti sunt, redigerentur. *Vna & deterrima portio Parlamenti potestatem sibi vindicare non debuit reges judicandi.* At plebeius ordo, quod te supra docui, non solum Parlamenti pars erat potissima, etiam sub regibus, sed per se ipse Parlamentum omnibus numeris absolutum & legitimum, etiam sine Comitibus, nedum Ecclesiasticis, constitutebat. Atqui *ne tota quidem hac ipsa pars ad sententiam de regis capitis ferendam admissa est.* Pars illa nempe non admissa, quem verbo regem, re hostem toties judicaverat, ad eum animis atque consiliis palam defecerat. Parlamenti ordines Anglicani cum iis qui à Scotiæ itidem Parlamento missi erant legati, idibus Januarii 1645. rescripserant regi, dolosas inducias & habenda secum Londini colloquela petenti, non posse se eum in urbem admittere, donec is de bello civili tribus jam regnis ejus operâ excitato, de cædibus tot civiū ejus jussu factis reipub. satisfecisset; deque pace firma atq; sincera iis conditionibus cavisset, quas ei utriusque regni Parlaamenta & tulerant sæpius, & larura essent: ipse è contrario postulata eorū æquissima jã septies humillimè oblata, respōsionibus aut surdis repudiaverat, aut ambiguīs eluserat.

ferat. Ordines tandem post tot annorum patientiam ut ne fraudulentus rex, quam debellare rempub. in acie non valebat, eam in vinculis per dilationes everteret, & jucundissimum ex nostris diffidiis frustum capiens, de victoribus etiam suis restitutus hostis insperatum sibi triumphum ageret, decernunt, se regis deinceps rationem non habituros, nullas se ei postulationes amplius esse missuros, aut ab eo accepturos: post hæc tamen decreta reperti sunt ex ipso Ordinum numero, qui invictissimi exercitus odio, ejus maximis rebus gestis invidebant, quemque post ingentia merita, dimittere cum ignominia cupiebant, & ministris aliquot seditiosis, quibus miserè serviebant, morem gerentes, opportunū sibi tempus nacti, cum eorum multi, quos à se longè dissentire sciebant, ad sedandos Presbyterianorum gliscentes jam tumultus, missi ab ipso orne, in provinciis abessent, mira levitate, ne dicam perfidia, decernunt, invecratum hostem, verbotenū duntaxat regem, nulla penè ab eo satisfactione prius accepta, aut cautione facta, ad urbem esse reducendum; in summam dignitatem atq; impérium aequè esse restituendum, ac si de repub. præclare meritis esset. Ita religioni, libertati, foederi denique illi à se toties jactato regem præponebant. Quid illi interea qui integri tam pestifera agitari consilia videbant? An ideo deesse patriæ, salutis suorum non prospici-

prospicere debuerant, eo quod istius mali contagio in ipsorum Ordinem penetraverat? At quis istos exclusit malè sanos? *Exercitus*, inquis, *Anglicanus*, id est, non externorum, sed fortissimorum & fidissimorum civium; quorum tribuni plerique, Senatores ipsi erant, quos illi boni exclusi patriâ ipsa excludendos, & in Hiberniam procul ablegandos esse censuerant; dum Scoti interim dubia jam fide quatuor Angliæ provincias suis finibus proximas magnis copiis infidebant, firmissima earum regionum oppida præfidiis tenebant, regem ipsum in custodia habebant: dum ipsi etiam factiones suorum atque tumultus, Parlamento ipsi plusquam minaces, & in urbe & in agris passim fovebant, qui paulò post in bellum non civile solum, sed & Scoticum illud erupere. Quòd si privatis etiam consiliis aut armis subvenire republicæ laudatissimum semper fuit, non est certè cur exercitus reprehendi possit, qui Parlamenti autoritate ad urbem accersitus imperata fecit; & regiorum factionem atque tumultum ipsi curiæ sæpiùs minitantem faciliè compescuit. In id autem discrimen adducta res erat, ut aut nos ab illis, aut illos à nobis opprimi necesse esset. Stabant ab illis Londinensium plerique institores atque opifices, & ministrorum factionosissimi quique; à nobis exercitus magna fide, modestia, virtute cognitus. Per hos cum retinere libertatem, rempub. salutem liceret,

ret, an hæc omnia per ignaviam & stultitiam, prodenda fuisse censes? Debellati regiarum partium duces arma quidem inviti, animum hostilem non deposuerant: omnibus belli renovandi occasionebus intenti ad urbem se receperant. Cum his, quamvis inimicissimis, quamvis sanguinem eorum avidè sitientibus, Presbyteriani, postquam non permitti sibi in omnes tam civilem quàm ecclesiasticam dominationem viderunt, clandestina consilia, & prioribus tum dictis tum factis indignissima confociare cœperant: eoque acerbioris processere, ut mallerent se regi denuò mancipare, quàm fratres suos in partem illam libertatis quam & ipsi suo sibi sanguine acquisiverant, admittere; mallerent tyrannum tot civium cruore perfusum, ità in superstitibus, & concepta jam ultione ardentem rursus experiri dominum, quàm fratres, & amicissimos æquo jure ferre sibi pares. Soli Independentes qui vocantur, & ad ultimum sibi constare, & sua uti victoria sciebant: qui ex rege hostem se fecerat, eum ex hoste regē esse amplius, sapienter, meo quidem judicio, nolebant: neque pacem idcirco non volebant, sed involutum pacis nomine aut bellum novum, aut æternam servitutem prudentes metuebant. Exercitum autem nostrum quo fufius infamare possis, narrationem quandam rerum nostrarum inconditam & strigosa exordiris, in qua tametsi multa falsa, multa frivola reperio, multa abs te vitio

virio data, quæ laudi ducenda essent, huic tamē alterā ex adverso narrationem opponere nihil arbitror attinere. Rationibus enim hīc non narrationibus certatur; atque illis utrobique, non his fides habebitur. Et sanē sunt ejusmodi res istæ, ut nisi justa historia dici pro dignitate nequeant. Melius itaque puto, quod de Carthagine Sallustius, filere tantis de rebus, quàm parū dicere: neque committam ut non solum virorum illustrium, sed Dei præcipuē maximi laudes, in hac rerum serie mirabili sæpissimē iterandas, tuis hoc libro intexam opprobriis. Ea igitur duntaxat, quæ argumenti habere speciem videntur, pro more decerpam. *Anglos & Scotos quod aīs solenni conventionē promississe, se regis majestatem conservaturos, omittis quibus id conditionibus promissere; si salvā nimirum religione & libertate id fieri posset: quibus utrisque ad extremum usque spiritum iniquus adeo & insidiosus rex iste erat, ut, vivente illo, & religionem periclitaturam, & libertatē interituram esse facile appareret. Sed redis jam ad illos regii supplicii auctores. Si res ipsa ponderibus suis, & momentis rectē aestimetur, exitus facti nefandi ita Independentibus imputari debet, ut principii & progressus gloriam Presbyteriani sibi possent vindicare: Audite Presbyteriani, ecquid nunc jūvat, ecquid confert ad innocentiae & fidelitatis opinionem vestræ, quod à rege puniendo abhorre tantopere vide-*
remini?

remini? Vos isto regis actore verbosissimo, accusatore vestro, *plusquam dimidium itineris confecistis*; vos ad quartum actum & ultra in *dramate hoc desultando fringulientes spectati estis*; vos merito regis occisi crimine notari debetis; ut qui *viam ad ipsam occidendam muniistis*, vos *nefariam illam securim cervicibus ejus infixistis*, non alii. Væ vobis imprimis, si unquam stirps Caroli regnum posthac in Anglos recuperabit: in vos, mihi credere, cudetur hæc faba. Sed Deo vota persolvite, fratres diligite liberatores vestros, qui illam calamitatem, arque certam perniciem ab invitis etiam vobis hætenus prohibuere. Postulamini vos item, quod aliquot annos ante per varias petitiones jus regis imminuere moliti estis, quod voces contumeliosas regi illis ipsis libellis quos nomine Senatus regi porrexistis, insertas publicastis, videlicet in illa declaratione dominorum & communium, Maii 26. 1641. aperte quid sensistis de regis autoritate aliquot perduellionem sperantibus & insanis positionibus facti estis. Hulle oppidi portas Hothamus, tali mandato à senatu accepto, venienti regi occlusit; vos quid rex pati posset, hoc primo rebellionis experimento cognoscere concupivistis. Quid hoc dici potuit accommodatius ad conciliandos inter se Anglorum animos, atque à rege penitus abalienandos? cum intelligere hinc possint, si rex revertatur, se non solum regis mortem, sed etiam petitiones quondam suas, & fre-

frequentissimi Parlamenti acta de liturgia & episcopis abolendis, de triennali Parlamento, & quæcunq; summo populi consensu ac plausu sancita sunt, tanquam seditiosas atque *insanas Presbyterianorum positiones* luituros. Sed repente mutat animum homo levissimus; & quod modò *rem ipsam rectè aestimanti* sibi videbatur solis Presbyterianis deberi, id nunc *rem eandem ab alio revolventi* Independentibus totum deberi videtur. Modò Presbyterianos *vi aperta atque armis contra regem grassatos esse*, eumque ab iis bello victum, captum, in carcerem conjectum affirmabat, nunc omnem *hanc rebellionis doctrinam* Independentium esse scribit. O hominis fidem & constantiam! quid aliam jam opus est narrationem comparare contra tuam, quæ ipsa sibi tam turpiter decoxit? Verùm de te si quis dubitat, albusne an ater homo sis, tua legat quæ sequuntur. *Tempus est*, inquis, *pandere unde & quando proruperit inimica regibus secta: belli isti sanè Puritani sub regno Elisabethæ prodire tenebris Orci, & Ecclesiam inde turbare primam cœperunt, immo rempub. ipsam: non enim sunt minores reipub. pestes quàm ecclesia.* Nunc te verè Balaamum vox ipsa sonat; ubi enim virus omne acerbitalis evomere cupiebas, ibi insciēs atque invitus benedixisti. Hoc enim tota Anglia notissimum est, si qui ad exemplum ecclesiarum vel Gallicarum vel Germanicarum, ut quasque reformatiores esse judicabant, purior

rem cultus divini rationem sequi studebant, quam penè omnem Episcopi nostri cæremoniis & superstitionibus contaminaverant, si qui tandem pietate erga Deum, aut vitæ integritate cæteris præstabant, eos ab Episcoporum fautoribus Puritanos fuisse nominatos. Hi sunt quorum doctrinam regibus inimicam esse clamitas; neque hi solum, nam *plerique reformatorum*, inquis, *qui in alios disciplina ejus articulos non jurarunt, hunc tamen unum videntur approbasse, qui regia adversatur dominationi.* Ita Independentes, dum gravissimè insectaris, laudas; qui eos ab integerrima Christianorum familia deducis; & quam doctrinam Independentium esse propriam ubique asseris, eam nunc *reformatorum plerosq; approbasse* confiteris; eo usque demùm audaciæ, impietatis, apostasiæ provectus es, ut etiam Episcopos, quos tanquam pestes & Antichristos ex Ecclesia radicirùs evellendos, atque exterminandos esse nuper docuisti, eos nunc *à rege tuendos fuisse* affirmas, ne quid *Sacramento* scilicet *inaugurationis derogatum* iret. Nihil est ulterius jam sceleris aut infamiæ quò possis procedere, quàm quòd solum superest, ut reformatam, quam polluis, religionem quamprimùm ejures. Quòd autem nos ais *omnes sectas & hæreses tolerare*, id noli accusare; quamdiu te implium, qui Christianorum sanctissimos, & plerosque etiam reformatos tibi adversos *à tenebris orci prodire audeas* dicere

dicere, te vanum, mendacem, & conductitium calumniatorem, te denique Apostatam ecclesia tamen tolleret. Tuas autem exinde sycophantias, quibus magnam reliqui capitis partem infumis, & quæ monstrosa dogmata Independentibus, ad cumulandum iis invidiam, affingis, quidni omittam? cum neque ad causam, hanc regiam omninò pertineant, & ea ferè sint quæ risum potius aut contemptum cujuscvis quam refutationem mereantur.

CAP. XI.



D undecimum hoc caput videre mihi, Salmasi, quamvis nullo cum pudore, cū aliqua tamen conscientia futilitatis tuæ accedere. Cū enim hoc loco perquirendum tibi proposueris *qua auctoritate* pronuntiatum de rege fuerit, subiungis quod à te nemo expectabat, *frustra id quari*; scilicet *questioni huic vix locū reliquit qualitas hominum qui id fecere*. Cū igitur, quàm es importunitatis & impudentiæ in hac causa suscipienda compertus, tam sis nunc etiā loquacitatis tibi conscius, ed à me brevius responsum feres. Quærenti jam tibi *qua auctoritate* ordo plebeius vel judicavit ipse regem, vel aliis id iudicium delegavit, respondeo supremā: supremam quemadmodum habuerit, docebunt te ea quæ tunc à me dicta sunt, cum te supra

hac ipsa re gnaviter ineptientem redarguerem. Quòd si tibi saltem crederes, posse te ullo tempore quod satis est dicere, non eadem toties cantare odiosissimè soleres. Aliis autem delegare suam judicandi potestatem ordo plebeius eadem sanè ratione potuit, qua tu regem, qui & ipse omnem potestatem à populo accepit, eandem aliis delegare potuisse dicis. Unde in illa solenni conventionem, quam nobis objecisti, cum Angliæ tum Scotiæ summi ordines religiosè profitentur ac spondent, ea se supplicia de perduellibus esse sumpturos, *quibus utriusque gentis potestas judiciaria suprema, aut qui ab ea delegatam potestatem accepturi erant*, plectendos judicarent. Audis hic utriusque gentis Senatum una voce testantem se posse suam auctoritatem judicariam, quam *supremam* ipsi vocant, aliis delegare: vanam ergo & frivolum de ista potestatis delegatione controversiam moves, At cum his, inquis, *judicibus è domo inferiori selectis juncti etiam judices fuere ex cohortibus militari- bus sumpti; nunquam autem militum fuit civem judicare*. Paucissimis te retundam; non enim de cive nunc, sed de hosto memineris nos loqui: quem si imperator bellicus cum tribunis militaribus suis, bello captum, & è vestigio, si ita videretur, occidendum, pro tribunali judicare voluerit, an quicquam præter jus belli aut morem censebitur fecisse? qui autem hostis reipublicæ, & bello captus est, ne pro cive

clive quidem is, nedum pro rege in ea repub. haberi potest. Hanc ipsa lex Regis Eduardi sacrosancta sententiam tulit; quæ negat malum regem aut esse regem, aut oportere regis nomine appellari. Ad illud autem quod aïs non *integram* plebis domum, sed *maneam & mutilam de regis capite judicasse*, sic habeto; eorum, qui regem plectendum esse censebant, longè majorem fuisse numerum, quàm qui res quasque in Parlamento transigere, etiam per absentiam cæterorum, ex lege debebant; qui cum suo vitio atque culpâ abessent (defectio enim animorum ad communem hostem pessima absentia erat) nullam iis, qui in fide permanserant, afferre moram conservandæ reipub. poterant; quam vacillantem, & ad servitutem atque interitum prope redactam, populus universus eorum fidei, prudentiæ, fortitudini primò commiserat. Atque illi quidem strenuè rem gessere; exulcerati regis impotentia furori, insidiis sese objecere; omnium libertati atque saluti suam posthabuere; omnia antehac Parlamenta, omnes majores suos prudentia, magnanimitate, constantia supergressi. Hos tamen populi magna pars, quamvis omnem illis fidem, operam, atque auxilium pollicita, ingratis animis in ipso cursu deseruit, Pars hæc servitutem & pacem cum ignavia atque luxuria ullis conditionibus volebat; pars altera tamen libertatem poscebat, pacem non nisi firmam

atque honestam. Quid hic ageret Senatus? partem hanc sanam, & sibi & patriæ fidelem defenderet, an defertricem illam sequeretur? Scio quid agere oportuisse dices; non enim Eurylochus, sed Elpenores, id est vile animal Circeum, portus immundus, turpissima servitute etiam sub foemina assuetus; unde nullum gustum virtutis, & quæ ex ea nascitur, libertatis habes; omnes esse servos cupis, quod nihil in tuo pectore generosum aut liberum sentis, nihil non ignobile atque servile aut loqueris aut spiras. Injicis porro scrupulum quod & *Scotia rexerat, de quo statuimus*, quasi idcirco in Anglia impune quidvis illi facere liceret. Ut hoc caput denique præ cæteris elumbe atque aridum aliquo saltem faceret dicto queas concludere, *duas*, inquis, *sunt vœcula iisdem ac totidem elementis constantes, solo literarum situ differentes, sed immane quantum significatione differentes, Vis, & Jus*. Minimè profectò mirum est, te trium literarum hominem tam scitam ex tribus literis argutiolam exculpere potuisse; hoc magis mirandum est quod toto libro asseris, duas res tam inter se cæteroqui *differentes*, in regibus unum atque idem esse. Quæ enim vis est unquam à regibus facta, quam non jus regium tu esse affirmasti? Hæc sunt quæ novem paginis bene longis responsione digna animadvertere potui; cætera sunt ea, quæ aut identidem repetita haud semel refutavimus, aut ad hanc causam

causam disceptandam nullum habent momentum. Iraque solito nunc brevior si sum, id non meae diligentiae, quam in hoc summo tædio languescere non patior, sed tuae loquacitati, rerum & rationum tam cassae atque inani, imputandum erit.

CAP. XII.



Ellem equidem, Salmasi, ne cui forte videar in regem Carolum, suo fato atque supplicio defunctum, iniquior esse aut acerbior, ut totum hunc de *criminibus ejus* locum, quod & tibi & tuis consultius fuisset, silentio præteritis. Nunc verò quoniam id magis placuit, ut de iis præfidenter & verbosè diceres, faciam profectò ut intelligas, nihil à te fieri incogitantius potuisse, quàm ut deterrimam causae tuae partem, nèpe ejus crimina ad extremum refricanda & accuratius inquirenda reservares; quæ, cum vera & atrocissima ostendere fuisset, & ejus memoriam omnibus bonis ingratam atque inuisam, & tui defensoris odium quàm maximum in animis legentium novissimè reliquant. *Dua, inquis, partes ejus accusationis fieri possunt; una in reprehensione vita versatur, altera in delictis quæ tanquam rex potuit committere.* Et vitam quidè ejus inter cōvivia, & ludos, & fœminarū greges

dilapsam facilè tacebo : quid enim habet luxus dignum memoratu? Aut quid hæc ad nos , si tantum privatus fecisset? postquam voluit rex esse, ut nec sibi vivere , ita ne peccare quidem sibi solum potuit. Primum enim exemplo suis vehementissimè nocuit ; secundo loco , quod temporis libidinibus & rebus ludicris impendit, quod erat plurimum, id totum reip. quam susceperat gubernandam , subduxit; postremo immensas opes, innumerabilem pecuniam non suam , sed publicam luxu domestico dilapidavit. Itaque domi rex malus primum esse coepit. Verum ad ea potius crimina *qua male regnando commisisse arguitur* transeamus. Hic doles tyrannum eum, *preditorem, & homicidam* fuisse iudicatum. Id non injuria factum demonstrabitur. Tyrannum autem prius , non ex vulgi opinione, sed ex Aristotelis & doctorum omnium iudicio definiamus. Tyrannus est qui suam duntaxat, non populi utilitatem spectat. Ita Aristoteles ethicorum decimo, & alibi, ita alii plerique. Suane commoda an populi spectarit Carolus, pauca hæc de multis, quæ tantummodo perstringã, testimonio erunt. Cum aulae sumptibus patrimonium & proventus regii non sufficerent, imponit gravissima populo tributa; iisque absumptis nova excogitavit ; non ut rempub. vel augetet, vel ornaret , vel defenderet, sed ut populi non unius opes vel unam in domum congerendas inferret , vel una in domo diffi-

dissiparet. Hunc in modum sine lege cum per-
 volaret omnia, quod unicum sciebat sibi fræno
 fore, Parlamentum aut funditus abolere, aut
 convocatum haud sæpius quàm id suis rationi-
 bus conduceret, sibi soli reddere obnoxium co-
 natus est. Quo fræno sibi detracto, aliud ipse
 populo frænum injecit: Germanos equites, pe-
 dites Hibernos per urbes, pérque oppida quasi
 in præsidiis, cum bellum esset nullum, collo-
 candos curavit: parúmne tibi adhuc tyrannus
 videtur? In quo etiam, ut in aliis multis rebus,
 quod supra per occasionem abs te datam osten-
 di (quanquam tu Carolum Neroni crudelissi-
 mo conferri indignaris) Neroni perquàm simi-
 lis erat: nam & Senatum ille è repub. se subla-
 turum persæpe erat minatus. Interea conscien-
 tiis religiosorum hominum, supra modum gra-
 vis, & cæremonias quasdam & superstitiosos
 cultus, quos è medio papismo in ecclesiam re-
 duxerat, omnes adigebat; renuentes aut exilio
 aut carcere multabat; Scotos bis eam ob cau-
 sam bello adortus est. Huc usque simplici sal-
 tem vice nomen tyranni commeruisse videatur.
 Nunc cur adjectum in accusatione proditoris
 nomen fuerit exponam. Cum huic Parlamento
 sæpiùs pollicitis, edictis, execrationibus con-
 firmasset, se nihil contra rempub. moliri, eo-
 dem ipso tempore aut papistarum delectus in
 Hibernia habebat, aut legatis ad regem Daniæ
 clanculùm missis, arma, equos, auxilium diserte

contra Parlamentum petebat, aut exercitum nunc Anglorum nunc Scotorum pretio sollicitabat; illis Urbem Londinum diripiendam, his quatuor provincias Aquilonares Scotorum ditioni adjungendas promisit, si sibi ad Parlamentum quoquo modo tollendum commodare suam operam vellent. Cum hæc non succederent, cuidam Dillonio perduelli dat secretiora ad Hibernos mandata, quibus juberentur omnes Anglos ejus insulæ colonos repente armis adoriri. Hæc ferè proditorum ejus monumenta sunt, non vanis rumoribus collecta, sed ipsis literis ipsius manu subscriptis atque signatis comperta. Homicidam denique fuisse, cujus acceptis mandatis Hiberni arma ceperint, ad quinquies centena millia Anglorum in summa pace nihil tale metuentium exquisitis cruciatibus occiderint, qui etiam tantum reliquis duobus regnis bellum civile conflaret, neminem puto negaturum. Addo enim quod in illo Vetenſi colloquio hujus belli & culpam & crimen rex palam in se suscepit, eoque omni Parlamentum notissima confessione suâ liberavit. Habes nunc breviter quamobrem rex Carolus & tyrannus & proditor & Homicida judicatus fuerit. At *cur non prius*, inquis, neque in illo *solemni fœdere*; neque postea cum dedititius esset, vel ab *Presbyterianis* vel ab *Independen-*
tibus sic judicatus est, sed potius, *ut regem de-*
cuit accipi, omni reverentia est exceptus? Vel
 hoc

hoc solo argumēto persuaderi cuivis intelligenti queat, non nisi serò tandem, & postquam omnia sustinuerant, omnia tentaverant, omnia perpeffi erant, deliberatum Ordinibus fuisse regem abjicere. Tu id solus malitiosè nimis in invidiâ rapis, quod summam eorum patientiam, æquanimitatem, moderationē, fastusq; regi tolerans tiam nimis fortasse longam apud omnes bono-testabitur. At *menſe Auguſto qui præceſſit ejus ſupplicium, domus Communium qua ſola jam tum renabat & Independentibus erat obnoxia, ſcripſit literas ad Scotos, quibus teſtabatur nunquam ſibi animo fuiſſe mutare ſtatum qui huc uſque in Anglia obtinuerat ſub rege, domo dominorum & Communium.* Vide jam quàm non doctrinæ Independentiũ abrogatio regis attribuenda ſit. Qui ſuam diſſimulare doctrinam non ſolent, etiam potiti rerũ profitentur *nunquam ſibi in animo fuiſſe ſtatum regni mutare.* Quod ſi id poſtmodum in mentē venit, quod in animo non fuit, cur non licebat quod rectius, & è repub. magis eſſe videbatur, id potiſſimum ſequi? præſertim cum Carolus neque exorari, neque ſecti ullo modo potuerit, ut juſtiſſimis eorum poſtulis, quæque ſemper eadem ab initio obtulerant, aſſentiretur. Quas initio de religione, quas de jure ſuo ſententias perverſiſſimas tuebatur, nobiſque adeò calamitoſas, in iſdem permanebat: ab illo Carolo nihil mutatus, qui & pace & bello, tanta nobis omnibus mala intulerat. Siquid

est assensus, id & invitè facere, & quamprimum
 sui juris foret, pro nihilo se habiturum haud
 obscuris indiciis significabat: idè aperte filius,
 abducta secum per eos dies classis parte, scrip-
 to, idem ipse per literas ad suos quosdam in ur-
 be declarabat. Interea cum Hibernis Anglorum
 hostibus immaniissimis, reclamante Parlamen-
 to, foedis conditionibus occultè pacem coag-
 mentaverat, Anglos ad repetita inutiliter col-
 loquia & pacem quoties invitabat, toties con-
 tra eos omni studio bellum coquebat. Hic illi
 quibus concedita respub. erat, quò se verteret?
 an commissam sibi nostram omnium salutem
 in manus hosti acerbissimo traderent? An alte-
 rum belli propè interneclini septenium, nequid
 pejus ominemur, gerendum nobis iterum, &
 exantlandum relinquerent: Deus meliorem il-
 lis mentem injectit, ut prioribus de rege non
 movendo cogitationibus, non enim ad decreta
 pervenerant, rempub. religionem, libertatè ex
 ipso illo foedere solenni anteponerent; quæ qui-
 dem stante rege constare non posse, tardiùs illi
 quidem quàm oportuit, sed aliquando tamen
 viderunt. Sanè Parlamento nunquam non libe-
 rum atque integrum esse debet, ex re natà quàm
 optimè reipub. consulere: neque ita se priori-
 bus addicere sententiis, ut religio sit in poste-
 rum, etiamsi Deus dederit, vel sibi, vel reipub.
 plus sapere. At Scoti non idem sentiunt, quinimo
 ad filium Carolum scribentes, sacratissimum regem
 appellant

appellant parentem ejus, & facerrimum facinus quo necatus est. Cave plura de Scotis, quos non novisti; nos novimus, cum eundem regem facerrimum, & homicidam & proditorem; facinus quo tyrannus necaretur sacratissimum appellarent. Nunc regi quam dicam scripsimus, quasi parum commodè scriptam cavillaris, & quid opus fuerit ad Elogium illud tyranni addere proditoris & homicidæ titulos, quæris: cum tyranni appellatio omnia mala comprehendat, tum quis tyrannus sit grammaticè & glossematicè etiam doces. Aufer nugas istas literator, quas una Aristotelis definitio modò allata nullo negotio dissolabit; quæque te doctorem docebit nomen tyranni, quoniam tuà nihil interest præter nomina intelligere, posse citra proditorem & homicidium stare. Arqui leges Anglicana non dicunt proditoris crimen regem incurrere si procuraverit seditionem contra se vel populum suum. Neque dicunt, inquam, Parlamentum læsæ Majestatis reum esse, si malum regem tollat, aut unquam fuisse, cum sæpius olim sustulerit: posse autem regem suam majestatem lædere atque minuere, immò amittere, clara voce testantur. Quod enim illa lege Sti Edouardi legitur, nomen regis perdere, nihil aliud est quàm regio munere ac dignitate privari; quod accidit Chilperico Franciæ regi, cujus exemplum illustrandæ rei causa eodem loco lex ipsa ponit. Committi autem summam perduellionem

tam in regnum, quam in regem non est apud
 nos jurisperitus qui inficias ire possit. Pro-
 voco ad ipsum, quem profers Granvillanum,
Siquis aliquid fecerit in mortem regis, vel sed itio-
nem regni, crimen proditionis esse. Sic ill machi-
 natio quâ Papistæ quidam Parlamenti curiam
 cum ipsis ordinibus uno ictu pulveris nitrati
 in auras disjicere parabant, non in regem so-
 lum, sed in Parlamentum & regnum, ab ipso
 Jacobo & utraque ordinum domo *summa pro-*
ditio judicata est. Quid plura attinet in re tam
 evidenti, quæ tamen facilè possem, statuta no-
 stra allegare? cum ridiculum planè sit & ratio-
 ne ipsa abhorrens, committi perduellionem in
 regem posse, in populum non posse, propter
 quem & cujus gratia, cujus, ut ita dicam, bona
 veniâ, rex est id quod est. Frustra igitur tot sta-
 tuta nostra deblateras, frustra in vetustis legum
 Anglicarum libris exerceas te atque volutas; ad
 quas vel ratas vel irritas habendas Parlamenti
 autoritas semper valuit; cujus etiam solius
 est, quid sit perduellio, quid læsa majestas in-
 terpretari: quam majestatem nunquam sic à
 populo in regem transiisse, ut non multo cel-
 sior atque augustior in Parlamento conspiciat-
 ur, jam sæpiùs ostendi. Te verò vappam &
 circulatorem Gallum jura nostra interpretan-
 tem quis ferat? Vos verò Anglorum perfugæ,
 tot episcopi, doctores, jurisconsulti, qui lite-
 raturam omnem & eruditionem vobiscum ex
 Anglia

Anglia aufugisse prædicatis, adeone ex vestrum numero nullus causam regiam atq; suam defendere satis strenuè satisque latinè sciebat, gentibusque exteris dijudicandam exponere, ut cerebrosus iste & crumenipeta Gallus mercede accersendus in partes necessariò esset, qui regis inopis, tot doctorum & sacerdotum infantia stipati, patrocinium susciperet? magna, mihi credite, infamia etiam hoc nomine apud exterarum nationes flagrabit: & meritò vos utique cecidissè causam omnes existimabunt, quam ne verbis quidem, nedum armis aut virtute sustinere valuistis. Sed ad te redeo, vir bone, dicendi perite, si tute modò ad te rediisti; nam stertentem te tam prope finem & de morte voluntaria nescio quid ab re somniantem offendo; tum statim negas *cadere in regem sua mentis compotem, ut populum seditionibus distrahat, exercitus suos hostibus debellandos tradat, ut factiones contra se suscitet.* Quæ omnia cum & alii multi reges, & Carolus ipse fecerit, dubitare nō potes, præsertim Stoicus, quin ut omnes improbi, sic omnes quoq; tyranni prorsus insaniant. Flaccum audi.

Quem mala stultitia, & quæcunque inscitia verum Cæcum agit, insanum Chrysippi porticus & grex Autumat, hac populos, hac magnos formula reges Excepto sapiente, tenet. —

Si igitur insani cujuscumque facti crimen à rege Carolo amovere cupis, debes improbitatem ab eò prius amovere quàm insaniam. At enim rex

non potuit prodicionem in eos committere, qui vassalli ipsius & subiecti fuere. Primum, cum æquè atque ulla gens hominùm liberi simus, nullum barbarum morem fraudi nobis esse patiemur: fac deinde vassallos fuisse nos regis, ne sic quidem tyrannum perferre dominum tenemur. Omnis ea subiectio, ut ipsæ leges nostræ loquuntur, *honesto & utili* definita est. Leg. Hen. 1. c. 55. Fidem eam esse *mutuam* jurisconsulti omnes tradunt, si dominus *ligeam*, quod aiunt, *defensionem* Præstiterit: sin è contrario nimium saevus fuerit, aut atrocem aliquam injuriam intulerit, *dissolvi & penitus extingu* omni hominū *connexionem*, Hæc ipsa Bractoni verba & Fletræ sunt. Unde vassallum est ubi lex ipsa in dominum armat; eumque singulari certamine à vassallo, si acciderit interimendum tradit. Idem si universæ civitati aut nationi in tyrannum non licuerit, deterior liberorum hominum conditio quàm servorum erit. Nunc Caroli homicidia aliorum regum partim homicidiis, partim justè factis excusare contendis. De Ianienâ Hiberniensi *remittis lectorem ad opus illud regium Iconis Basilicæ*; & ego te remitto ad Iconoclastem. *Captam Rupellam*, proditos Rupellenses, *ostentatam potius quàm datam opem*, imputari Carolo non vis: imputetur necne meritò, non habeo dicere; satis supérque ab eo peccatum est domi, ne externa persequi curem: omnes interim ecclesias protestantium, quotquot ullo rem-

tempore se contra reges religionis hostes armis defenderunt, eodem nomine rebellionis damnas. Quam contumeliam ab alumno suo sibi illatam quanti intersit ad disciplinam ecclesiasticam, suamque tuendam integritatem, non negligere, secum ipsi cogitent: nos etiam Anglos ea expeditione proditos acerbè tulimus. Qui enim regnum Angliæ in tyrannidem convertere diu meditatus erat, non, nisi extincto priùs militari civium robore ac flore, cogitata perficere se posse arbitrabatur. Aliud erat crimen regis quod ex jurejurando à regibus regnum capeissentibùs dari solito verba quædam ejus jussu erasa fuerint, antequam jurasset. O facinus indignum & execrandum! impium qui fecit, quid dicam qui defendit? nam quæ potuit, per Deum immortalem, quæ perfidia, aut juris violatio esse major? quid illi sanctius post sacratissima religionis mysteria illo jurejurando esse debuit? Quis quæso sceleratior, isne qui in legem peccat, an qui secum legem ipsam ut peccare faciat dat operam? aut denique ipsam legem tollit ne peccasse videatur? Agedum, jus hoc religiosissimè jurandum rex iste violavit; sed ne palàm tamen violasse videretur, turpissimo quodam adulterio per dolum corrumpit; & ne pejerasse diceretur, jus ipsum jurandum in perjurium vertit. Quid aliud potuit sperari, nisi injustissimè, versutissimè, atque infelicissimè regnaturum esse eum, qui ab injuria tam de-

testanda

testanda auspicatus regnum est; júsque illud primum adulterare auderet, quod solum imdedimento sibi fore, ne jura omnia perverteret, putabat. At enim *Sacramentum* illud, sic enim defendis, *non magis obligare reges potest quàm leges; legibus autem se devinciri velle praefecerunt, & secundum eas vivere, cum tamen re vera iis soluti sint.* Quemquàmne tam sacrilego, tamque incesto ore esse, ut sacramentum religiosissimum tactis Evangeliiis datum, quasi per se leviculum solvi sine causa posse asserat? Te verò, scelus atque portentum ipse Carolus redarguit; qui cum sacramentum illud non esse per se leve quidpiam existimaret, idcirco ejus religionem aut subterfugere, aut fallacià quavis eludere satius duxit, quàm apertè violare, & corruptor jusjurandi hujus & falsarius esse maluit, quàm manifestè perjurus. At verò jurat quidem rex populo suo, ut *populus vicissim regi, sed populus jurat regi fidelitatem, non populo rex.* Lepidum sanè hominis commentum! annon qui juratus promittit atque spondet se quidpiam fideliter praestiturum, fidem suam illis obligat qui jusjurandum ab eo exigunt? Rex sanè omnis quoad praestanda ea quae promittit, & *fidelitatem*, & *obsequium*, & *obedientiam* populo jurat. Hic ad Guilielmum Conquæstorem recurris, qui ipse, non quod sibi collibitum erat, sed quod populus ab eo & magnates postulabant, id omne haud semel

semel jurare est coactus se præstiturum. Quòd,
 si multi reges *coronam* solenni ritu non accipi-
 unt, & proinde non jurant, & tamen regnant,
 idem de populo responderi potest, cujus pars
 magna fidelitatem nunquam juravit. Si rex ob
 eam causam solutus erit, erit & populus. Quæ
 autem pars populi jurabat, non regi solùm, sed
 regno & legibus jurabat, à quibus rex factus
 est, & quidem eatenus tantùm regi, quod is le-
 ges obsevarer, *quas vulgus*, id est, communitas
 sive plebeius ordo *elegerit*. Stultior enim sit,
 qui legum nostrarum loquelam ad puriorem
 semper latinitatem exigere velit. Hanc clausu-
 lam, *quas Vulgus elegerit*, Carolus, antequam co-
 ronam acciperet ex formula juramenti regis e-
 radendam curavit. At, inquit, *sine regis assensu*
nullas leges vulgus elegerit, eòque nomine duo
 statuta citas, unum Anni xxxvij. Hen. 6. c. xv. al-
 terum *decimo tertio*, Edouardi iv. c. viii. Tan-
 tùm autem abest quominùs eorum alterutrum
 in libro statutorum usquam appareat, ut annis
 abs te citatis, neque rex iste neque ille ullum
 omninò statutum promulgaverit. Tu fidem jam
 perfugarum, statuta tibi dictantiù, elusus que-
 rere; dum alii tuam admirantur impudentiam
 simul & vanitatem, quem non pudebat lis in
 libris versatissimum videri velle, quos in-
 spexisse nunquam, ne vidisse quidem tam facilè
 argueris. Clausulam autem istam jusjurandi,
 quam tu perfrikti oris balatro *commentitiam*
 audes

audes dicere, *regis, inquis, defensores fieri posse aiunt*, ut in aliquot antiquis exemplaribus extiterit, *sed in desuetudinem abiisse, quòd commodam significationem non haberet*. Verùm ob id ipsum majores nostri illam clausulam in hoc regis jurejurando posuere, ut significationem tyrannidi semper non commodam haberet. In desuetudinem autem si abierat, quod tamen falsissimum est, quis neget multo meliori jure revocandam fuisse? frustra, si te audiam: quippe *in regibus mos ille jurandi qui hodie receptus est, caremonialis est tantùm*. Atqui rex, cum episcopos aboleri oportuit, per illud jusjurandum non licere sibi causatus est. Atque ita sacramentum illud sanctissimum, quoties ex usu est regis, vel solidum quiddam & firmum erit, vel inane tantùm & caremoniale. Quod ego vos obtestor, Angli, etiam atque etiam animadvertatis: & qualem estis regem habituri, si redierit, vobiscum reputetis: non enim in mentem venisset unquam huic Grámmatico sceleroso & extraneo de jure regis Anglorum velle scribere, aut posse, nisi Carolus ille extorris, disciplinâ patriâ imbutus, unâque illi monitores ejus profligatissimi, quid hac de re scribi vellent omni studio suggestissent. Dictabant huic illi, *totum Parliamentum proditoris in regem insinulari posse*, vel ob hoc solum, quòd *sine assensu regis declaravit omnes esse proditores qui arma contra Parliamentum Anglia sumpserunt*; *vassallum*
scilicet

scilicet regis esse Parlamentum ; jusjurandum vero regium *ceremoniale tantum* esse , quidni *vassallum* etiam ? Ita neque legum ulla sanctitas, neque sacramenti ulla fides , aut religio, quicquam valebit ad cohibendam à vita atque fortune vestrum omnium vel libidinem effrænati regis, vel ultionem exacerbat : qui ita institutus à pueritia est, ut leges & religionem, ipsam denique fidem vassallari sibi , & servire suis libitis arbitretur debere. Quanto præstabilius esset, vobisque dignius, si opes, si libertatem, si pacem, si imperium vultis, à virtute, industria, prudentia, fortitudine vestra indubitanter petere hæc omnia, quàm sub regio dominatu incassum sperare ? Certè qui sine rege ac domino parari hæc posse non putant , dici non potest, quàm abjectè, quàm non honestè, non dico quàm indignè, de se ipsi statuunt: quid enim aliud nisi se inertes, imbecillos, mentis inopes, atque consilii, corpore atque animo ad servitium natos, fatentur esse ? Et servitus quidem omnis homini ingenuo turpis est; vobis autem post libertatem Deo vindice ; vestroque Marte recuperatam, post tot fortia facinora , & exemplum in regem potentissimum tam memorabile editum , velle rursus ad servitutem, etiam præter fatum, redire , non modo turpissimum , sed & impium erit , & sceleratum : parque vestrum scelus illorum sceleri erit , qui servitutis olim Ægyptiacæ desiderio capti, multis tandem claudibus

dibus ac variis divinitus absumpti, liberatori Deo pœnas tam servilis animi dedere. Quid tu interim, servitutis conciliator? *Potuit, inquis, rex proditionis & delictorum aliorum gratiam facere; quod satis evincit legibus eum solutum fuisse.* Proditionis quidem, non quæ in regnum, sed quæ in se commissa erat, poterat rex, ut quivis alius, gratiam facere: poterat & quorundam aliorum fortasse maleficiorum, quanquam non id semper: an ideò qui maleficum servandi nonnunquam jus quoddam habet, idem continuò omnes bonos perdendi jus ullum habebit? Citatos in curiam, eamque inferiorem, respondere non tenetur, nisi per procuratorem, rex, an ideò in Parlamentum citatus ab universis non veniet? non ipse respondebit? *Conari nos ais Batavorum exemplo factum nostrum tueri,* atque hinc, stipendio scilicet metuens quo te Batavi luem atque pestem alunt, ne Anglos infamando etiam Batavos altores tuos infamasse videaris, demonstrare cupis quàm *dissimile sit quod hi & quod illi fecerunt.* Quam ego collationem tuam, quanquam in ea quædam sunt salissima, alia, ne salario fortasse tuo non satis litaris, palpum olent, omittam. Negant enim Angli opus sibi esse ut exterorum quorumvis exemplo facta sua tueantur. Habent leges, quas secuti sunt, patrias, hac in parte, sicubi terrarum aliæ sunt, optimas: habent quos imitentur, majores suos, viros fortissimos, qui immoderatis regum imperiis

perils nunquam cessere; multos eorum intolerantiùs se gerentes per supplicium necavere. In libertate sunt nati, sibi sufficiunt, quas volunt leges, possunt sibi ferre; unam præ cæteris colunt antiquissimam, à natura ipsa latam, quæ omnes leges, jus òmne atque imperium civile non ad regum libidinem, sed ad bonorum maximè civium salutem refert. Jam præter quisquillas & rudera superiorum capitum restare nihil video; quorum quidem acervum cum satis magnû in fine congesseris, nescio quid aliud tibi volueris, nisi hujus tuæ fabricæ ruinam quasi præfagire. Tandem aliquâdo post immensam loquacitatem rivos claudis; *Deum testatus te hanc causam tuendam suscepisse, non tantum quia rogatus, sed quia meliorem nullam te potuisse defendere conscientia tibi suggestit.* Rogatus tu in res nostras tibi alienissimas, nobis non rogantibus te interponas? Tu populi Anglicani sùmos magistratus pro authoritate pròque imperio sibi commissò quod suum munus est in sua ditione agentes, nulla injuriâ laceffitus (neq; enim natum te esse sciebant) indignissimis verborum contumeliis laceres, libròque infamiedito proscindas? A quo autem rogatus? An ab uxore, credo, quæ jus, regium, ut perhibent, in te exercet; quæque tibi, quoties libet, ut illà Fulvia, cujus, ex epigrammate obscæno, centones mòdo confuisti (p. 320.) *aut scribe aut pugnemus* ait: unde tu, ne signa canerent, scribere malebas.

bas. An rogatus fortasse à Carolo minore , & perditissimo illo peregrinantium aulicorum grege, quasi alter Balaamus ab altero Balacco rege accersitus , ut jacentem regis causam , & malè pugnando amissam maledicendo erigere dignarere ? Sic sanè fieri potuit; nisi quod hoc ferè interfuit; ille enim vir sagax asino insidens locutuleio ad execrandum venit; tu asinus loquacissimus infestus & fœmina, & sanatis quos vulneraveras episcoporum capitibus obsitus , apocalypticæ illius bestię parvam quandam imaginem exprimere videris. Sed ferunt pœnituisse te hujus libri , pòst paulò quàm scripsisses. Benè profectò habet; tuam itaque ut restere omnibus pœnitentiam , nihil tibi priùs faciendum erit . quàm ut pro libro tam longo unam tantummodò literam adhuc longam ex te facias. Sic enim pœnituit Iscarioten illum Judam cui similis es; idque novit puer Carolus, qui crumenam idcirco tibi , insigne illud Judæ proditoris, dono misit, quòd primùm audierat, & postmodum sciebat , te apostatam esse & Diabolum. Judas ille Christum prodidit , tu Christi Ecclesiam; Episcopos Antichristos esse docueras, ad eos defecisti: quos inferis damnaveras , eorum causam suscepisti: Christus omnes homines liberavit, tu omnes ad servitutem redigere conatus es : ne dubita , postquàm in Deum, in ecclesiam, in omne genus hominum tam impius fuisti , quin te etiam idem exitus maneat,

maneat, ut desperatione magis quam pœnitentiâ ductus, tuique pertæsus, ab infelici tandem arbore pendens, sicut & par ille tuus olim, medius crepes; illamque malefidam & fallacem conscientiam, bonorum & sanctorum insectatricem, ad destinatas tibi quandoque supplicii sedes præmittas. Hactenus, quod initio institueram ut meorum civium facta egregia contra insanam & lividissimam furentis sophistæ rabiem, & domi & foris defenderem, jusque populi commune ab injusto regum dominatu assererem, non id quidem regum odio, sed tyrannorum, Deo bene juvante videor jam mihi absolvisse: neque ullum sine responso vel argumentum, vel exemplum, vel testimonium ab adversario allatum sciens prætermisi, quod quidem firmitatis in se quicquam, aut probationis vim ullam habere videretur; in alteram fortasse partem culpæ propior, quod sæpiusculè ineptiis quoque ejus, & argutiis tritissimis, quasi argumentis, respondendo, id iis tribuisse videar, quod ignæ non erant. Unum restat, & fortasse maximum, ut vos quoque, ô Cives adversariû hunc vestrum ipsi refutetis; quod nulla alia ratione video posse fieri, nisi omnium maledicta vestris optimè factis exsuperare perpetuò cõtendatis. Vota vestra & preces ardentissimas Deus, cum servitutis haud uno genere oppressi, ad eum confugistis, benignè exaudiat. Quæ duo in vita hominum mala sanè maxima sunt,

&c

& virtuti damnosissima, Tyrannis & supersticio, iis vos gentium primos gloriosè liberavit; eam animi magnitudinem vobis iniecit, ut devictum armis vestris & dedititium regem judicio inclyto judicare, & condemnatum punire primi mortalium non dubitaretis. Post hoc facinus tam illustre, nihil humile aut angustum, nihil non magnum atque excelsum & cogitare & facere debebitis. Quam laudem ut assequamini, hac sola incedendum est via, si ut hostes bello domuistis, ita ambitionem, avaritiam, opes, & secundarum rerum corruptelas, quæ subigunt cæteras gentes hominum, ostenderitis posse vos etiam inermes media in pace omnium mortalium fortissimè debellare: si, quam in repellenda servitute fortitudinem præstitistis, eam in libertate conservanda justitiam, temperantiam, moderationem præstiteritis. His solis argumentis & testimoniis evincere potestis, non esse vos illos, quos hic probris insequitur, *Produelles, latrones, sicarios, parricidas, fanaticos*; non vos ambitionis aut alieni invadendi studio, non invidia, ne, aut pravis ullis cupiditatibus, non amentia aut furore percitos, regem trucidasse, sed amore libertatis, religionis, justitiæ, honestatis, patriæ denique charitate accensos, tyrannum puniisse. Sin autem, quod, bone Deus, ne unquam siveris, aliter in animum induxeritis, si in bello fortes, in pace turpes eritis, qui manifestum sensistis numen vobis tam propitium, hostibus tam grave, neque exemplo tam insigni & memorando ante oculos posito, Deum vereri, & justitiam colere didiceritis, quod ad me attinet, concedam sanè, & fatebor, neque enim potero negare, ea omnia quæ nunc maledici & mendaces de vobis pessimè aut loquuntur aut sentiunt, vera esse: vobis quoque multo iratiorem brevi tempore experturi estis Deum, quàm aut insensum inimici vestri, aut vos benignum & faventem & paternum, præ cæteris omnibus terrarum orbis gentibus hodiernis, experti estis.

DX
M 2165

35320

REPRODUCED FROM THE ORIGINAL
IN THE HENRY E. HUNTINGTON
LIBRARY AND ART GALLERY.
FOR REFERENCE ONLY.
PERMISSION NECESSARY FOR
REPRODUCTION.